

O'ZBEKISTON RESPUBLIKASINING BUDJET KODEKSI

Umumiy qism

I bo'lim.

Umumiy qoidalar

1-bob. Asosiy qoidalar

1-modda. Ushbu Kodeks bilan tartibga solinadigan munosabatlar

Ushbu Kodeks O'zbekiston Respublikasining budjet tizimi budjetlarini (bundan buyon matnda budjet tizimi budjetlari deb yuritiladi) shakllantirish, tuzish, ko'rib chiqish, qabul qilish, tasdiqlash, ijro etish, davlat tomonidan mablag' jalb qilish va budjet to'g'risidagi qonunchilik ijrosini nazorat qilish sohasidagi munosabatlarni tartibga soladi.

2-modda. Budjet to'g'risidagi qonunchilik

Budjet to'g'risidagi qonunchilik ushbu Kodeks va boshqa qonunchilik hujjatlaridan iboratdir.

Budjet to'g'risidagi qonunchilikning boshqa qonunchilik hujjatlarida ko'rsatilgan normalari ushbu Kodeksga muvofiq bo'lishi kerak.

Agar O'zbekiston Respublikasining xalqaro shartnomasida O'zbekiston Respublikasining budjet to'g'risidagi qonunchiligida nazarda tutilganidan boshqacha qoidalar belgilangan bo'lsa, xalqaro shartnoma qoidalari qo'llaniladi.

3-modda. Ushbu Kodeksda qo'llaniladigan asosiy tushunchalar

Ushbu Kodeksda quyidagi asosiy tushunchalar qo'llaniladi:

aylanma kassa mablag'i — moliya yilida O'zbekiston Respublikasi respublika budjetining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining shaxsiy g'azna hisobvaraqlarida turgan budjet mablag'larining yo'l qo'yiladigan eng kam miqdori;

birinchi darajali budjet mablag'larini taqsimlovchi — O'zbekiston Respublikasining respublika budjetidan qonun bilan belgilangan miqdorda ajratiladigan budjet mablag'larini taqsimlovchi yuridik shaxs;

budjetdan ajratiladigan mablag'lar — O'zbekiston Respublikasining Davlat budjetidan va davlat maqsadli jamg'armalari budjetlaridan budjet tashkilotlari hamda budjet mablag'lari oluvchilar uchun nazarda tutiladigan pul mablag'lari;

budjet jarayoni — budjet tizimi budjetlarini shakllantirish, tuzish, ko'rib chiqish, qabul qilish, tasdiqlash va ijro etish, ularning shakllantirilishini, tuzilishini hamda ijrosini nazorat qilish, budjet tizimi budjetlarining ijrosi to'g'risidagi hisobotlarni tayyorlash va tasdiqlash, shuningdek ular o'rtasidagi o'zaro munosabatlar jarayoni;

budjet jarayoni ishtirokchilari — davlat hokimiyati va boshqaruvi organlari, davlat moliyaviy nazorat organlari, budjet tashkilotlari va budjet mablag'lari oluvchilar;

budjet mablag'larini taqsimlovchi — birinchi darajali budjet mablag'larini taqsimlovchi va ikkinchi darajali budjet mablag'larini taqsimlovchi;

budjet sohasidagi vakolatlar — budjet jarayoni ishtirokchilarining budjet munosabatlari sohasidagi vakolatlari;

budjet ssudasi — qaytarish sharti bilan yuqori turuvchi budjetdan quyi turuvchi budjetga, shuningdek davlat maqsadli jamg'armalariga, rezident-yuridik shaxsga ajratiladigan pul mablag'lari;

budjet so'rovi — o'rta muddatli davr uchun budjetdan ajratiladigan mablag'larni olishga bo'lgan ehtiyojni asoslashni nazarda tutuvchi hujjat;

budjet tashkilotlarining budjetdan tashqari jamg'armalari — qonunchilikda nazarda tutilgan manbalar hisobidan budjet tashkiloti tasarrufiga kelib tushadigan mablag'lar;

budjet tizimi budjetlari — O‘zbekiston Respublikasining Davlat budjeti, davlat maqsadli jamg‘armalari budjetlari va budjet tashkilotlarining budjetdan tashqari jamg‘armalari;

budjetlararo transfertlar — O‘zbekiston Respublikasining respublika budjetidan Qoraqalpog‘iston Respublikasi budjetiga, viloyatlar va Toshkent shahar mahalliy budjetlariga, davlat maqsadli jamg‘armalariga hamda buning aksicha o‘tkaziladigan, shuningdek Qoraqalpog‘iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan tumanlar va shaharlar budjetlariga hamda buning aksicha o‘tkaziladigan mablag‘lar;

vaqtinchalik kassa uzilishi — joriy moliya yilining muayyan davrida budjet tizimi budjetlarining xarajatlari daromadlaridan vaqtinchalik oshib ketishi;

vaqtinchalik xarajatlar smetasi — budjet tashkilotining yoki budjet mablag‘lari oluvchining xarajatlar smetasi tasdiqlanganiga va ro‘yxatdan o‘tkazilganiga qadar amal qiladigan hujjat bo‘lib, unda qonunchilikdagi o‘zgartirishlar hisobga olingan holda uning uchun nazarda tutilgan budjetdan ajratiladigan mablag‘lar har oy uchun aks ettiriladi;

Davlat budjetining birlamchi profitsiti — muayyan davr uchun O‘zbekiston Respublikasining Davlat budjeti xarajatlaridan davlat qarziga xizmat ko‘rsatish bo‘yicha foiz to‘lovlarni chiqarib tashlagan holda hisoblanadigan Davlat budjeti profitsiti;

Davlat budjetining birlamchi taqchilligi — muayyan davr uchun O‘zbekiston Respublikasining Davlat budjeti xarajatlaridan davlat qarziga xizmat ko‘rsatish bo‘yicha foiz to‘lovlarni chiqarib tashlagan holda hisoblanadigan Davlat budjeti taqchilligi;

Davlat budjeti profitsiti — muayyan davrda O‘zbekiston Respublikasining Davlat budjeti daromadlarining uning xarajatlaridan oshib ketishi;

Davlat budjeti taqchilligi — muayyan davrda O‘zbekiston Respublikasining Davlat budjeti xarajatlarining uning daromadlaridan oshib ketishi;

davlat moliyaviy nazorati — budjet to‘g‘risidagi qonunchilikning ijrosi ustidan nazoratni amalga oshirish maqsadida davlat moliyaviy nazorati obyektlarining buxgalteriya, moliya, statistika, bank hujjatlarini va boshqa hujjatlarni o‘rganish, tahlil qilish hamda taqqoslash;

davlat moliyaviy nazorati obyektlari — O‘zbekiston Respublikasining respublika budjeti, Qoraqalpog‘iston Respublikasi budjeti, viloyatlar va Toshkent shahar mahalliy budjetlari, budjet mablag‘larini taqsimlovchilar, budjet tashkilotlari va budjet mablag‘lari oluvchilar, davlat maqsadli jamg‘armalari, belgilangan tartibda tashkil etilgan boshqa jamg‘armalar va budjet tashkilotlarining budjetdan tashqari jamg‘armalari;

davlat tomonidan mablag‘ jalb qilish — aktivlarni jalb etish, bu bo‘yicha O‘zbekiston Respublikasining qarz oluvchi sifatidagi yoki qarz oluvchi-rezidentlarning kreditlarini (qarzlarini) to‘lashga kafil sifatidagi majburiyatlari yuzaga kelishi;

davlat xaridlari — budjet tizimi budjetlarining mablag‘lari hisobidan amalga oshiriladigan tovarlar (ishlar, xizmatlar) xaridlari;

davlat qarzi — O‘zbekiston Respublikasining ichki mablag‘ni va xorijdan mablag‘ jalb qilish natijasida yuzaga kelgan majburiyatlari;

daromadlar va xarajatlar smetasi — budjet tashkilotlari budjetdan tashqari jamg‘armalarining tegishli yil choragi yoki moliya yili uchun kutilayotgan tushumlari va xarajatlari aks ettiriladigan hujjat;

donorlar — O‘zbekiston Respublikasiga, O‘zbekiston Respublikasi Hukumatiga, fuqarolarning o‘zini o‘zi boshqarish organlariga, faoliyati O‘zbekiston Respublikasining qonunchiligiga zid bo‘lmagan yuridik va jismoniy shaxslarga beg‘araz asosda mablag‘lar ajratadigan davlatlar, davlatlarning hukumatlari, xalqaro va chet el hukumat tashkilotlari, chet el fuqarolari, shuningdek O‘zbekiston Respublikasi Vazirlar Mahkamasi tomonidan belgilanadigan ro‘yxatga kiritilgan xalqaro va chet el nohukumat tashkilotlari;

dotatsiya — budjet tizimi budjetlariga ularning o‘z daromadlari yetishmagan taqdirda daromadlar bilan xarajatlar o‘rtasidagi farqni qoplash uchun qaytarmaslik sharti bilan ajratiladigan pul mablag‘lari;

jamlanma xarajatlar smetasi — budget mablagʻlarini taqsimlovchi tomonidan oʻz tasarrufidagi budget tashkilotlarining va budget mablagʻlari oluvchilarning xarajatlar smetalari asosida tuziladigan xarajatlar smetasi;

ikkinchi darajali budget mablagʻlarini taqsimlovchi — Oʻzbekiston Respublikasi Vazirlar Mahkamasi tomonidan birinchi darajali budget mablagʻlarini taqsimlovchilarga birlashtiriladigan va oʻziga ajratiladigan budget mablagʻlarini taqsimlovchi yuridik shaxs;

umumiy fiskal balans — Oʻzbekiston Respublikasining konsolidatsiyalashgan budgetini hamda davlat dasturlarini amalga oshirish uchun chetdan jalb qilingan va Oʻzbekiston Respublikasining Davlat budgeti hisobidan qoplanadigan qarz mablagʻlari evaziga amalga oshiriladigan xarajatlarni oʻz ichiga olgan jamlanma balans;

fiskal tavakkalchiliklar — budget jarayoni ishtirokchilari uchun budget tizimi budgetlari mablagʻlarini shakllantirish va sarflashda moliyaviy resurslardagi yoʻqotishlarni baholash;

moliya yili — birinchi yanvardan oʻttiz birinchi dekabr kuni oxirigacha boʻlgan vaqtni oʻz ichiga oluvchi davr;

moliyaviy majburiyatlar — budget tashkilotlarida va budget mablagʻlari oluvchilarda ularga pul mablagʻlarini oʻtkazish majburiyatini yuklovchi hujjatlar, shu jumladan ijro hujjatlari asosida yuzaga keladigan majburiyatlar;

subvensiya — muayyan maqsadlarga sarflash sharti bilan yuqori turuvchi budgetdan quyi turuvchi budgetga qaytarmaslik sharti bilan ajratiladigan pul mablagʻlari;

subsidiya — tovarlar ishlab chiqarish, ishlar bajarish, xizmatlar koʻrsatish va ularni realizatsiya qilishni moliyalashtirish yoki birgalikda moliyalashtirish yoxud maqsadli xarajatlarning oʻrnini qisman qoplash uchun budget tizimi budgetlari hisobidan yuridik va jismoniy shaxslarga beriladigan pul mablagʻlari;

tartibga soluvchi daromadlar — budget tizimi budgetlari oʻrtasida ajratmalar normativlari belgilanadigan umumdavlat soliqlari va boshqa majburiy toʻlovlar, shuningdek soliq boʻlmagan toʻlovlar. Soliq boʻlmagan toʻlovlarga budget tizimi budgetlariga kelib tushadigan soliqlar va boshqa majburiy toʻlovlar boʻlmagan toʻlovlar kiradi;

xarajatlar moddasi — budget tizimi budgetlari xarajatlarining iqtisodiy yoʻnalishi va toʻlovlarning aniq turlari boʻyicha belgilovchi budget tasnifining bir qismi;

xarajatlar smetasi — budget tashkiloti yoki budget mablagʻlari oluvchi tomonidan moliya yili uchun tuziladigan va tasdiqlanadigan, uning uchun nazarda tutilgan budgetdan ajratiladigan mablagʻlar xarajatlar moddalari boʻyicha aks ettiriladigan hujjat;

shtat jadvali — doimiy xodimlar lavozimlari va boʻsh oʻrinlar nomlarining soni va lavozim maoshlarining miqdorlari koʻrsatilgan roʻyxatni oʻz ichiga oladigan, budget tashkiloti tomonidan tuziladigan hujjat;

shaxsiy gʻazna hisobvaraqlari — Oʻzbekiston Respublikasi Moliya vazirligining axborot tizimida ochiladigan, budget tizimi budgetlari ijrosi bilan bogʻliq operatsiyalarni aks ettirish uchun moʻljallangan tahliliy hisob registrlari;

yuridik majburiyatlar — tuzilgan shartnomalar, shuningdek tegishli davlat hokimiyati va boshqaruv organlarining qarorlari asosida budget tashkilotlarida va budgetdan mablagʻ oluvchilarda yuzaga keladigan majburiyatlar;

Yagona gʻazna hisobvaragʻi — Oʻzbekiston Respublikasi Moliya vazirligining Oʻzbekiston Respublikasi Markaziy bankida ochiladigan milliy yoki chet el valyutasidagi maxsus bank hisobvaragʻi;

oʻtkazib beriladigan daromadlar — tegishli maʼmuriy-hududiy birlikda shakllanadigan va yuqori turuvchi budgetga oʻtkaziladigan, ular qayerda shakllangan boʻlsa, keyinchalik oʻsha maʼmuriy-hududiy birlik budgetiga oʻtkazib beriladigan daromadlar;

Oʻzbekiston Respublikasining Davlat budgeti (Davlat budgeti) — davlatning davlat vazifalari va funksiyalarini moliyaviy jihatdan taʼminlash uchun moʻljallangan markazlashtirilgan pul jamgʻarmasi;

g'aznachilik bo'linmalari — O'zbekiston Respublikasi Moliya vazirligi G'aznachiligi, Qoraqalpog'iston Respublikasi, viloyatlar va Toshkent shahri bo'yicha G'aznachilik boshqarmalari, tumanlar va shaharlar bo'yicha G'aznachilik bo'linmalari;

g'aznachilik memorial orderi — mablag'larni bir shaxsiy g'azna hisobvarag'idan boshqa shaxsiy g'azna hisobvarag'iga o'tkazish uchun foydalaniladigan to'lov hujjati;

hududiy budjet mablag'larini taqsimlovchi — o'z tasarrufida Qoraqalpog'iston Respublikasi respublika budjetidan, viloyatlar viloyat budjetlaridan, Toshkent shahri shahar budjetidan, tumanlar va shaharlar budjetlaridan mablag' oluvchi tashkilotlarga ega bo'lgan yuridik shaxs, shuningdek Qoraqalpog'iston Respublikasi respublika budjetidan, viloyatlar viloyat budjetlaridan va Toshkent shahri shahar budjetidan, tumanlar va shaharlar budjetlaridan moliyalashtiriladigan budjet tashkiloti yoki budjet mablag'lari oluvchi;

hududiy moliya organlari — Qoraqalpog'iston Respublikasining Moliya vazirligi, viloyatlar va Toshkent shahar hokimliklarining moliya boshqarmalari, tumanlar va shaharlar hokimliklarining moliya bo'limlari;

o'rta muddatli davr uchun fiskal strategiya — o'rta muddatli davr uchun soliq va budjet siyosatining asosiy yo'nalishlarini belgilovchi hujjat.

4-modda. Budjet tashkiloti

Davlat funksiyalarini amalga oshirish uchun belgilangan tartibda davlat hokimiyati organlarining qaroriga ko'ra tashkil etilgan, Davlat budjeti mablag'lari hisobidan saqlab turiladigan notijorat tashkilot budjet tashkilotidir.

Budjet tashkilotlarini moliyalashtirish shartlari va ularning budjet hisobini yuritish tartibi budjet to'g'risidagi qonunchilik bilan belgilanadi.

5-modda. Budjet mablag'lari oluvchi

Davlat budjetidan va davlat maqsadli jamg'armalari budjetlaridan mablag'lar oladigan yuridik yoki jismoniy shaxs budjet mablag'lari oluvchidir.

Budjet mablag'lari oluvchi budjet tashkiloti maqomiga ega bo'la olmaydi.

Budjet mablag'lari oluvchini Davlat budjeti va davlat maqsadli jamg'armalari budjetlari mablag'lari hisobidan moliyalashtirish shartlari budjet to'g'risidagi qonunchilik bilan belgilanadi.

5¹-modda. Budjet daromadlarining kamayishini, soliq va bojxona imtiyozlari berilishini yoki bekor qilinishini, shuningdek soliq bo'lmagan tushumlardan budjetga ajratmalarning kamayishini yoki ko'payishini nazarda tutuvchi normalarni amalga kiritish tartibi

Moliya yili mobaynida budjet tizimi budjetlari daromadlarining kamayishini, soliq va bojxona imtiyozlari berilishini yoki bekor qilinishini, shuningdek soliq bo'lmagan tushumlardan budjet tizimi budjetlariga ajratmalarning kamayishini yoki ko'payishini nazarda tutuvchi qonunchilik normalari keyingi moliya yilining 1-yanvaridan e'tiboran amalga kiritiladi.

2-bob. Budjet tizimi tushunchasi va prinsiplari

6-modda. Budjet tizimi tushunchasi

Budjet tizimi barcha darajadagi budjetlar, davlat maqsadli jamg'armalari budjetlari va budjet tashkilotlarining budjetdan tashqari jamg'armalari, budjet tizimi budjetlarini tuzish va tashkil etish prinsiplari, ular o'rtasida budjet jarayoni mobaynida yuzaga keladigan o'zaro munosabatlar yig'indisini o'zida ifodalaydi. Moliya yili uchun budjet tizimi budjetlarini shakllantirish, tuzish, ko'rib chiqish, qabul qilish, tasdiqlash va ijro etish O'zbekiston Respublikasining milliy valyutasi — so'mda amalga oshiriladi.

7-modda. Budjet tizimi prinsiplari

Budjet tizimi quyidagi prinsiplarga asoslanadi:

budjet tizimining yagonaligi;

budjet tizimining O'zbekiston Respublikasi ma'muriy-hududiy tuzilishiga muvofiqligi;

budjet tizimi budjetlarining balanslilik va o'zaro bog'liqligi;

budjet tizimi budjetlari daromadlarini prognoz qilish va xarajatlarini rejalashtirish;
budjet tizimi budjetlari mablag'laridan foydalanishning aniq yo'naltirilganligi va maqsadlilik xususiyati;
budjet tizimi budjetlarining mustaqilligi;
budjet tizimi budjetlari mablag'laridan foydalanishning natijadorligi;
kassaning yagonaligi;
budjet jarayoni ishtirokchilarining javobgarligi;
ochiqlik.

8-modda. Budjet tizimining yagonaligi prinsipi

Budjet hujjatlari va budjet hisobotlarining shakllari, budjet tasnifi yagona bo'lishi hamda budjet tizimi budjetlarining daromadlari va xarajatlarini shakllantirish hamda ijro etish, budjet hisobini yuritish va budjet hisobotini tuzishning yagona tartibini nazarda tutishi lozim.

9-modda. Budjet tizimining O'zbekiston Respublikasi ma'muriy-hududiy tuzilishiga muvofiqligi prinsipi

Budjet tizimi O'zbekiston Respublikasining ma'muriy-hududiy tuzilishiga muvofiq bo'lishi lozim.

10-modda. Budjet tizimi budjetlarining balanslilik va o'zaro bog'liqligi prinsipi

Budjet tizimi budjetlarida nazarda tutilgan xarajatlar hajmi ularning daromadlari va taqchillikni qoplash manbalari yig'indisining hajmiga muvofiq bo'lishi kerak.

Budjet tizimi budjetlarini tuzish va ijro etishda budjetlarning mablag'lari mazkur budjetlarning balanslilikini ta'minlash uchun ular o'rtasida qayta taqsimlanishi mumkin.

11-modda. Budjet tizimi budjetlari daromadlarini prognoz qilish va xarajatlarini rejalashtirish prinsipi

Budjet tizimi budjetlarini tuzishda budjet tasnifiga muvofiq, daromadlar ularning aniq manbalari bo'yicha prognoz qilinadi, xarajatlar esa yo'nalishlar bo'yicha rejalashtiriladi.

12-modda. Budjet tizimi budjetlari mablag'laridan foydalanishning aniq yo'naltirilganligi va maqsadlilik xususiyati prinsipi

Budjet tizimi budjetlarining mablag'lari muayyan budjet tashkilotlari va budjet mablag'lari oluvchilarga ushbu mablag'lardan belgilangan maqsadlarni moliyalashtirishda foydalanish uchun ajratiladi.

13-modda. Budjet tizimi budjetlarining mustaqilligi prinsipi

Budjet tizimi budjetlari mustaqildir.

14-modda. Budjet tizimi budjetlari mablag'laridan foydalanishning natijadorligi prinsipi

Budjet jarayoni ishtirokchilari budjet tizimi budjetlarini tuzish va ijro etishda o'zlariga berilgan vakolatlar doirasida budjet tizimi budjetlarining belgilangan hajmdagi mablag'laridan foydalangan holda natijaga erishish zaruriyatidan kelib chiqadi.

15-modda. Kassaning yagonaligi prinsipi

Budjet tizimi budjetlarining barcha daromadlari Yagona g'azna hisobvarag'iga kiritiladi va ularning xarajatlarini to'lash ushbu hisobvaraqdan amalga oshiriladi.

16-modda. Budjet jarayoni ishtirokchilarining javobgarligi prinsipi

Budjet jarayoni ishtirokchilarining javobgarligi prinsipi budjet jarayonining har bir ishtirokchisi budjet jarayonining har bir bosqichida o'z harakatlari uchun javobgar bo'lishidan iboratdir.

17-modda. Ochiqlik prinsipi

Ochiqlik prinsipi:

Davlat budjetini va davlat maqsadli jamg'armalari budjetlarini ko'rib chiqish hamda qabul qilish tartib-taomillarining jamiyat va ommaviy axborot vositalari uchun ochiqqligini, shuningdek budjet jarayonida fuqarolarning faol ishtirok etishi mumkinligini;

tasdiqlangan Davlat budjeti va davlat maqsadli jamg'armalari budjetlari to'g'risidagi axborotning ommaviy axborot vositalarida va O'zbekiston Respublikasi Moliya vazirligining rasmiy veb-saytida e'lon qilinishini (chop etilishini);

Davlat budjeti va davlat maqsadli jamg'armalari budjetlari ijrosining borishi to'g'risidagi axborot ommaviy axborot vositalarida chop etilishini, shuningdek O'zbekiston Respublikasi Moliya vazirligining rasmiy veb-saytida joylashtirilishi va yangilab borilishini anglatadi.

3-bob. Budjet tasnifi

18-modda. Budjet tasnifi tushunchasi

Budjet tasnifi budjet tizimi budjetlarining daromadlari va xarajatlari, shuningdek Davlat budjeti taqchilligini qoplash manbalarini guruhlashdan iborat bo'lib, budjet tizimi budjetlarini shakllantirish, tuzish va ijro etishni tizimlashtirish uchun foydalaniladi.

Budjet tasnifi xalqaro tasnif tizimlariga muvofiq ishlab chiqiladi va O'zbekiston Respublikasi Moliya vazirligi tomonidan tasdiqlanadi.

19-modda. Budjet tasnifining tarkibi

Budjet tasnifi:

budjet tizimi budjetlari daromadlarining tasnifini;

budjet tizimi budjetlari xarajatlarining tasnifini;

Davlat budjeti taqchilligini qoplash manbalari tasnifini o'z ichiga oladi.

20-modda. Budjet tasnifining asosiy prinsiplari

Budjet tasnifining asosiy prinsiplari to'liqlik, yagonalik va o'zaro muvofiqlikdan iboratdir.

Budjet tasnifining to'liqlik prinsipi budjet jarayonining barcha ishtirokchilari qamrab olinishini nazarda tutadi.

Budjet tasnifining yagonalik prinsipi budjet jarayonining barcha ishtirokchilari tomonidan yagona budjet tasnifi qo'llanilishini anglatadi.

Budjet tasnifining o'zaro muvofiqligi prinsipi budjet tasnifining kodlari bir vaqtning o'zida budjet jarayonining turli xil operatsiyalarini hisobga olish uchun qo'llanilmasligini anglatadi.

21-modda. Budjet tizimi budjetlari daromadlarining tasnifi

Budjet tizimi budjetlari daromadlarining tasnifi daromadlarni ularning turlari va manbalari bo'yicha kodlashdan iborat bo'ladi.

Budjet tizimi budjetlari daromadlarining tasnifi tuzilmasi quyidagilardan iborat:

budjet tizimi budjetlari mablag'larining manbalari va darajalari tasnifi;

daromadlarning turlari;

tashkiliy tasnif;

hududiy tasnif.

Budjet tizimi budjetlari mablag'larining manbalari va darajalari tasnifi kelib tushayotgan daromadlarning tegishli mablag'lar manbalariga va ushbu budjetlar darajalariga mansubligini aniqlash uchun qo'llaniladi.

Daromadlarning turi bo'lim, paragraf va daromad tipidan iboratdir.

Daromadlar bo'limi daromadlarni ularni olish manbalari bo'yicha kodlashdan iborat bo'ladi.

Daromadlar paragrafi soliqlar va boshqa majburiy to'lovlarni, shuningdek soliq bo'lmagan to'lovlarni ularni undirish bazasi bo'yicha kodlashdan iborat bo'ladi.

Daromad tipi budjet tizimi budjetlari daromadining aniq turidan iborat bo'ladi.

Tashkiliy tasnif kelib tushayotgan daromadlarning ana shu daromadlarni ma'muriy jihatdan idora qiluvchi tegishli organga mansubligini identifikatsiyalash maqsadida qo'llaniladi.

Hududiy tasnif kelib tushayotgan daromadlarning ushbu daromadlar shakllantirilayotgan yoxud o'tkazib berilayotgan tegishli ma'muriy-hududiy birlikka mansubligini identifikatsiyalash maqsadida qo'llaniladi.

22-modda. Budjet tizimi budjetlari xarajatlarining tasnifi

Budjet tizimi budjetlari xarajatlarining tasnifi budjet tizimi budjetlari xarajatlarini kodlashdan iborat bo'ladi va ularning yo'nalishini aks ettiradi.

Budjet tizimi budjetlari xarajatlari tasnifining tuzilmasi quyidagilardan iborat:

budjet tizimi budjetlari mablag'larining manbalari va darajalari tasnifi;

vazifa jihatidan tasnif;

dasturiy tasnif;

tashkiliy tasnif;

iqtisodiy tasnif;

hududiy tasnif.

Budjet tizimi budjetlari mablag'larining manbalari va darajalari tasnifi amalga oshirilayotgan xarajatlarning tegishli mablag'lar manbalari va budjetlar darajalariga mansubligini aniqlash uchun qo'llaniladi.

Xarajatlarning vazifa jihatidan tasnifi davlat funksiyalarini bajarish uchun mablag'lar yo'nalishini aks ettiruvchi xarajatlarni guruhlashdir.

Xarajatlarning dasturiy tasnifi davlat, tarmoq va hududiy rivojlantirish dasturlarini bajarish uchun mablag'lar yo'nalishini aks ettiruvchi xarajatlarni guruhlashdan iboratdir.

Xarajatlarning tashkiliy tasnifi budjet tizimi budjetlarining mablag'larini taqsimlovchilar bo'yicha kodlashdan iborat bo'ladi.

Xarajatlarning iqtisodiy tasnifi xarajatlarni iqtisodiy yo'nalishiga ko'ra kodlashdan iborat bo'ladi.

Hududiy tasnif budjet tashkilotlarining va budjet mablag'lari oluvchilarning tegishli ma'muriy-hududiy birlikka mansubligini aniqlash maqsadida qo'llaniladi.

23-modda. Budjet tizimi budjetlarining iqtisodiy belgilar bo'yicha xarajatlari

Budjet tizimi budjetlarining iqtisodiy belgilar bo'yicha xarajatlari quyidagi xarajatlar guruhlarini o'z ichiga oladi:

birinchi guruh — ish haqi, pensiyalar, nafaqalar, stipendiyalar, kompensatsiya to'lovlari va kam ta'minlangan oilalarga moddiy yordam;

ikkinchi guruh — ijtimoiy ehtiyojlarga ajratmalar;

uchinchi guruh — kapital qo'yilmalar (rivojlanish davlat dasturlarida nazarda tutilgan aniq yo'naltirilgan ro'yxatlarga muvofiq);

to'rtinchi guruh — boshqa xarajatlar.

Xarajatlar guruhlari bo'yicha aniq moddalar budjet tasnifiga muvofiq belgilanadi.

24-modda. Davlat budjeti taqchilligini qoplash manbalari tasnifi

Davlat budjeti taqchilligini qoplash manbalari tasnifi ularni ichki va tashqi manbalar bo'yicha guruhlashdan iborat bo'ladi.

4-bob. Budjet sohasidagi vakolatlar

25-modda. O'zbekiston Respublikasi Vazirlar Mahkamasining budjet sohasidagi vakolatlari

O'zbekiston Respublikasi Vazirlar Mahkamasi:

navbatdagi yil uchun O'zbekiston Respublikasining Davlat budjeti to'g'risidagi qonun loyihasini (bundan buyon matnda Davlat budjeti to'g'risidagi qonun loyihasi deb yuritiladi) va budjetnomani ishlab chiqish jarayonini tashkil etadi hamda muvofiqlashtirib boradi;

birinchi va ikkinchi darajali budjet mablag'larini taqsimlovchilar ro'yxatini tasdiqlaydi;

Davlat budjeti to'g'risidagi qonun loyihasini va budjetnomani ko'rib chiqish hamda tegishli xulosa taqdim etish uchun O'zbekiston Respublikasi Hisob palatasiga yuboradi;

budjetnomani O'zbekiston Respublikasi Oliy Majlisining palatalariga taqdim etadi;

Davlat budjeti to'g'risidagi qonun loyihasini O'zbekiston Respublikasi Oliy Majlisining Qonunchilik palatasiga kiritadi;

davlat boshqaruvi organlarining Davlat budjetini va davlat maqsadli jamg'armalari budjetlarini ijro etish borasidagi faoliyatini muvofiqlashtirib boradi hamda nazorat qiladi;

Davlat budjetining va davlat maqsadli jamg'armalari budjetlarining ijrosi to'g'risidagi hisobotlarni har chorakda ko'rib chiqadi;

o'tgan moliya yili uchun Davlat budjetining va davlat maqsadli jamg'armalari budjetlarining ijrosi to'g'risidagi hisobotlarni tashqi audit o'tkazish hamda baholash uchun O'zbekiston Respublikasi Hisob palatasiga yuboradi;

Davlat budjetining va davlat maqsadli jamg'armalari budjetlarining tegishli davrdagi ijrosi to'g'risidagi hisobotlarni tasdiqlash uchun O'zbekiston Respublikasi Oliy Majlisi palatalariga taqdim etadi;

ushbu Kodeksning 145 va 149-moddalarida nazarda tutilgan hollarda moliya yili mobaynida O'zbekiston Respublikasi respublika budjetidan ajratiladigan mablag'larga va davlat maqsadli jamg'armalari budjetlariga o'zgartirishlar kiritish to'g'risidagi takliflarni ko'rib chiqadi;

O'zbekiston Respublikasining Davlat budjeti to'g'risidagi Qonuniga o'zgartish va qo'shimchalar kiritish haqidagi qonun loyihasini O'zbekiston Respublikasi Hisob palatasining tegishli xulosasi bilan birgalikda ko'rib chiqish uchun O'zbekiston Respublikasi Oliy Majlisining Qonunchilik palatasiga kiritadi;

O'zbekiston Respublikasi respublika budjetining qo'shimcha manbalaridan foydalanish to'g'risida qarorlar qabul qiladi;

O'zbekiston Respublikasi Vazirlar Mahkamasining zaxira jamg'armasi mablag'laridan foydalanish to'g'risida qarorlar qabul qiladi;

birinchi darajali budjet mablag'larini taqsimlovlariga O'zbekiston Respublikasi respublika budjetidan ajratiladigan mablag'lar doirasida ikkinchi darajali budjet mablag'larini taqsimlovchilarga ajratiladigan budjet mablag'larining cheklangan miqdorlarini tasdiqlaydi.

O'zbekiston Respublikasi Vazirlar Mahkamasi qonunchilikka muvofiq budjet sohasida boshqa vakolatlarni ham amalga oshirishi mumkin.

26-modda. O'zbekiston Respublikasi Hisob palatasining budjet sohasidagi vakolatlari

O'zbekiston Respublikasi Hisob palatasi:

O'zbekiston Respublikasining Davlat budjeti to'g'risidagi qonun loyihasi va o'rta muddatli davr uchun fiskal strategiya bo'yicha O'zbekiston Respublikasi Vazirlar Mahkamasiga, Qoraqalpog'iston Respublikasi budjetining, viloyatlar va Toshkent shahar mahalliy budjetlarining loyihalari bo'yicha tegishincha Qoraqalpog'iston Respublikasi Vazirlar Kengashiga, viloyatlar va Toshkent shahar hokimlariga xulosa taqdim etadi;

vazirliklarning, idoralarning hamda banklarning budjet tizimi budjetlari daromadlari va xarajatlari moddalarining maqsadli ijrosini boshlang'ich ma'lumotlar bo'yicha nazorat qilish imkonini beruvchi axborot tizimlari va resurslaridan foydalanish imkoniyatiga ega bo'ladi;

O'zbekiston Respublikasi Vazirlar Mahkamasi va Moliya vazirligining bank hisobvaraqlaridagi mablag'larning qonuniy shakllantirilganligi, maqsadli hamda samarali sarflanishi ustidan nazoratni amalga oshiradi;

O'zbekiston Respublikasi Tiklanish va taraqqiyot jamg'armasi, shuningdek belgilangan tartibda tashkil etilgan boshqa jamg'armalar mablag'larining shakllantirilishi hamda ulardan foydalanilishi ustidan nazoratni amalga oshiradi;

Davlat budjeti va davlat maqsadli jamg'armalari budjetlari daromad qismining ijrosi ustidan nazoratni amalga oshiradi;

budjet tizimi budjetlari mablag'laridan maqsadli foydalanilishi ustidan nazoratni amalga oshiradi;

O'zbekiston Respublikasi respublika budjetining va davlat maqsadli jamg'armalari budjetlarining ijrosi to'g'risidagi yillik hisobot bo'yicha tashqi auditni va baholashni amalga

oshiradi hamda ular yuzasidan O'zbekiston Respublikasi Vazirlar Mahkamasiga xulosa taqdim etadi;

Qoraqalpog'iston Respublikasi budgetining, viloyatlar va Toshkent shahar mahalliy budgetlarining ijrosi to'g'risidagi yillik hisobotni tashqi auditdan o'tkazishni va baholashni amalga oshiradi hamda ular yuzasidan tegishincha Qoraqalpog'iston Respublikasi Vazirlar Kengashiga, viloyatlar va Toshkent shahar hokimlariga xulosa taqdim etadi;

O'zbekiston Respublikasining Davlat budgeti to'g'risidagi Qonuniga o'zgartish va qo'shimchalar kiritish haqidagi qonun loyihasi bo'yicha O'zbekiston Respublikasi Vazirlar Mahkamasiga xulosa taqdim etadi;

budget jarayonining ochiqligini ta'minlash tartibiga rioya etilishi ustidan nazoratni amalga oshiradi;

o'z vakolatiga kiradigan masalalarga doir normativ-huquqiy hujjatlar qabul qiladi.

O'zbekiston Respublikasi Hisob palatasi qonunchilikka muvofiq budget sohasida boshqa vakolatlarni ham amalga oshirishi mumkin.

27-modda. Qoraqalpog'iston Respublikasi Jo'qorg'i Kengesining, xalq deputatlari viloyatlar va Toshkent shahar, tumanlar va shaharlar Kengashlarining budget sohasidagi vakolatlari

Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, tumanlar va shaharlar Kengashlari:

Qoraqalpog'iston Respublikasi budgetini, viloyatlar va Toshkent shahar mahalliy budgetlarini, tumanlar va shaharlar budgetlarini tegishincha Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlarining taqdimnomasiga muvofiq ko'rib chiqadi va qabul qiladi;

Qoraqalpog'iston Respublikasi budgeti, viloyatlar va Toshkent shahar mahalliy budgetlari, tumanlar va shaharlar budgetlarining tegishli davrdagi ijrosi to'g'risidagi hisobotlarni tegishincha Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlarining taqdimnomasiga muvofiq har chorakda ko'rib chiqadi va tasdiqlaydi;

Qoraqalpog'iston Respublikasining respublika budgeti, viloyatlarning viloyat budgetlari, Toshkent shahrining shahar budgeti hamda tumanlar va shaharlar budgetlari daromadlarining prognozlarini ma'lumot uchun qabul qiladi;

Qoraqalpog'iston Respublikasi budgetiga, viloyatlar va Toshkent shahrining mahalliy budgetlariga, tumanlar va shaharlar budgetlariga o'zgartirishlar kiritish to'g'risida qarorlar qabul qiladi;

tegishli budgetlardan moliyalashtiriladigan hududiy budget mablag'larini taqsimlovchilarning budget mablag'laridan samarali foydalanilishi hamda erishilgan natijalar to'g'risidagi hisobotlarini eshitadi;

mahalliy soliqlar va boshqa majburiy to'lovlarning stavkalarini qonunchilikda belgilangan miqdorlar doirasida belgilaydi.

Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar Kengashlari tegishincha Qoraqalpog'iston Respublikasining respublika budgetidan, viloyatlarning viloyat budgetlaridan hamda Toshkent shahrining shahar budgetidan tumanlar va shaharlar budgetlariga ajratiladigan tartibga soluvchi budgetlararo transfertlarning cheklangan miqdorlarini ko'rib chiqadi hamda tasdiqlaydi.

Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, tumanlar va shaharlar Kengashlari qonunchilikka muvofiq budget sohasida boshqa vakolatlarni ham amalga oshirishi mumkin.

28-modda. Qoraqalpog'iston Respublikasi Vazirlar Kengashining, viloyatlar va Toshkent shahar, tumanlar va shaharlar hokimlarining budget sohasidagi vakolatlari

Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlari:

tegishli budget loyihasini ishlab chiqish va uni ijro etish jarayonini tashkil etadi hamda muvofiqlashtirib boradi;

budget so'rovi olinishiga qarab tegishli budgetlarning loyihalarini tuzish to'g'risida qarorlar qabul qiladi, ularni tayyorlash tartibi va muddatlarini belgilaydi;

Qoraqalpog'iston Respublikasi budgeti loyihasini, viloyatlar va Toshkent shahar mahalliy budgetlari, tumanlar va shaharlar budgetlari loyihalarini tegishincha Qoraqalpog'iston Respublikasi Jo'qorg'i Kengesiga, xalq deputatlari viloyatlar va Toshkent shahar, tumanlar va shaharlar Kengashlariga ko'rib chiqish va qabul qilish uchun taqdim etadi;

ushbu Kodeksning 146 — 148-moddalarida nazarda tutilgan tartibda moliya yili mobaynida Qoraqalpog'iston Respublikasi budgeti, viloyatlar va Toshkent shahar mahalliy budgetlari, tumanlar va shaharlar budgetlari parametrlariga o'zgartirishlar kiritish to'g'risidagi takliflarni ko'rib chiqadi;

Qoraqalpog'iston Respublikasi budgeti, viloyatlar va Toshkent shahar mahalliy budgetlari, tumanlar va shaharlar budgetlarining tegishli davrdagi ijrosi to'g'risidagi hisobotlarni Qoraqalpog'iston Respublikasi Jo'qorg'i Kengesiga, xalq deputatlari viloyatlar va Toshkent shahar, tumanlar va shaharlar Kengashlariga tasdiqlash uchun taqdim etadi;

Davlat budgetiga va davlat maqsadli jamg'armalari budgetlariga tushumlar to'liq va o'z vaqtida tushishi ustidan nazoratni tashkil etadi;

budget mablag'larining maqsadli sarflanishi ustidan nazoratni tashkil etadi;

Qoraqalpog'iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan, tumanlar va shaharlar budgetlaridan hududiy budget mablag'larini taqsimlovchilarga budget so'rovini tuzish uchun ajratiladigan budget mablag'larining cheklangan miqdorlarini ko'rib chiqadi hamda tasdiqlaydi;

qonunchilikda belgilanadigan alohida soliqlar bo'yicha belgilangan stavkalarga pasaytiruvchi va oshib boruvchi koeffitsiyentlarni kiritish to'g'risida hududlarning faoliyatni amalga oshirish joyining xususiyatlarini inobatga olgan holda qarorlar qabul qiladi.

Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlari ushbu moddaning **birinchi qismida** ko'rsatilgan vakolatlar bilan bir qatorda tegishincha Qoraqalpog'iston Respublikasi respublika budgetining, viloyatlar viloyat budgetlari va Toshkent shahri shahar budgetining, tumanlar va shaharlar budgetlarining zaxira jamg'armalari mablag'laridan foydalanish to'g'risida qarorlar qabul qiladi.

Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlari ushbu moddaning **birinchi** va **ikkinchi qismlarida** ko'rsatilgan vakolatlar bilan bir qatorda mahalliy budgetlarning parametrlarini hamda ularning ijrosi haqidagi hisobotlarni Qoraqalpog'iston Respublikasi Jo'qorg'i Kengesi, viloyatlar va Toshkent shahar, tumanlar va shaharlar xalq deputatlari Kengashlari tomonidan ko'rib chiqish hamda tasdiqlash jarayonining ommaviy axborot vositalarida yoritilishini ham ta'minlaydi.

Qoraqalpog'iston Respublikasi Vazirlar Kengashi, viloyatlar va Toshkent shahar hokimlari O'zbekiston Respublikasi Hisob palatasiga:

navbatdagi yil uchun Qoraqalpog'iston Respublikasi budgetining, viloyatlar va Toshkent shahar mahalliy budgetlarining loyihalarini ko'rib chiqish hamda tegishli xulosani taqdim etish uchun;

o'tgan moliya yili uchun Qoraqalpog'iston Respublikasi budgetining, viloyatlar va Toshkent shahar mahalliy budgetlarining ijrosi to'g'risidagi yillik hisobotni tashqi auditdan o'tkazish hamda baholash uchun yuboradi.

Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlari qonunchilikka muvofiq budget sohasida boshqa vakolatlarni ham amalga oshirishi mumkin.

29-modda. O'zbekiston Respublikasi Moliya vazirligining budget sohasidagi vakolatlari

O'zbekiston Respublikasi Moliya vazirligi:

Davlat budgeti to'g'risidagi qonun loyihasini va budgetnomani ishlab chiqadi;

davlat maqsadli jamg'armalarining budgetlari loyihalarini, shuningdek O'zbekiston Respublikasi Tiklanish va taraqqiyot jamg'armasining daromadlari va xarajatlarini ko'rib chiqadi;

O'zbekiston Respublikasi Vazirlar Mahkamasiga Davlat budjeti to'g'risidagi qonun loyihasini va budjetnomani ko'rib chiqish uchun taqdim etadi;

O'zbekiston Respublikasi Davlat soliq qo'mitasi va Davlat bojxona qo'mitasiga Davlat budjetining daromadlari prognozini har chorakda yetkazadi;

birinchi va ikkinchi darajali budjet mablag'larini taqsimlovchilarga ular uchun nazarda tutilgan budjetdan ajratiladigan mablag'larni taqsimlash, shuningdek navbatdagi yil uchun xarajatlar smetasini tuzish bo'yicha uslubiy ko'rsatmalarni yuboradi;

o'rta muddatli budjetni tayyorlash jarayonini ikki bosqichda (tuzish va tayyorlash) amalga oshirish bo'yicha yagona uslubiy qo'llanmalar to'plamini (sirkulyarni), shuningdek Davlat budjetini shakllantirishda budjetdan ajratiladigan mablag'larning cheklangan miqdorlarini yetkazish hamda qayta ko'rib chiqish tartibini ishlab chiqadi va tasdiqlaydi;

birinchi darajali budjet mablag'larini taqsimlovchilarning takliflari asosida Davlat budjeti to'g'risidagi Qonun qabul qilingan kundan e'tiboran bir oylik muddatda birinchi darajali budjet mablag'larini taqsimlovchilar uchun O'zbekiston Respublikasining respublika budjetidan ajratiladigan tasdiqlangan mablag'lar doirasida ikkinchi darajali budjet mablag'larini taqsimlovchilarga ajratiladigan budjet mablag'larining cheklangan miqdorlarini tasdiqlash uchun O'zbekiston Respublikasi Vazirlar Mahkamasiga kiritadi;

birinchi darajali budjet mablag'larini taqsimlovchilarning takliflari asosida ikkinchi darajali budjet mablag'larini taqsimlovchilar uchun tasdiqlangan budjetdan ajratiladigan mablag'larga o'zgartirishlar kiritish to'g'risidagi takliflarni O'zbekiston Respublikasi Vazirlar Mahkamasiga ma'qullash uchun kiritadi;

Qoraqalpog'iston Respublikasi budjetining, viloyatlar va Toshkent shahar mahalliy budjetlarining, tumanlar va shaharlar budjetlarining hududiy budjet mablag'larini taqsimlovchilar ro'yxatini tasdiqlaydi;

Qoraqalpog'iston Respublikasi Vazirlar Kengashiga, viloyatlar va Toshkent shahar hokimliklariga mahalliy budjetlarning loyihalarini tayyorlash bo'yicha tavsiyalar yuboradi;

birinchi va ikkinchi darajali budjet mablag'larini taqsimlovchilarning xarajatlar smetalarini va jamlanma xarajatlar smetalarini, shtat jadvallari, shuningdek ularga kiritilgan o'zgartirishlarni ro'yxatdan o'tkazadi;

ushbu Kodeksning 145-moddasida nazarda tutilgan tartibda O'zbekiston Respublikasi respublika budjetining xarajatlari yoyilmasiga moliya yili mobaynida o'zgartirishlar kiritadi;

O'zbekiston Respublikasi Vazirlar Mahkamasiga ushbu Kodeksning 145 va 149-moddalarida nazarda tutilgan tartibda O'zbekiston Respublikasining respublika budjetidan ajratiladigan mablag'larga va davlat maqsadli jamg'armalari budjetlariga o'zgartirishlar kiritish bo'yicha takliflar taqdim etadi;

solliqlar va boshqa majburiy to'lovlarni ularning manbalari kesimida to'liq va o'z vaqtida tushishi ustidan monitoringni amalga oshiradi;

budjet tizimi budjetlarining mablag'laridan maqsadli foydalanilishi ustidan nazoratni amalga oshiradi;

Qoraqalpog'iston Respublikasi budjeti, viloyatlar va Toshkent shahar mahalliy budjetlarining ijrosi to'g'risidagi hisobotlar, shuningdek budjet tashkilotlari hamda budjet mablag'lari oluvchilarning moliyaviy hisobotlari shakllarini va ularni taqdim etish tartibini tasdiqlaydi;

O'zbekiston Respublikasi Vazirlar Mahkamasiga Davlat budjeti va davlat maqsadli jamg'armalari budjetlarining tegishli davrdagi ijrosi to'g'risida hisobot taqdim etadi;

budjetdan tashqari maxsus hisobvaraqlarda zaxiralar tashkil etadi;

Davlat budjetini ijro etish jarayonida unga tushumlarni ko'paytirish bo'yicha qo'shimcha zaxiralarni aniqlaydi;

budjet tashkilotlari va budjet mablag'lari oluvchilarning xarajatlarini maqbullashtirishni amalga oshiradi;

budjet ssudalarini beradi;
davlat tomonidan mablag'lar jalb qilish bo'yicha O'zbekiston Respublikasining shartnomalari va davlat kafolatlarini ro'yxatdan o'tkazadi;
davlat qarzining hisobini va monitoringini yuritadi;
budjet tizimi budjetlarining kassa ijrosini yuritadi;
budjet tizimi budjetlarining Yagona g'azna hisobvarag'idagi va boshqa bank hisobvaraqlaridagi mablag'larini boshqaradi;
budjet tashkilotlari va budjet mablag'lari oluvchilarning tovarlarni (ishlarni, xizmatlarni) yetkazib beruvchilar bilan tuzilgan shartnomalarini ro'yxatdan o'tkazadi;
budjet tizimi budjetlarida mablag'lar nazarda tutilgan yuridik yoki jismoniy shaxslar nomidan va ularning topshirig'iga ko'ra to'lovlarni amalga oshiradi;
budjet tizimi budjetlari ijrosining budjet hisobini yuritadi va budjet hisobotini qabul qiladi;
davlat qarzi bo'yicha xizmat ko'rsatilishini ta'minlaydi, davlat kafolatini bajaradi;
O'zbekiston Respublikasiga kelayotgan insonparvarlik yordami hamda texnik ko'maklashish mablag'lari hisobini yuritadi;
prognoz yil uchun Davlat budjetining va davlat maqsadli jamg'armalari budjetlarining loyihalari hamda kelgusi ikki yilga oid budjet mo'ljallari, shuningdek Davlat budjetining va davlat maqsadli jamg'armalari budjetlarining ijrosi to'g'risidagi hisobotlar O'zbekiston Respublikasi Oliy Majlisi palatalariga yuborilishidan oldin ularning jamoatchilik muhokamasini ta'minlaydi;
budjet tizimi budjetlari daromadlari va xarajatlarining balanslilikiga ta'sir ko'rsatuvchi normativ-huquqiy hujjatlarni moliyaviy hamda iqtisodiy ekspertizadan o'tkazadi;
o'z vakolatiga kiradigan masalalarga doir normativ-huquqiy hujjatlar qabul qiladi.
O'zbekiston Respublikasi Moliya vazirligi qonunchilikka muvofiq budjet sohasida boshqa vakolatlarni ham amalga oshirishi mumkin.

30-modda. Hududiy moliya organlarining budjet sohasidagi vakolatlari

Hududiy moliya organlari:

Qoraqalpog'iston Respublikasi budjeti, viloyatlar va Toshkent shahar mahalliy budjetlari, tumanlar va shaharlar budjetlari loyihalarini tayyorlaydi hamda ularni tegishincha Qoraqalpog'iston Respublikasi Vazirlar Kengashiga, viloyatlar va Toshkent shahar, tumanlar va shaharlar hokimliklariga ko'rib chiqish uchun kiritadi;

solliqlar va boshqa majburiy to'lovlarni ularning manbalari kesimida to'liq va o'z vaqtida tushishi ustidan monitoringni amalga oshiradi;

tegishli budjetning ijro etilishi jarayonida unga tushumlarni ko'paytirish bo'yicha qo'shimcha zaxiralarni aniqlaydi;

budjet tashkilotlariga va budjet mablag'lari oluvchilarga ular uchun nazarda tutilgan budjetdan ajratiladigan mablag'lar hajmlarini yetkazadi;

budjet tashkilotlarining xarajatlar smetalari va shtat jadvallarini hamda budjet mablag'lari oluvchilarning xarajatlar smetalari, shuningdek ularga kiritilgan o'zgartirishlarni ro'yxatdan o'tkazadi;

ushbu Kodeksning 146 — 148-moddalarida nazarda tutilgan tartibda tegishli budjetlar parametrlariga moliya yili mobaynida o'zgartirishlar kiritadi;

tegishli budjetlarning mablag'laridan maqsadli foydalanilishi ustidan nazoratni amalga oshiradi;

yuqori turuvchi moliya organlariga hamda Qoraqalpog'iston Respublikasi Vazirlar Kengashiga, viloyatlar va Toshkent shahar, tumanlar va shaharlar hokimliklariga tegishli budjetning ijrosi to'g'risida har choraklik hisobotlarni taqdim etadi;

budjet tashkilotlari va budjet mablag'lari oluvchilar xarajatlarini maqbullashtirishni amalga oshiradi;

tegishli budjetlar ijrosining budjet hisobini yuritadi va budjet hisobotini qabul qiladi;

mahalliy davlat hokimiyati organlarining tegishli budjetlar daromadlari va xarajatlari balanslilikiga ta'sir ko'rsatuvchi normativ-huquqiy hujjatlarini moliyaviy va iqtisodiy ekspertizadan o'tkazadi.

Qoraqalpog‘iston Respublikasi Moliya vazirligi, viloyatlar va Toshkent shahar hokimliklari moliya boshqarmalari ushbu moddaning **birinchi qismida** ko‘rsatilgan vakolatlar bilan bir qatorda:

Davlat budjeti daromadlari prognozini davlat soliq xizmati organlari va bojxona organlariga har chorakda tegishli ma‘muriy-hududiy birliklar bo‘yicha yetkazadi;

budjet ssudalarini beradi.

Hududiy moliya organlari qonunchilikka muvofiq budjet sohasida boshqa vakolatlarni ham amalga oshirishi mumkin.

31-modda. Budjet mablag‘larini taqsimlovchilarning budjet sohasidagi vakolatlari

Budjet mablag‘larini taqsimlovchilar:

budjetdan ajratiladigan mablag‘larni olish uchun budjet so‘rovlarini O‘zbekiston Respublikasi Moliya vazirligiga taqdim etadi;

budjet buyurtmalarini tuzish uchun ko‘rsatkichlarni va materiallarni o‘z tasarrufidagi tashkilotlarga yetkazadi;

xarajatlar smetalari va shtat jadvallarini tuzish uchun o‘z tasarrufidagi tashkilotlarga ularning tegishli moliya yiliga budjetdan ajratiladigan mablag‘lari hajmlarini yetkazadi;

o‘z tasarrufidagi tashkilotlarning xarajatlar smetalari va shtat jadvallarini, shuningdek ularga kiritilgan o‘zgartirishlarni ro‘yxatdan o‘tkazadi;

tasdiqlangan xarajatlar smetalarini va jamlanma xarajatlar smetalarini, shtat jadvallarini, shuningdek ularga kiritilgan o‘zgartirishlarni O‘zbekiston Respublikasi Moliya vazirligiga ro‘yxatdan o‘tkazish uchun taqdim etadi;

xarajatlar smetalari va shtat jadvallaridagi o‘zgartirishlar to‘g‘risida o‘z tasarrufidagi tashkilotlarni xabardor qiladi;

o‘z tasarrufidagi tashkilotlarda budjet hisobi yuritilishini tashkil etish va nazorat qilishni ta‘minlaydi;

o‘z tasarrufidagi tashkilotlardan moliyaviy hisobotlarni qabul qiladi;

O‘zbekiston Respublikasi Moliya vazirligiga tegishli davr uchun jamlanma moliyaviy hisobotlar taqdim etadi.

Budjet mablag‘larini taqsimlovchilar qonunchilikka muvofiq budjet sohasida boshqa vakolatlarni ham amalga oshirishi mumkin.

32-modda. Budjet tashkilotlarining va budjet mablag‘lari oluvchilarning budjet sohasidagi vakolatlari

Budjet tashkilotlari va budjet mablag‘lari oluvchilar:

budjet buyurtmasini budjet mablag‘larini taqsimlovchiga, budjet mablag‘larini taqsimlovchi bo‘lmaganda esa, tegishli hududiy moliya organiga ushbu Kodeksning **89-moddasida** belgilangan tartibga muvofiq kiritadi;

xarajatlar smetalarini tasdiqlaydi hamda ularni budjet mablag‘larini taqsimlovchiga, budjet mablag‘larini taqsimlovchi bo‘lmaganda esa, tegishli hududiy moliya organiga budjetdan ajratiladigan mablag‘lar doirasida ro‘yxatdan o‘tkazish uchun kiritadi;

xarajatlar smetalarida nazarda tutilgan budjetdan ajratiladigan mablag‘larni mo‘ljallangan maqsadga muvofiq tasarruf etadi;

budjetdan ajratiladigan mablag‘lar doirasida tovarlar (ishlar, xizmatlar) yetkazib beruvchilar bilan shartnomalar tuzadi;

ushbu Kodeksning **150-moddasida** belgilangan tartibda xarajatlar smetalariga o‘zgartirishlar kiritadi;

tegishli davr uchun moliyaviy hisobotlarni budjet mablag‘larini taqsimlovchiga, budjet mablag‘larini taqsimlovchi bo‘lmaganda esa, tegishli hududiy moliya organiga taqdim etadi.

Budjet tashkilotlari ushbu moddaning **birinchi qismida** ko‘rsatilgan vakolatlar bilan bir qatorda, shuningdek:

shtat jadvallarini tasdiqlaydi va ularni budget mablag'larini taqsimlovchiga, budget mablag'larini taqsimlovchi bo'lmaganda esa, tegishli hududiy moliya organiga budgetdan ajratiladigan mablag'lar doirasida ro'yxatdan o'tkazish uchun kiritadi;

ushbu Kodeksning 150-moddasida belgilangan tartibda shtat jadvallariga o'zgartirishlar kiritadi;

muddati o'tgan debitorlik va kreditorlik qarzlarga yo'l qo'ymaslik maqsadida tegishli hujjatlarni sudlarga, g'aznachilik bo'linmalariga o'z vaqtida taqdim etadi, shuningdek shartnomaviy majburiyatlarning bajarilishini ta'minlaydi;

budget hisobini yuritadi va moliyaviy hisobotlarni tuzadi;

budget tashkilotlarining budgetdan tashqari jamg'armalarini shakllantiradi va ulardan foydalanadi.

Budget tashkilotlari va budget mablag'lari oluvchilar qonunchilikka muvofiq budget sohasida boshqa vakolatlarni ham amalga oshirishi mumkin.

33-modda. Davlat maqsadli jamg'armalarini taqsimlovchi organlarning budget sohasidagi vakolatlari

Davlat maqsadli jamg'armalarini taqsimlovchi organlar:

davlat maqsadli jamg'armalari budgetlarining loyihalarini tayyorlaydi va O'zbekiston Respublikasi Moliya vazirligiga kiritadi;

davlat maqsadli jamg'armalarining mablag'lari bo'yicha xarajatlar smetalarini, shuningdek ularga kiritilgan o'zgartirishlarni ro'yxatdan o'tkazadi;

davlat maqsadli jamg'armalarining budgetlari daromadlari prognozini davlat soliq xizmati organlari va bojxona organlariga yilning har choragida yetkazadi;

ushbu Kodeksning 149-moddasida nazarda tutilgan tartibda davlat maqsadli jamg'armalari budgetlariga o'zgartirishlar kiritish bo'yicha takliflar tayyorlaydi va O'zbekiston Respublikasi Vazirlar Mahkamasiga kiritadi;

davlat maqsadli jamg'armalariga majburiy to'lovlar va boshqa tushumlar to'liq hamda o'z vaqtida tushishi ustidan monitoringni amalga oshiradi;

davlat maqsadli jamg'armalari budgetlarining tegishli davrdagi ijrosi to'g'risidagi hisobotlarni O'zbekiston Respublikasi Moliya vazirligiga taqdim etadi;

davlat maqsadli jamg'armalari mablag'laridan maqsadli foydalanilishi ustidan nazoratni amalga oshiradi;

davlat maqsadli jamg'armalari budgetlarini ijro etish jarayonida tushumlarni ko'paytirish bo'yicha qo'shimcha zaxiralarni aniqlaydi;

davlat maqsadli jamg'armalarining xarajatlari maqbullashtirilishini amalga oshiradi;

davlat maqsadli jamg'armalarining Yagona g'azna hisobvarag'i va boshqa bank hisobvaraqlaridagi mablag'larini boshqaradi;

davlat maqsadli jamg'armalari budgetlari ijrosining budget hisobini yuritadi;

davlat maqsadli jamg'armalari budgetlarining daromadlari va xarajatlari balanslilikiga ta'sir ko'rsatuvchi normativ-huquqiy hujjatlarni moliyaviy va iqtisodiy ekspertizadan o'tkazadi.

Davlat maqsadli jamg'armalarini taqsimlovchi organlar qonunchilikka muvofiq budget sohasida boshqa vakolatlarni ham amalga oshirishi mumkin.

II bo'lim.

Budget tizimi budgetlari

5-bob. Davlat budjeti

34-modda. Davlat budjeti tuzilmasi

Davlat budjeti quyidagi darajadagi budgetlardan iborat:

O'zbekiston Respublikasining respublika budjeti;

Qoraqalpog'iston Respublikasi budjeti, viloyatlar va Toshkent shahar mahalliy budjetlari.

35-modda. Qoraqalpog'iston Respublikasi budjetining, viloyatlar va Toshkent shahar mahalliy budjetlarining tuzilmasi

Qoraqalpog‘iston Respublikasi budjeti tuzilmasiga Qoraqalpog‘iston Respublikasining respublika budjeti, Qoraqalpog‘iston Respublikasi tumanlari va shaharlarining budjetlari kiradi.

Viloyatlar mahalliy budjetlari tuzilmasiga viloyat budjeti, tegishli viloyatlar tumanlari va shaharlarining budjetlari kiradi.

Toshkent shahar mahalliy budjeti tuzilmasiga shahar budjeti va shahar tarkibiga kiruvchi tumanlarning budjetlari kiradi.

6-bob. Davlat maqsadli jamg‘armalari va budjet tashkilotlarining budjetdan tashqari jamg‘armalari

36-modda. Davlat maqsadli jamg‘armalari

Mablag‘lari soliqlar, majburiy to‘lovlar va jarimalar, homiylik mablag‘lari hamda O‘zbekiston Respublikasi Prezidentining va O‘zbekiston Respublikasi Vazirlar Mahkamasining qarorlari bilan belgilangan boshqa daromadlardan, shuningdek budjet transfertlari va subsidiyalaridan shakllantiriladigan davlat maqsadli jamg‘armalari davlat funksiyalarini amalga oshirish uchun tashkil etiladi.

Davlat maqsadli jamg‘armalari O‘zbekiston Respublikasi Prezidentining qarori bilan tashkil etiladi.

Davlat maqsadli jamg‘armalari yuridik shaxs shaklida yoki yuridik shaxs tashkil etmasdan shu jumladan vazirliklar va idoralar huzurida tuzilishi mumkin.

44-modda. Budjet tashkilotlarining budjetdan tashqari jamg‘armalari

Budjet tashkilotlarining budjetdan tashqari jamg‘armalari quyidagilardir:

Budjet tashkilotining rivojlantirish jamg‘armasi;

Tibbiyot tashkilotlarining moddiy rag‘batlantirish va rivojlantirish jamg‘armasi;

vazirliklar va idoralarning budjetdan tashqari jamg‘armalari;

budjet tashkilotlarining undiriladigan to‘lovlar hisobiga shakllantiriladigan budjetdan tashqari mablag‘lari.

III bo‘lim.

O‘zbekiston Respublikasining konsolidatsiyalashgan budjeti. O‘zbekiston Respublikasining tiklanish va taraqqiyot jamg‘armasi

7-bob. O‘zbekiston Respublikasining konsolidatsiyalashgan budjeti

45-modda. O‘zbekiston Respublikasining konsolidatsiyalashgan budjetini tuzish maqsadlari

O‘zbekiston Respublikasining konsolidatsiyalashgan budjeti O‘zbekiston Respublikasi Moliya vazirligi tomonidan moliya yili yakunlari bo‘yicha tahliliy maqsadlar uchun hamda budjet tizimi budjetlarining barcha tushumlari va xarajatlarini hamda O‘zbekiston Respublikasi Tiklanish va taraqqiyot jamg‘armasi mablag‘larini, ular o‘rtasidagi transfertlarni hisobga olmagan holda hisobga olib borish uchun tuziladi.

46-modda. O‘zbekiston Respublikasining konsolidatsiyalashgan budjeti tarkibi

O‘zbekiston Respublikasining konsolidatsiyalashgan budjeti tarkibiga quyidagilar kiradi:

Davlat budjeti;

davlat maqsadli jamg‘armalarining budjetlari;

budjet tashkilotlarining budjetdan tashqari jamg‘armalari;

O‘zbekiston Respublikasi Tiklanish va taraqqiyot jamg‘armasi mablag‘lari.

O‘zbekiston Respublikasining konsolidatsiyalashgan budjeti mablag‘lari hisobidan shakllantiriladigan, biroq uning tarkibiga kirmaydigan jamg‘armalarni tashkil etishga yo‘l qo‘yilmaydi.

8-bob. O‘zbekiston Respublikasining Tiklanish va taraqqiyot jamg‘armasi

47-modda. Umumiy qoidalar

O'zbekiston Respublikasining Tiklanish va taraqqiyot jamg'armasi O'zbekiston Respublikasi Vazirlar Mahkamasi huzuridagi moliyaviy muassasadir va u ustuvor investitsiya loyihalarini hamda iqtisodiyotning bazaviy tarmoqlarini modernizatsiya qilish va texnik jihatdan qayta jihozlashga, mamlakatni muttasil, barqaror va mutanosib ravishda ijtimoiy-iqtisodiy rivojlantirishga erishilishiga, shuningdek samarali tarkibiy va investitsiya siyosati amalga oshirilishiga doir loyihalarni moliyalashtirish uchun ushbu Kodeksda belgilangan mablag'larni jamlaydi.

O'zbekiston Respublikasining Tiklanish va taraqqiyot jamg'armasini boshqarish Kengashi O'zbekiston Respublikasi Tiklanish va taraqqiyot jamg'armasining yuqori boshqaruv organi bo'lib, uning tarkibi O'zbekiston Respublikasi Prezidentining qarori bilan belgilanadi.

O'zbekiston Respublikasi Tiklanish va taraqqiyot jamg'armasining ijro etuvchi direksiyasi O'zbekiston Respublikasi Tiklanish va taraqqiyot jamg'armasining ijro etuvchi organi va mablag'larini taqsimlovchidir.

O'zbekiston Respublikasi Tiklanish va taraqqiyot jamg'armasining ijro etuvchi direksiyasi O'zbekiston Respublikasi Hisob palatasi va O'zbekiston Respublikasi Moliya vazirligiga:

har yili 1-iyulgacha O'zbekiston Respublikasi Tiklanish va taraqqiyot jamg'armasining kelgusi yil uchun daromadlari va xarajatlari loyihasini;

yilning har choragida hisobot choragidan keyingi oyning 25-kunigacha O'zbekiston Respublikasi Tiklanish va taraqqiyot jamg'armasi daromadlari va xarajatlarining ijrosi to'g'risidagi hisobotni taqdim etadi.

48-modda. O'zbekiston Respublikasi Tiklanish va taraqqiyot jamg'armasining daromadlari

O'zbekiston Respublikasi Tiklanish va taraqqiyot jamg'armasining daromadlari:

asosiy makroiqtisodiy ko'rsatkichlar prognozi va Davlat budjeti parametrlarini tasdiqlashda O'zbekiston Respublikasi Prezidenti qarorlari bilan strategik resurslarga belgilanadigan chegara narxidan jahon narxining oshishi natijasida tushadigan tushumlar;

O'zbekiston Respublikasi Tiklanish va taraqqiyot jamg'armasining aktivlarini boshqarishdan, shu jumladan O'zbekiston Respublikasining Tiklanish va taraqqiyot jamg'armasi mablag'larining bo'sh turgan qoldiqlarini joylashtirishdan olinadigan daromadlar;

qonunchilikka muvofiq boshqa manbalar hisobidan shakllantiriladi.

O'zbekiston Respublikasi Tiklanish va taraqqiyot jamg'armasining mablag'lari o'zining O'zbekiston Respublikasi Markaziy bankida ochilgan hisobvaraqlarida chet el valyutasida shakllantiriladi.

O'zbekiston Respublikasi Markaziy banki O'zbekiston Respublikasi Tiklanish va taraqqiyot jamg'armasining hisobvaraqlariga tushadigan milliy valyutadagi mablag'larning O'zbekiston Respublikasi Markaziy bankining mablag'lar tushgan sanadagi almashuv kursi bo'yicha chet el valyutasiga konvertatsiyasini amalga oshirib, ularni keyinchalik mazkur jamg'armaning valyuta hisobvarag'iga kiritadi.

49-modda. O'zbekiston Respublikasi Tiklanish va taraqqiyot jamg'armasining mablag'laridan foydalanish yo'nalishlari

O'zbekiston Respublikasi Tiklanish va taraqqiyot jamg'armasining mablag'laridan:

rivojlanish davlat dasturlariga kiritilgan investitsiya loyihalarini moliyalashtirish;

yangi sanoat ishlab chiqarishlarini bundan buyon joylashtirish uchun ishlab chiqarish infratuzilmasini rivojlantirish va rekonstruksiya qilish loyihalarini moliyalashtirish uchun imtiyozli kreditlar berish;

yangidan tashkil etilayotgan moliyaviy institutlarning hamda iqtisodiyotning bazaviy tarmoqlaridagi chet el investitsiyalari ishtirokidagi strategik ahamiyatga molik korxonalarning ustav kapitaliga investitsiya kiritish;

davlat tomonidan tashqi mablag'larni jalb qilish bo'yicha xalqaro moliya institutlari va chet ellik kreditorlar oldidagi majburiyatlarni muddatidan oldin to'lash;

O'zbekiston Respublikasining Prezidenti yoki O'zbekiston Respublikasi Vazirlar Mahkamasi tomonidan tasdiqlangan modernizatsiya qilish, texnik va texnologik jihatdan qayta jihozlash dasturlari doirasida tijorat banklari uchun chet el valyutasida ochiladigan kredit liniyalari orqali investitsiya loyihalarini jadal moliyalashtirish va amalga oshirish;

grant asosida yoki foizsiz kreditlar berish yo'li bilan ayrim loyihalarning dastlabki yoki uzil-kesil texnik-iqtisodiy asoslarini ishlab chiqishni moliyalashtirish;

tasdiqlangan davlat dasturlariga muvofiq yangi zamonaviy xorijiy texnologiyalar, texnika va asbob-uskunalar, strategik ahamiyatga molik boshqa tovarlar xarid qilish uchun imtiyozli kreditlar berish;

ijtimoiy jihatdan ahamiyatga molik milliy davlat dasturlarini hamda ishlab chiqarish va noishlab chiqarish infratuzilmasini shakllantirishga doir loyihalarni grant asosida moliyalashtirish;

qarz oluvchi korxonalarining investitsiya dasturlarini (biznes-rejalarini), shu jumladan ishlab chiqarishni texnik jihatdan qayta jihozlash, ishlab chiqarish quvvatlarining ishlatilishini ko'paytirish, raqobatbardosh mahsulot ishlab chiqarish va uni eksport qilish hajmlarini oshirish, qo'shilgan qiymat o'sishini ta'minlashga imkon beradigan investitsiya dasturlarini (biznes-rejalarini) tijorat banklari bilan birgalikda moliyalashtirish;

O'zbekiston Respublikasi Tiklanish va taraqqiyot jamg'armasining ijro etuvchi devonini saqlab turish hamda uni boshqarish bilan bog'liq xarajatlarni qoplash uchun foydalaniladi.

IV bo'lim.

Budjet tizimi budjetlarining daromadlari

9-bob. Davlat budjeti daromadlari

50-modda. Davlat budjeti daromadlarini shakllantirish

Davlat budjeti daromadlari:

solliqlar va boshqa majburiy to'lovlar;

davlat aktivlarini joylashtirish, foydalanishga berish va sotishdan olingan daromadlar;

meros, hadya huquqi bo'yicha davlat mulkiga o'tgan pul mablag'lari;

yuridik va jismoniy shaxslardan, shuningdek chet davlatlardan tushadigan qaytarilmaydigan pul tushumlari;

rezident-yuridik shaxslarga berilgan budjet ssudalari, kredit liniyalari va chet davlatlarga ajratilgan kreditlar mablag'larini qaytarish hisobiga to'lovlar, shuningdek ular bo'yicha foizli tushumlar;

qonunchilikka muvofiq boshqa daromadlar hisobidan shakllantiriladi.

51-modda. O'zbekiston Respublikasining respublika budjeti daromadlarini shakllantirish

O'zbekiston Respublikasining respublika budjeti daromadlari:

1) belgilangan normativlarga muvofiq:

foйда solig'i;

jismoniy shaxslardan olinadigan daromad solig'i;

aksiz solig'i;

yer qa'ridan foydalanganlik uchun soliq (bundan qurilish materiallari bo'yicha yer qa'ridan foydalanganlik uchun soliq mustasno);

2) bojxona bojlari;

3) qo'shilgan qiymat solig'i;

4) boshqa daromadlar hisobidan shakllantiriladi. Boshqa daromadlar jumlasiga qonunchilikka muvofiq O'zbekiston Respublikasining respublika budjetiga yo'naltiriladigan davlat bojlari, yig'imlar, tovon pullari, kompensatsiya to'lovlari, jarima sanksiyalari va davlat daromadiga o'tkazilgan mol-mulkni realizatsiya qilishdan tushgan tushumlar, belgilangan normativlar bo'yicha davlat aktivlarini joylashtirishdan va foydalanishga berishdan olingan daromadlar, meros, hadya huquqi bo'yicha davlat mulkiga o'tkazilgan pul mablag'lari, yuridik va jismoniy shaxslardan, shuningdek chet davlatlardan tushgan qaytarilmaydigan pul tushumlari, rezident bo'lgan yuridik

shaxslarga berilgan budget ssudalarini, chet davlatlarga berilgan kreditlarni to'lash hisobidan to'lovlar, aksiyalarning davlat ulushi (payi) bo'yicha dividendlar (daromadlar), bundan mahalliy davlat hokimiyati organlarining ulushi bo'yicha dividendlar (daromadlar) mustasno, mahsulot taqsimotiga oid bitimlar bo'yicha foyda keltiradigan mahsulotdagi davlat ulushi, O'zbekiston Respublikasi Markaziy bankining foydasi va boshqa daromadlar kiradi.

52-modda. Qoraqalpog'iston Respublikasi budgetining, viloyatlar va Toshkent shahar mahalliy budgetlarining daromadlarini shakllantirish

Qoraqalpog'iston Respublikasi budgetining, viloyatlar va Toshkent shahar mahalliy budgetlarining daromadlari:

- 1) belgilangan normativlarga muvofiq:
foyda solig'i;
jismoniy shaxslardan olinadigan daromad solig'i;
aksiz solig'i;
yer qa'ridan foydalanganlik uchun soliq (bundan qurilish materiallari bo'yicha yer qa'ridan foydalanganlik uchun soliq mustasno).
- 2) suv resurslaridan foydalanganlik uchun soliq;
- 3) mol-mulk solig'i;
- 4) yer solig'i;
- 5) qurilish materiallari bo'yicha yer qa'ridan foydalanganlik uchun soliq;
- 6) aylanmadan olinadigan soliq;
- 7) yuridik va jismoniy shaxslardan, shuningdek chet davlatlardan tushgan qaytarilmaydigan pul tushumlari;

8) avtotransport vositalarini sotib olganlik va (yoki) O'zbekiston Respublikasi hududiga vaqtinchalik olib kirganlik uchun yig'im;

9) boshqa daromadlar hisobidan shakllantiriladi. Boshqa daromadlarga qonunchilikka muvofiq Qoraqalpog'iston Respublikasi budgetiga, viloyatlar va Toshkent shahar mahalliy budgetlariga yo'naltiriladigan davlat daromadiga o'tkazilgan mol-mulkni realizatsiya qilishdan tushgan tushumlar, belgilangan normativlar bo'yicha davlat aktivlarini joylashtirishdan, foydalanishga berishdan va sotishdan olingan daromadlar, davlat bojlari, yig'imlar, tovon pullari va jarima sanksiyalari, egasiz mol-mulkni, meros huquqi bo'yicha davlat ixtiyoriga o'tgan mol-mulkni, huquq bo'yicha davlat daromadiga o'tkazilishi lozim bo'lgan xazinalarni realizatsiya qilishdan tushgan tushumlar mahalliy davlat hokimiyati organlarining ulushi bo'yicha dividendlar (daromadlar) va qonunchilikka muvofiq boshqa daromadlar kiradi.

O'zbekiston Respublikasining respublika budgetidan ajratiladigan budgetlararo transfertlar Qoraqalpog'iston Respublikasi respublika budgetining, viloyatlar viloyat budgetlarining va Toshkent shahri shahar budgetining daromadlari hisoblanadi.

O'zbekiston Respublikasining respublika budgetiga tushadigan ayrim soliqlar va boshqa daromadlar Qoraqalpog'iston Respublikasining respublika budgetiga, viloyatlarning viloyat budgetlariga, Toshkent shahrining shahar budgetiga qonunchilikda belgilangan miqdorlarda va tartibda taqsimlanishi mumkin.

Soliqlar va boshqa daromadlar belgilangan normativlarga muvofiq Qoraqalpog'iston Respublikasining respublika budgeti, viloyatlarning viloyat budgetlari, Toshkent shahrining shahar budgeti hamda tumanlar va shaharlar budgetlari o'rtasida qayta taqsimlanishi mumkin.

11-bob. Budget tashkilotlarining budgetdan tashqari jamg'armalari daromadlari

60-modda. Budget tashkilotining rivojlantirish jamg'armasi daromadlarini shakllantirish

Budget tashkilotining rivojlantirish jamg'armasi daromadlari:

hisobot choragining so'nggi ish kuni oxirida xarajatlar smetasi bo'yicha tejalgan mablag'lar, kapital qo'yilmalarni moliyalashtirish uchun nazarda tutilgan mablag'lar bundan mustasno;

faoliyat ixtisosligi bo'yicha tovarlarni (ishlarni, xizmatlarni) realizatsiya qilishdan olingan daromadlar;

budjet tashkiloti balansida turgan mol-mulkni ijaraga berishdan olingan mablag'larning bir qismi;

belgilangan tartibda budjet tashkilotlari tasarrufida qoldiriladigan mablag'lar;

homiyligidan olingan mablag'lar hisobidan shakllantiriladi.

Budjet tashkilotining rivojlantirish jamg'armasiga budjet tashkilotlarining tovarlarni (ishlarni, xizmatlarni) realizatsiya qilishdan olingan daromadlari tovarlarni (ishlarni, xizmatlarni) realizatsiya qilishdan tushgan tushumlar va ularni ishlab chiqarish bo'yicha xarajatlar o'rtasidagi ijobiy farq sifatida aniqlanadi.

61-modda. Tibbiyot tashkilotlarining moddiy rag'batlantirish va rivojlantirish jamg'armasi daromadlarini shakllantirish

Tibbiyot tashkilotlarining moddiy rag'batlantirish va rivojlantirish jamg'armasi daromadlari:

tibbiyot tashkilotiga ajratiladigan budjet mablag'lari umumiy hajmining 5 foizigacha bo'lgan miqdorda budjetdan ajratiladigan mablag'lar;

faoliyat ixtisosligi bo'yicha tovarlarni (ishlarni, xizmatlarni) realizatsiya qilishdan olingan daromadlar;

hisobot choragining so'nggi ish kuni oxirida xarajatlar smetasi bo'yicha tejalgan mablag'lar, kapital qo'yilmalarni moliyalashtirish uchun nazarda tutilgan mablag'lar bundan mustasno;

tibbiyot tashkiloti balansida turgan mol-mulkni ijaraga berishdan olingan mablag'larning bir qismi;

belgilangan tartibda budjet tashkilotlari tasarrufida qoldiriladigan mablag'lar;

homiyligidan olingan mablag'lar hisobidan shakllantiriladi.

Tibbiyot tashkilotlarining moddiy rag'batlantirish va rivojlantirish jamg'armasiga tibbiyot tashkilotlarining tovarlarni (ishlarni, xizmatlarni) realizatsiya qilishdan olingan daromadlari tovarlarni (ishlarni, xizmatlarni) realizatsiya qilishdan tushgan tushumlar va ularni ishlab chiqarish bo'yicha xarajatlar o'rtasidagi ijobiy farq sifatida aniqlanadi.

62-modda. Vazirliklar va idoralarning budjetdan tashqari jamg'armalari daromadlarini shakllantirish

Vazirliklar va idoralarning budjetdan tashqari jamg'armalari daromadlari belgilangan tartibda davlat bojlari, yig'imlar va soliq bo'lmagan to'lovlar, ma'muriy jarimalar hamda moliyaviy sanksiyalardan ajratmalar hisobidan shakllantiriladi.

63-modda. Budjet tashkilotlarining budjetdan tashqari mablag'larini undiriladigan to'lovlar hisobidan shakllantirish

Budjet tashkilotlari tomonidan budjetdan tashqari mablag'lar:

o'quvchilar va tarbiyalanuvchilar davlat maktabgacha ta'lim tashkilotlarida, umumta'lim maktablarining kuni uzaytirilgan guruhlarida, maktab-internatlarda, olimpiya zaxiralari kollejlarda va boshqa davlat ta'lim tashkilotlarida saqlab turilganligi uchun;

o'quvchilar bolalar musiqa va san'at maktablari hamda maktabdan tashqari davlat ta'lim tashkilotlarida ta'lim olganligi uchun;

oliy va o'rta maxsus, professional davlat ta'lim tashkilotlarida ta'lim olganlik uchun;

statsionar davolash-profilaktika muassasalarida davolanayotganlar tarkibi ovqatlanishi uchun;

qonunchilikka muvofiq boshqa turdagi undiriladigan to'lovlar hisobidan shakllantiriladi.

Undiriladigan to'lovlarning miqdorlari, ularni kiritish va ulardan foydalanish tartibi, shuningdek undiriladigan to'lovlar bo'yicha imtiyozlar qonunchilik bilan belgilanadi.

12-bob. Beg'araz yordam

64-modda. Beg‘araz yordam turlari

Beg‘araz yordam insonparvarlik yordami va texnik ko‘maklashish mablag‘lari tarzida beriladi.

Insonparvarlik yordami aholining ijtimoiy nochor guruhlariga tibbiy va ijtimoiy yordam ko‘rsatish, ijtimoiy soha muassasalarini qo‘llab-quvvatlash, tabiiy ofatlar, avariya va halokatlar, epidemiyalar, epizootiyalar va boshqa favqulodda vaziyatlarning oldini olish hamda ularning oqibatlarini tugatish uchun dori vositalari va tibbiy buyumlar, oziq-ovqat, xalq iste‘moli tovarlari, boshqa tovarlar, shu jumladan asbob-uskunalar, transport va texnika, shuningdek ixtiyoriy xayriyalar, ishlarni bajarish va xizmatlar ko‘rsatish, shu jumladan insonparvarlik yordami yuklarini tashish, kuzatib borish va saqlash tarzida beriladi. Tamaki mahsulotlari, alkogol mahsulotlari, harbiy maqsad uchun mo‘ljallangan tovarlar, shuningdek olib kirilishi taqiqlangan tovarlar insonparvarlik yordami sirasiga kiritilishi mumkin emas.

Texnik ko‘maklashish mablag‘lari asbob-uskunalar va texnologiyalarni sotib olish, tajriba-konstruktorlik ishlarini, ilmiy yoki boshqa tadqiqotlarni o‘tkazish, xodimlarni davolash, o‘qitish, ularning malakasini oshirish va ularni qayta tayyorlash, maslahat xizmatlari ko‘rsatish hamda qonunchilikka muvofiq boshqa maqsadlar uchun natura ko‘rinishdagi va pul shaklidagi grantlar tarzida beriladi.

O‘zbekiston Respublikasi, O‘zbekiston Respublikasi Hukumati, nodavlat notijorat tashkilotlari, fuqarolarning o‘zini o‘zi boshqarish organlari, shuningdek faoliyati foyda olishga qaratilmagan yuridik va jismoniy shaxslar insonparvarlik yordami va texnik ko‘maklashish mablag‘larini oluvchilar bo‘lishi mumkin.

Insonparvarlik yordami va texnik ko‘maklashish mablag‘larini oluvchilar tegishli donorlar bilan kelishuvlar yoki qonunchilik asosida aniqlanadi.

O‘zbekiston Respublikasiga beg‘araz yordam doirasida kelgan tovarlardan tijorat maqsadlarida foydalanish taqiqlanadi.

Mablag‘lar, tovarlar, ishlar va xizmatlarning beg‘araz yordamga mansubligi O‘zbekiston Respublikasi Vazirlar Mahkamasi tomonidan belgilangan tartibda aniqlanadi.

65-modda. Insonparvarlik yordamini jalb etish

Insonparvarlik yordamini jalb etishga doir takliflar insonparvarlik yordami bo‘yicha hududiy va tarmoq komissiyalari tomonidan har yili 1-iyulga qadar O‘zbekiston Respublikasi Moliya vazirligiga yuboriladi.

O‘zbekiston Respublikasi Moliya vazirligi insonparvarlik yordami bo‘yicha hududiy va tarmoq komissiyalarining takliflari asosida kelgusi yilda insonparvarlik yordamini jalb etish uchun jamlanma buyurtmani 31-iyuldan kechiktirmay O‘zbekiston Respublikasi Vazirlar Mahkamasiga tasdiqlash uchun kiritadi.

Insonparvarlik yordamini jalb etish O‘zbekiston Respublikasi Vazirlar Mahkamasi tomonidan tasdiqlangan insonparvarlik yordamini jalb etishga doir jamlanma buyurtma asosida amalga oshiriladi.

66-modda. Texnik ko‘maklashish mablag‘larini jalb etish

Kelgusi yil uchun texnik ko‘maklashish bo‘yicha ustuvor loyihalarning ro‘yxati vazirliklar va idoralarning, Qoraqalpog‘iston Respublikasi Vazirlar Kengashining, viloyatlar va Toshkent shahar hokimliklarining (loyiha tashabbuskorlarining) takliflari asosida joriy yilning 31-mayiga qadar O‘zbekiston Respublikasi Iqtisodiyot vazirligi tomonidan tuziladi hamda O‘zbekiston Respublikasi Vazirlar Mahkamasiga tasdiqlash uchun kiritiladi.

Kelgusi yil uchun texnik ko‘maklashish mablag‘larini jalb qilishni donorlar bilan ishlab chiqish O‘zbekiston Respublikasi Vazirlar Mahkamasi tomonidan tasdiqlangan Texnik ko‘maklashish bo‘yicha ustuvor loyihalar ro‘yxati asosida amalga oshiriladi.

Texnik ko‘maklashish bo‘yicha ustuvor loyihalarning ushbu loyihalarni amalga oshirish uchun donorlar bilan ishlab chiqilgan ro‘yxati O‘zbekiston Respublikasi Vazirlar Mahkamasi tomonidan kelgusi yilning 10-fevraligacha tasdiqlanadi.

67-modda. Beg‘araz yordam oluvchilarning majburiyatlari

Beg‘araz yordam oluvchilar:

beg‘araz yordam loyihalari bo‘yicha donorlar bilan kelishuvlarni O‘zbekiston Respublikasi Vazirlar Mahkamasini hamda tegishli vazirliklar va idoralar bilan kelishib olishi hamda ularda nazarda tutilgan, o‘z zimmasiga olgan majburiyatlarini o‘z vaqtida bajarishi;

olingan beg‘araz yordamdan maqsadli va samarali foydalanilishini ta‘minlashi;

olingan beg‘araz yordamning hisob va hisobotlarda aks ettirilishini ta‘minlashi;

beg‘araz yordam doirasida kelgan tovarlarning bojxona rasmiylashtiruvini o‘z vaqtida amalga oshirishi;

beg‘araz yordam kelganligi va foydalanilganligi yuzasidan hisobot taqdim etishi shart.

Texnik ko‘maklashish mablag‘larini oluvchilar ushbu moddaning **birinchi qismida** ko‘rsatilgan majburiyatlar bilan bir qatorda, shuningdek:

texnik ko‘maklashish loyihasini amalga oshirish bo‘yicha tadbirlar rejasini va uni o‘zlashtirish jadvalini O‘zbekiston Respublikasi Vazirlar Mahkamasiga tasdiqlash uchun kiritishi;

texnik ko‘maklashish mablag‘lari kelib tushishi uchun vakolatli banklarda maxsus hisobvaraqlar ochishi;

texnik ko‘maklashish loyihasi amalga oshirilganligi to‘g‘risidagi yakuniy hisobotni O‘zbekiston Respublikasi Moliya vazirligiga taqdim etishi shart.

68-modda. O‘zbekiston Respublikasi tomonidan ko‘rsatiladigan beg‘araz yordam

O‘zbekiston Respublikasining beg‘araz yordam ko‘rsatishi to‘g‘risidagi qaror O‘zbekiston Respublikasi Prezidenti tomonidan qabul qilinadi.

O‘zbekiston Respublikasi nomidan beg‘araz yordam ko‘rsatgan vakolatli organ hisobot yilidan keyingi yilning 1-martigacha O‘zbekiston Respublikasi Moliya vazirligiga moliyaviy hisobotlar taqdim etadi.

V bo‘lim.

Budjet tizimi budjetlarining xarajatlari

13-bob. Davlat budjeti xarajatlari

69-modda. Davlat budjeti xarajatlarining tarkibi

Davlat budjetining xarajat qismi quyidagilardan iborat:

ijtimoiy soha va aholini ijtimoiy qo‘llab-quvvatlash xarajatlari;

nodavlat notijorat tashkilotlarini va fuqarolik jamiyatining boshqa institutlarini davlat tomonidan qo‘llab-quvvatlash xarajatlari;

iqtisodiyot xarajatlari;

markazlashtirilgan investitsiyalarni moliyalashtirish xarajatlari;

davlat hokimiyati va boshqaruvi organlarini, adliya va prokuratura organlarini saqlab turish xarajatlari;

sudlarni saqlab turish xarajatlari;

fuqarolarning o‘zini o‘zi boshqarish organlarini saqlab turish xarajatlari;

boshqa xarajatlar.

Davlat budjetining xarajat qismi tarkibida O‘zbekiston Respublikasi Vazirlar Mahkamasining, Qoraqalpog‘iston Respublikasi respublika budjetining, viloyatlar viloyat budjetlarining va Toshkent shahri shahar budjetining tumanlar va shaharlar budjetlarining zaxira jamg‘armalari hisobga olinadi.

70-modda. O‘zbekiston Respublikasi respublika budjetining xarajatlari

O‘zbekiston Respublikasining respublika budjetidan quyidagi xarajatlar amalga oshiriladi:

1) ijtimoiy soha va aholini ijtimoiy qo‘llab-quvvatlash xarajatlari, shu jumladan:

maktabgacha ta‘lim, umumiy o‘rta ta‘lim, o‘rta maxsus, professional ta‘lim, oliy ta‘lim, oliy ta‘limdan keyingi ta‘lim, maktabdan tashqari ta‘lim, kadrlarning malakasini oshirish va ularni qayta tayyorlash tashkilotlari, bolalar uylari, davlat ta‘lim tashkilotlarini axborot-uslubiy jihatdan

ta'minlash muassasalari, vazirliklar va idoralar tasarrufidagi davlat ta'lim tashkilotlari, boshqa yordamchi muassasalarni saqlab turish, shuningdek qonunchilikda O'zbekiston Respublikasining respublika budjetidan moliyalashtirilishi nazarda tutilgan ta'lim tizimi tadbirlarining xarajatlari;

respublika shoshilinch tibbiy yordam markazi, OITSga qarshi kurashish respublika markazi, Davlat sanitariya-epidemiologiya nazorati, karantin va o'ta xavfli infeksiyalar profilaktikasi, ilmiy-tadqiqot institutlari va davlat oliy ta'lim tashkilotlarining klinikalari, qon quyish xizmati va sud-tibbiyot ekspertizasi respublika muassasalari, respublika vazirliklari va idoralari tasarrufidagi boshqa davolash-profilaktika muassasalari hamda yordamchi tashkilotlarni saqlab turish, shuningdek qonunchilikda O'zbekiston Respublikasining respublika budjetidan moliyalashtirilishi nazarda tutilgan xizmatlar haqini to'lash xarajatlari;

qonunchilikka muvofiq ayrim toifadagi fuqarolarga tibbiy xizmatlar ko'rsatilganligi uchun respublika ixtisoslashtirilgan markazlari xarajatlarining o'rnini qoplash (subsidiyalar);

qabul qilingan davlat dasturlariga muvofiq fuqarolarning sog'lig'ini saqlash tadbirlarini amalga oshirish xarajatlari;

respublika vazirliklari va idoralari tasarrufidagi madaniyat, jismoniy tarbiya va sport muassasalarini saqlab turish, tele- va radiodasturlar yaratish hamda ularni tarqatishga doir xizmatlar ta'minoti va ularga haq to'lash, hukumatning alohida qarorlariga ko'ra ommaviy axborot vositalarini saqlab turish, kino- va videomahsulotlar yaratish, madaniy meros obyektlarida restavratsiya ishlarini bajarish, tasdiqlangan kalendar rejalarga muvofiq madaniyat va sportni rivojlantirish bo'yicha qonunchilikda O'zbekiston Respublikasining respublika budjetidan moliyalashtirilishi nazarda tutilgan maqsadli tadbirlar xarajatlari;

fundamental, amaliy tadqiqotlar va innovatsiya ishlarining davlat ilmiy-texnik dasturlari doirasida grantlar bo'yicha amalga oshiriladigan ilmiy-texnik loyihalar, noyob ilmiy obyektlarni va fanga xizmat ko'rsatuvchi muassasalarni saqlab turish, ilmiy loyihalar ekspertizasini o'tkazish hamda qonunchilikka muvofiq O'zbekiston Respublikasining respublika budjeti hisobidan amalga oshiriladigan fanga doir alohida tadbirlar xarajatlari;

davlat arxivlarini saqlab turish xarajatlari;

respublika vazirliklari va idoralari tasarrufidagi urush hamda mehnat faxriylari uchun pansionatlar va sanatoriylarni, aholini ijtimoiy muhofaza qilish muassasalarini saqlab turish, shuningdek qonunchilikda O'zbekiston Respublikasining respublika budjetidan moliyalashtirilishi nazarda tutilgan, aholini ijtimoiy muhofaza qilishga doir maqsadli tadbirlar xarajatlari;

davlat mukofotlari, davlat pul mukofotlari bilan taqdirlanganligi munosabati bilan bir yo'la beriladigan davlat pul mukofotlari va mukofotlarini to'lash xarajatlari;

bolalikdan nogironligi bo'lgan shaxslarga va bola tug'ilganda beriladigan nafaqalarni, qonunchilikda ayrim toifadagi shaxslarga belgilangan kompensatsiyalarni to'lash uchun vakolatli organga mablag'lar ajratish xarajatlari;

Chernobil AES halokati oqibatlarini tugatishda ishtirok etgan shaxslarni va radiatsiya-yadro obyektlarida harbiy xizmatni o'tagan pensiya yoshidagi shaxslarni ijtimoiy qo'llab-quvvatlash, ayrim toifadagi shaxslarga qonunchilikda belgilangan imtiyozlar va kompensatsiyalarni to'lash xarajatlari jamoat ishlarini moliyalashtirish;

2) davlat grantlari, subsidiyalar va ijtimoiy buyurtma shaklida nodavlat notijorat tashkilotlari va fuqarolik jamiyatining boshqa institutlari faoliyatini davlat tomonidan qo'llab-quvvatlash xarajatlari;

3) iqtisodiyot xarajatlari, shu jumladan:

agrosanoat majmui va oziq-ovqat xavfsizligi ta'minlanishi sohasidagi respublika nazorat organlarining xarajatlari, suv va o'rmon xo'jaligi xarajatlari, qishloq xo'jaligi ekinlari zararkunandalariga qarshi kurashish muassasalarining xizmatlariga va ularni saqlab turishga haq to'lash xarajatlari;

hosildorligi past yerlarda davlat ehtiyojlari uchun qishloq xo'jaligi mahsulotlarini yetishtiruvchi fermer xo'jaliklarini moliyaviy qo'llab-quvvatlash xarajatlari;

qishloq xo'jaligi tovar ishlab chiqaruvchilari tomonidan to'lanadigan yagona yer solig'i bo'yicha tushumlarga muvofiq budjetdan ajratiladigan mablag'lar va O'zbekiston Respublikasi

Vazirlar Mahkamasi huzuridagi Sug'oriladigan yerlarning meliorativ holatini yaxshilash jamg'armasining har yili tasdiqlanadigan asosiy parametrlari doirasida budjetdan ajratiladigan maqsadli mablag'lar;

qonunchilikda O'zbekiston Respublikasining respublika budjetidan moliyalashtirilishi nazarda tutilgan standartlashtirish va sertifikatlashtirish, topografiya-geodeziya, kartografiya va kadastr, shuningdek geologiya qidiruv ishlari, davlat shaharsozlik kadastrini yuritish xarajatlari, chegaradosh davlatlarga haq evaziga yerdan foydalanish to'lovi, gidrometeorologiya xizmati muassasalarini saqlab turish xarajatlari;

atrof muhit va landshaftning muhofaza qilinishini, biologik xilma-xillikning himoya qilinishini ta'minlash bilan bog'liq xarajatlar;

"Suv ta'minoti va kanalizatsiya tizimlarini rivojlantirish" jamg'armasi orqali ichimlik suvi bilan ta'minlash tizimini rivojlantirish bilan bog'liq xarajatlar.

4) respublika vazirliklari va idoralari buyurtmachi bo'lgan markazlashtirilgan investitsiyalarni moliyalashtirish xarajatlari;

5) davlat hokimiyati va boshqaruvi organlarini, adliya va prokuratura organlarini saqlab turish xarajatlari, shu jumladan:

O'zbekiston Respublikasi Oliy Majlisi palatalarini;

O'zbekiston Respublikasi Prezidenti Administratsiyasini;

O'zbekiston Respublikasi Vazirlar Mahkamasini;

O'zbekiston Respublikasi Konstitutsiyaviy sudini;

O'zbekiston Respublikasi Markaziy saylov komissiyasini;

O'zbekiston Respublikasi Oliy Majlisining Inson huquqlari bo'yicha vakili (ombudsman)

Devonini;

qonunchilikda O'zbekiston Respublikasining respublika budjeti mablag'laridan saqlab turilishi nazarda tutilgan davlat boshqaruvi organlarini;

O'zbekiston Respublikasining chet ellardagi muassasalarini saqlab turish xarajatlari; adliya va prokuratura organlarini.

6) sudlarni saqlab turish xarajatlari;

7) O'zbekiston Respublikasi Vazirlar Mahkamasining zaxira jamg'armasini shakllantirish xarajatlari;

8) boshqa xarajatlar:

siyosiy partiyalarga ularning ustavida belgilangan faoliyatini moliyalashtirish uchun ajratiladigan mablag'lar;

qonunchilikda belgilangan tartibda qo'shilgan qiymat solig'ining o'rnini qoplash;

O'zbekiston Respublikasi ishtirokchi bo'lgan xalqaro tashkilotlarga a'zolik badallarini to'lash va ularni moliyalashtirishda ishtirok etish xarajatlari;

davlat qarzi bo'yicha xizmat ko'rsatish va davlat kafolatini bajarish bilan bog'liq xarajatlar;

davlat buyurtmasi bo'yicha statistika ishlariga haq to'lash;

O'zbekiston Respublikasi Markaziy saylov komissiyasining saylovlar va referendumlarga tayyorgarlik ko'rish hamda ularni o'tkazish bo'yicha xarajatlari, shu jumladan okrug va uchastka saylov komissiyalarini, siyosiy partiyalarni moliyalashtirish;

davlat zaxiralari va strategik zaxiralarni vujudga keltirish, saqlab va yangilab turish bilan bog'liq xarajatlar;

mudofaaga, jamoat tartibi va xavfsizligini ta'minlashga, bojxona organlariga ajratiladigan mablag'lar, shu jumladan harbiy xizmatni, ichki ishlar organlarida, O'zbekiston Respublikasi Milliy gvardiyasida, bojxona organlarida xizmatni o'tagan shaxslar hamda ularning oilalariga pensiyalar va nafaqalar uchun xarajatlar, shuningdek qonunchilikka muvofiq faoliyati O'zbekiston Respublikasining respublika budjetidan moliyalashtiriladigan muassasalar, tashkilotlar va idoralarga ajratiladigan mablag'lar;

qonunchilikka muvofiq boshqa xarajatlar.

O'zbekiston Respublikasining respublika budjetidan:

Qoraqalpog‘iston Respublikasi budjetiga, viloyatlar va Toshkent shahar mahalliy budjetlariga subvensiyalar, o‘tkazib beriladigan daromadlar dotatsiyalar va maqsadli ijtimoiy transfertlar;

davlat maqsadli jamg‘armalariga budjet ssudalari va dotatsiyalar;

yuridik shaxslarga budjet ssudalari va kredit liniyalari hamda chet davlatlarga kreditlar belgilangan tartibda ajratilishi mumkin.

71-modda. Qoraqalpog‘iston Respublikasi respublika budjetining, viloyatlar viloyat budjetlarining va Toshkent shahri shahar budjetining xarajatlari

Qoraqalpog‘iston Respublikasining respublika budjeti, viloyatlarning viloyat budjetlari va Toshkent shahrining shahar budjetidan quyidagi xarajatlar amalga oshiriladi:

1) ijtimoiy soha va aholini ijtimoiy qo‘llab-quvvatlash xarajatlari, shu jumladan:

umumiy o‘rta ta‘lim, maktabdan tashqari ta‘lim, pedagog kadrlar malakasini oshirish va qayta tayyorlash, boshqa yordamchi va uslubiy ta‘lim muassasalarini saqlab turish xarajatlari;

bolalar uylari, davlat bolalar shaharchalarini saqlab turish, qonunchilikda Qoraqalpog‘iston Respublikasining respublika budjetidan, viloyatlarning viloyat budjetlari va Toshkent shahrining shahar budjetidan moliyalashtirilishi nazarda tutilgan ta‘lim tizimidagi yordamchi xizmatlar va maqsadli tadbirlar xarajatlari;

Respublika shoshilinch tibbiy yordam markazi filialini, ko‘p tarmoqli va ixtisoslashtirilgan tibbiyot markazlarini, ixtisoslashtirilgan kasalxonalar va dispanserlarni, tug‘ruqxonalar va akusherlik majmualarini, tibbiy tashxis qo‘yish markazlarini hamda hududiy sanitariya-epidemiologik osoyishtalik va jamoat salomatligi boshqarmalarini, qon quyish xizmati va sud-tibbiyot ekspertizasi muassasalarini, Salomatlik va tibbiyot statistikasi instituti filialini, hududiy sog‘liqni saqlashni boshqarish organlari tasarrufidagi boshqa davolash-profilaktika muassasalari va yordamchi tashkilotlarni, tibbiy-ijtimoiy ekspert komissiyalarini saqlab turish, shuningdek qonunchilikda Qoraqalpog‘iston Respublikasining respublika budjeti, viloyatlarning viloyat budjetlari va Toshkent shahrining shahar budjetidan moliyalashtirilishi nazarda tutilgan xizmatlarga haq to‘lash xarajatlari;

qabul qilingan davlat dasturlariga muvofiq fuqarolarning sog‘lig‘ini saqlash tadbirlarini amalga oshirish xarajatlari;

hududiy madaniyat, jismoniy tarbiya va sportni boshqarish organlari tasarrufidagi madaniyat, jismoniy tarbiya va sport muassasalarini saqlab turish, shuningdek madaniyat va sportni rivojlantirishga doir maqsadli tadbirlarni amalga oshirish xarajatlari;

Qoraqalpog‘iston Respublikasi Vazirlar Kengashi, viloyatlar va Toshkent shahar hokimliklari tasarrufidagi arxivlarni saqlab turish xarajatlari;

Qoraqalpog‘iston Respublikasi Vazirlar Kengashi, viloyatlar hamda Toshkent shahar hokimliklari tasarrufidagi keksalar va nogironligi bo‘lgan shaxslar uchun internat uylari, pansionatlari va sanatoriylarini, nogironligi bo‘lgan shaxslarni reabilitatsiya qilish markazlarini, boshqa muassasalarni saqlab turish xarajatlari, shuningdek aholini ijtimoiy muhofaza qilishga doir maqsadli tadbirlar xarajatlari;

shahar yo‘lovchilar transporti tashuvchilarining yo‘lovchilarni va bagajni cheklangan tariflar bo‘yicha tashish, shuningdek alohida toifadagi fuqarolarni imtiyozli tashish xizmatlarini ko‘rsatish bilan bog‘liq zararlarning o‘rnini qoplash xarajatlari;

kam ta‘minlangan oilalarga to‘lanadigan ijtimoiy nafaqalar, moddiy yordam hamda tabiiy ofatlardan jabrlangan oilalarga moddiy yordam.

2) iqtisodiyot xarajatlari, shu jumladan:

qishloq xo‘jaligi tashkilotlarini saqlab turish, shu jumladan hayvonlar kasalliklariga qarshi kurashuvchi muassasalar xizmatlariga haq to‘lash, yerlarni rekultivatsiya qilish ishlarini bajarish, shuningdek suv xo‘jaligi tashkilotlarini saqlab turish;

uy-joy-kommunal xo‘jaligi obyektlarida ta‘mirlash ishlarini olib borish;

suv yo‘llarining ayrim texnik uchastkalarini saqlab turish;

aholi punktlarini obodonlashtirish;

issiqlik energiyasini ishlab chiqaruvchilarning aholiga ko'rsatilgan issiqlik ta'minoti xizmatlari uchun pasaytirilgan tariflarni qo'llash natijasida yuzaga keladigan zararlarining o'rnini qoplash xarajatlari;

qonunchilikda nazarda tutilgan o'rmon xo'jaligini, o'simliklar karantinini saqlab turish xarajatlari;

3) Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari buyurtmachi bo'lgan markazlashtirilgan investitsiyalarni moliyalashtirish xarajatlari;

4) mahalliy davlat hokimiyati va boshqaruvi organlarini, shu jumladan:

Qoraqalpog'iston Respublikasi Jo'qorg'i Kengesini;

Qoraqalpog'iston Respublikasi Vazirlar Kengashi, Qoraqalpog'iston Respublikasi vazirliklari va idoralari, viloyatlar va Toshkent shahar hokimliklari, ularning boshqarmalari va bo'limlarini hamda Qoraqalpog'iston Respublikasining respublika budjeti, viloyatlarning viloyat budjetlari va Toshkent shahrining shahar budjeti mablag'lari hisobidan moliyalashtirilishi nazarda tutilgan davlat boshqaruvi organlarining boshqa hududiy bo'linmalarini saqlab turish xarajatlari;

5) Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining zaxira jamg'armalarini shakllantirish xarajatlari;

6) jamoat ehtiyojlari uchun yer uchastkalarining olib qo'yilishi munosabati bilan, shuningdek davlat organlarining yoki ushbu organlar mansabdor shaxslarining qonunga xilof harakatlari (harakatsizligi) natijasida yuridik va jismoniy shaxslarga yetkazilgan zararining o'rnini qoplash xarajatlari;

6¹) harbiy-ma'muriy sektorga yuklatilgan tadbirlarni va vazifalarni amalga oshirish va hal qilish xarajatlari.

6²) davlat grantlari, subsidiyalar va ijtimoiy buyurtma shaklida nodavlat notijorat tashkilotlari hamda fuqarolik jamiyatining boshqa institutlari faoliyatini davlat tomonidan qo'llab-quvvatlash xarajatlari;

7) Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining mablag'lari hisobidan moliyalashtiriladigan tashkilotlar va tadbirlarning xarajatlari.

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan tumanlar va shaharlar budjetlariga budjet ssudalari, dotatsiyalar, subvensiyalar o'tkazib beriladigan daromadlar va maqsadli ijtimoiy transfertlar ajratilishi mumkin.

72-modda. Tumanlar va shaharlar budjetlarining xarajatlari

Tumanlar va shaharlar budjetlaridan quyidagi xarajatlar amalga oshiriladi:

1) ijtimoiy soha va aholini ijtimoiy qo'llab-quvvatlash xarajatlari, shu jumladan:

tumanlar (shaharlar) xalq ta'limi bo'limlari va maktabgacha ta'lim bo'limlarini, shuningdek ular tasarrufidagi maktabgacha ta'lim tashkilotlarini, umumiy o'rta ta'lim, maktabdan tashqari ta'lim muassasalarini saqlab turish hamda qonunchilikda tumanlar va shaharlar budjetlaridan moliyalashtirilishi nazarda tutilgan ta'lim tizimidagi tadbirlar xarajatlari;

tuman tibbiyot birlashmalari, tuman markaziy poliklinikalari va koykasiz dispanserlar, tumanlar (shaharlar) tibbiyot birlashmalari tasarrufidagi davolash-profilaktika muassasalari, oilaviy poliklinikalar, qishloq vrachlik punktlarini, tuman (shahar) sanitariya-epidemiologik osoyishtalik va jamoat salomatligi bo'limlarini saqlab turish xarajatlari;

qabul qilingan davlat dasturlariga muvofiq fuqarolarning sog'lig'ini saqlash tadbirlarini amalga oshirish xarajatlari;

tumanlar (shaharlar) madaniyat bo'limlari tasarrufidagi madaniyat muassasalarini, tumanlar (shaharlar) jismoniy tarbiya va sport bo'limlari tasarrufidagi jismoniy tarbiya va sport muassasalarini saqlab turish, shuningdek madaniyatni, jismoniy tarbiya va sportni, bolalar musiqa va san'at maktablarini rivojlantirishga doir maqsadli tadbirlar xarajatlari;

uyda ijtimoiy yordam ko'rsatish, Chernobil AES halokati oqibatlarini tugatishda ishtirok etgan shaxslarni va radiatsiya-yadro obyektlarida harbiy xizmatni o'tagan pensiya yoshidagi shaxslarni ijtimoiy qo'llab-quvvatlash xarajatlari;

kam ta'minlangan oilalarga ijtimoiy nafaqalar, moddiy yordam, shuningdek tabiiy ofatlardan jabrlangan oilalarga moddiy yordam to'lash xarajatlari;

2) iqtisodiyot xarajatlari, shu jumladan:

tumanlar va shaharlar veterinariya va chorvachilikni rivojlantirish bo'limlari, laboratoriyalarni, "Suv yetkazib berish xizmati" davlat muassasalarini saqlab turish;

shaharlar va boshqa aholi punktlaridagi ko'chalarni, shuningdek xo'jaliklararo qishloq avtomobil yo'llarini ta'mirlash;

uy-joy-kommunal xo'jaligi obyektlarida ta'mirlash ishlarini olib borish;

aholi punktlarini obodonlashtirish xarajatlari;

3) tuman va shahar hokimliklarini hamda ularning bo'limlarini, shuningdek tumanlar va shaharlar budjetlari mablag'lari hisobidan moliyalashtirilishi nazarda tutilgan davlat boshqaruvi organlarining boshqa hududiy bo'linmalarini saqlab turish xarajatlari;

4) fuqarolarning o'zini o'zi boshqarish organlarini saqlab turish xarajatlari;

5) tumanlar va shaharlar budjetlarining zaxira jamg'armalarini shakllantirish xarajatlari;

5¹) jamoatchilik fikri asosida shakllantiriladigan tadbirlarni moliyalashtirish xarajatlari;

6) boshqa xarajatlar, shu jumladan qonunchilikda tumanlar va shaharlar budjetlaridan moliyalashtirilishi nazarda tutilgan ayrim tashkilotlar va tadbirlarning xarajatlari.

73-modda. O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetining zaxira jamg'armalari

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armalari moliya yili mobaynida iqtisodiy, ijtimoiy-madaniy va boshqa sohalaridagi qo'shimcha, ko'zda tutilmagan xarajatlar o'z vaqtida hamda uzluksiz moliyalashtirilishini ta'minlash uchun tashkil etiladi.

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armalari mablag'lari tegishincha O'zbekiston Respublikasining respublika budjetiga, Qoraqalpog'iston Respublikasining respublika budjetiga, viloyatlarning viloyat budjetlariga va Toshkent shahrining shahar budjetiga, tumanlar va shaharlarning budjetlariga tushadigan daromadlar hisobidan shakllantiriladi.

O'zbekiston Respublikasi Vazirlar Mahkamasining, Qoraqalpog'iston Respublikasi budjetining, viloyatlar va Toshkent shahar mahalliy budjetlarining zaxira jamg'armalarining miqdori Davlat budjeti to'g'risidagi qonun loyihasi qabul qilinayotganda belgilanadi.

Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armalari miqdori Qoraqalpog'iston Respublikasi budjetining, viloyatlar va Toshkent shahar mahalliy budjetlarining parametrlari tasdiqlanayotganda belgilanadi.

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armalari mablag'larining taqsimlovchilari tegishincha O'zbekiston Respublikasi Vazirlar Mahkamasi, Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlaridir.

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armalari mablag'laridan foydalanish to'g'risidagi moliya organlari bilan dastlab kelishilgan takliflar tashabbuskorlar tomonidan tegishincha O'zbekiston Respublikasi Vazirlar Mahkamasi, Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlariga belgilangan tartibda kiritiladi.

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlarning viloyat budjetlari va Toshkent shahri shahar budjetining, tumanlar va shaharlar budjetlarining zaxira jamg'armalari mablag'lari tegishincha O'zbekiston

Respublikasi Prezidenti, O'zbekiston Respublikasi Vazirlar Mahkamasi, Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimlarining qarorlari asosida, ushbu qarorlarda ko'rsatilgan aniq maqsadlarga va miqdorlarda sarflanadi.

Agar O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armalaridan qo'shimcha mablag'lar ajratilishi taklif etilayotgan maqsadlar uchun Davlat budjetida ham mablag'lar nazarda tutilgan bo'lsa, u holda tegishli zaxira jamg'armalarining mablag'laridan foydalanish to'g'risidagi takliflar faqat ilgari tegishli budjetda nazarda tutilgan mablag'lar sarflab bo'linganidan keyingina kiritiladi.

Agar O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armalaridan mablag'lar ajratilgan tadbirlar muayyan muddatga ega bo'lsa, u holda foydalanilmay qolgan mablag'lar tadbirlarni o'tkazish muddati tugaganidan keyin o'n ish kuni ichida tegishli zaxira jamg'armasiga tiklanadi.

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armasidan ajratilib, moliya yili davomida foydalanilmay qolgan budjetdan ajratilgan mablag'lar moliya yili tugagach tegishli budjetga tiklanadi.

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining, tumanlar va shaharlar budjetlarining zaxira jamg'armasidan mablag'lar oluvchilar O'zbekiston Respublikasi Moliya vazirligi va tegishli hududiy moliya organlariga tegishli zaxira jamg'armasidan ajratilgan mablag'lardan foydalanilishi to'g'risida har chorakda hisobot taqdim etadi.

15-bob. Budjet tashkilotlarining budjetdan tashqari jamg'armalari xarajatlari

81-modda. Budjet tashkilotining rivojlantirish jamg'armasi hamda Tibbiyot tashkilotlarining moddiy rag'batlantirish va rivojlantirish jamg'armasi xarajatlari

Budjet tashkilotining rivojlantirish jamg'armasi hamda Tibbiyot tashkilotlarining moddiy rag'batlantirish va rivojlantirish jamg'armasi mablag'laridan:

vaqtincha mehnatga qobiliyatsizlik nafaqalarini va mavjud kreditorlik qarzlarni to'lash;

budjet tashkilotining moddiy-texnika bazasini mustahkamlash tadbirlari;

budjet tashkiloti xodimlarini moddiy rag'batlantirish tadbirlari uchun foydalaniladi.

Budjet tashkilotida vaqtincha mehnatga qobiliyatsizlik bo'yicha to'lanmagan nafaqalar va muddati o'tgan kreditorlik qarz mavjud bo'lgan taqdirda, Budjet tashkilotining rivojlantirish jamg'armasi mablag'lari birinchi navbatda ushbu qarzlarni to'lash uchun sarflanadi.

Ushbu modda birinchi qismining **uchinchi** va **to'rtinchi xatboshilarida** ko'rsatilgan yo'nalishlar bo'yicha taqsimlanadigan mablag'lar ulushi O'zbekiston Respublikasi Vazirlar Mahkamasining qarori bilan belgilanadi.

Yuridik va jismoniy shaxslar tomonidan budjet tashkilotlariga ko'rsatilgan homiylik mablag'larining jami summasi, agar homiy tomonidan boshqacha qoida belgilanmagan bo'lsa, budjet tashkilotlarining moddiy-texnika bazasini mustahkamlash uchun sarflanadi.

82-modda. Vazirliklar va idoralarning budjetdan tashqari jamg'armalari xarajatlari

Vazirliklar va idoralarning budjetdan tashqari jamg'armalari mablag'laridan:

moddiy-texnik bazani mustahkamlash;

xodimlarni moddiy rag'batlantirish;

boshqa xarajatlarni qoplash uchun foydalaniladi.

Vazirliklar va idoralarning budjetdan tashqari jamg'armalari mablag'lari hisobidan xodimlarning qo'shimcha sonini saqlab turish taqiqlanadi, O'zbekiston Respublikasi Vazirlar Mahkamasi tomonidan belgilanadigan hollar bundan mustasno.

Vazirliklar va idoralarning budjetdan tashqari jamg'armalari mablag'larini shakllantirish va ulardan foydalanish tartibi O'zbekiston Respublikasi Vazirlar Mahkamasi tomonidan belgilanadi.

Maxsus qism

VI bo'lim.

Davlat budjetini va davlat maqsadli jamg'armalari budjetlarini tuzish, ko'rib chiqish, qabul qilish hamda tasdiqlash

16-bob. Davlat budjeti va davlat maqsadli jamg'armalari budjetlarining loyihasini tuzish tartibi

83-modda. Davlat budjeti to'g'risidagi qonun loyihasini ishlab chiqish

Navbatdagi yil uchun Davlat budjeti to'g'risidagi qonun loyihasi hamda kelgusi ikki yilga budjet mo'ljallari o'rta muddatli davr uchun ijtimoiy-iqtisodiy rivojlantirishning ustuvor yo'nalishlari va makroiqtisodiy ko'rsatkichlar prognozi asosida ishlab chiqiladi.

Davlat budjeti to'g'risidagi qonun loyihasini ishlab chiqish:

budjet so'rovini tuzish tartibini yuborishni;

budjet so'rovlarini hamda asosiy makroiqtisodiy ko'rsatkichlar prognozlarini tayyorlash va taqdim etishni;

budjet so'rovlarini ko'rib chiqish va jamlashni;

budjetnomani ishlab chiqishni nazarda tutadi.

84-modda. Davlat budjeti va davlat maqsadli jamg'armalari budjetlari loyihalarini tuzish uchun mas'ul organlar

Davlat budjeti loyihasini tuzish uchun mas'ul organlar quyidagilardir:

O'zbekiston Respublikasi Moliya vazirligi;

vazirliklar va idoralar, mahalliy davlat hokimiyati organlari, budjetlar loyihalarini tuzish, O'zbekiston Respublikasi Moliya vazirligi tomonidan so'ralgan axborot va ma'lumotlarni taqdim etishga taalluqli qismi bo'yicha.

Davlat maqsadli jamg'armalarini taqsimlovchi organlar davlat maqsadli jamg'armalari budjetlarining loyihalarini tuzish uchun mas'ul organlardir.

85-modda. Budjet so'rovi

Budjet so'rovi:

budjet tashkilotining, budjet mablag'lari oluvchining va budjet mablag'larini taqsimlovchining budjet tizimi budjetlari mablag'laridan foydalanish bilan bog'liq faoliyatining miqdor va sifat ko'rsatkichlarini o'z ichiga oluvchi, o'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobotni;

xarajat majburiyatlarining ularni kiritish (ijro etish) uchun asos bo'ladigan hamda moliyalashtirish manbalari va amal qilish muddatlarini belgilaydigan normativ-huquqiy hujjatlar, shartnomalar va (yoki) ularning alohida qoidalari ko'rsatilgan reyestrini;

budjet mablag'larini taqsimlovchining rivojlantirish dasturini;

budjet mablag'larini taqsimlovchining rivojlantirish dasturi bilan uzviy bog'liq holda tuzilgan kelgusi davr uchun budjet buyurtmasini o'z ichiga oladi.

Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari, davlat maqsadli jamg'armalarini taqsimlovchi organlar budjet so'rovi bilan bir vaqtda tegishli budjetlar va davlat maqsadli jamg'armalari daromadlarining kelgusi davr uchun prognozlarini taqdim etadi.

Budjet so'rovini tuzish tartibi Davlat budjeti, davlat maqsadli jamg'armalari va budjet tashkilotlarining budjetdan tashqari jamg'armalari bo'yicha O'zbekiston Respublikasi Moliya vazirligi tomonidan belgilanadi.

86-modda. O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot

O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot budjet tashkiloti, budjet mablag'lari oluvchi va budjet mablag'larini taqsimlovchi tomonidan tuziladi hamda budjet tashkiloti, budjet mablag'lari oluvchi va budjet mablag'larini taqsimlovchining faoliyatini baholash, bundan buyon uni budjet tizimi budjetlarining mablag'lari hisobidan moliyalashtirishning maqsadga muvofiqligi haqida takliflar tayyorlash uchun foydalaniladi.

O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot budjet tashkiloti, budjet mablag'lari oluvchi va budjet mablag'larini taqsimlovchining har bir faoliyat turi bo'yicha o'tgan yilda erishilgan va joriy yilda kutilayotgan natijalarining asosiy miqdor va sifat ko'rsatkichlari haqidagi axborotni o'z ichiga oladi.

O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot qisqa va aniq shaklda bayon etilishi hamda u mazkur faoliyat sohasida kasbiy bilimlarga ega bo'lmagan shaxslarning uni tushunishini qiyinlashtiradigan maxsus atamalarni o'z ichiga olmasligi kerak.

87-modda. Xarajat majburiyatlarining reyestri

Xarajat majburiyatlarining reyestri budjet tashkiloti, budjet mablag'lari oluvchi va budjet mablag'larini taqsimlovchi tomonidan amalga oshiriladigan faoliyat turlari va tadbirlarning budjet tizimi budjetlarining mablag'lari hisobidan uni moliyalashtirish uchun asos bo'lgan tegishli qonunchilik hujjati ko'rsatilgan ro'yxatidir.

Xarajat majburiyatlarining reyestri budjet tashkiloti, budjet mablag'lari oluvchi va budjet mablag'larini taqsimlovchi tomonidan o'zlari amalga oshirayotgan xarajatlarni asoslanganligi nuqtai nazaridan tahlil qilish uchun budjet tasnifiga muvofiq tuziladi.

88-modda. Budjet mablag'larini taqsimlovchining rivojlantirish dasturi

Budjet mablag'larini taqsimlovchining rivojlantirish dasturi budjet mablag'larini taqsimlovchi tomonidan uch yildan kam bo'lmagan davr uchun tuziladi va quyidagilarni o'z ichiga oladi:

budjet mablag'larini taqsimlovchi faoliyatining barcha sohalari bo'yicha rivojlanishning asosiy yo'nalishlari, maqsadlari vazifalarini, sifat va miqdor ko'rsatkichlarini;

maqsadlarga erishish va vazifalarni bajarishga qaratilgan o'zaro bog'liq huquqiy, iqtisodiy, ijtimoiy, tashkiliy va texnik tadbirlar majmuini;

maqsadlarga erishish va vazifalarni bajarishni ta'minlaydigan, muddatlari va turlari bo'yicha kelishilgan kutilayotgan natijalar ko'rsatkichlari tizimini.

Budjet mablag'larini taqsimlovchining rivojlantirish dasturi O'zbekiston Respublikasining qonunlari, O'zbekiston Respublikasi Prezidenti, O'zbekiston Respublikasi Oliy Majlisi palatalari va O'zbekiston Respublikasi Vazirlar Mahkamasi qarorlari bilan belgilangan maqsad va vazifalarga asoslanadi.

Budjet mablag'larini taqsimlovchining rivojlantirish dasturi budjet mablag'larini taqsimlovchi tomonidan yuqori turuvchi organ bilan kelishilgan holda tasdiqlanadi.

89-modda. Budjet buyurtmasi

Budjet buyurtmasi budjet tashkiloti, budjet mablag'lari oluvchi va budjet mablag'larini taqsimlovchi tomonidan tuziladi.

Budjet tashkiloti yoxud budjet mablag'lari oluvchi tomonidan tuzilgan budjet buyurtmasi tegishli budjet mablag'larini taqsimlovchiga budjet mablag'larini taqsimlovchi tomonidan belgilangan muddatda, biroq tegishli moliya organi va davlat maqsadli jamg'armasini taqsimlovchi organga budjet so'rovini taqdim etish muddatidan kechiktirmasdan taqdim etiladi.

Budjet buyurtmasida o'tgan va joriy yillar uchun hamda kelgusi uch yil uchun budjet tizimi budjetlarining mablag'lari hisobidan amalga oshiriladigan xarajatlar budjet tasnifiga muvofiq aks ettiriladi.

Budjet mablag'larini taqsimlovchi o'z tasarrufidagi budjet tashkilotlari va budjet mablag'lari oluvchilarning budjet buyurtmalari asosida jamlanma budjet buyurtmasini tuzadi.

Budjet mablag'larini taqsimlovchining jamlanma budjet buyurtmasi budjet mablag'larini taqsimlovchining rivojlantirish dasturi bilan uzviy bog'liq holda tuziladi.

Budjet buyurtmasida xarajatlar hajmlarini o'tgan yillarga nisbatan ko'paytirishga faqat asoslovchi qonun hujjati bo'lgan taqdirda va mazkur ko'paytirish budjet mablag'larini taqsimlovchining rivojlantirish dasturida nazarda tutilgan hollarda yo'l qo'yiladi.

90-modda. O'rta muddatli davr uchun fiskal strategiyani ishlab chiqish tartibi

O'rta muddatli davr uchun fiskal strategiya (bundan buyon matnda Fiskal strategiya deb yuritiladi):

makroiqtisodiy ko'rsatkichlarning o'rta muddatli davr uchun prognozlarini;

soliq va budjet siyosatining o'rta muddatli davr uchun asosiy yo'nalishlarini;

O'zbekiston Respublikasining konsolidatsiyalashgan budjeti daromadlari va xarajatlarning soliq-budjet siyosatidan kelib chiqqan holda hisoblangan o'rta muddatli davr uchun prognozlarini;

kelgusi moliya yili uchun budjet tizimi budjetlari daromadlari prognozini va ular asosida kelgusi ikki yil uchun ishlab chiqilgan maqsadli mo'ljallarni;

kelgusi moliya yili uchun budjet tizimi budjetlari xarajatlari prognozini va ular asosida kelgusi ikki yil uchun ishlab chiqilgan maqsadli mo'ljallarni;

Davlat budjetining birlamchi profitsiti yoki birlamchi taqchilligi prognozlarini;

fiskal tavakkalchiliklar tahlilini o'z ichiga oladi.

Fiskal strategiyani ishlab chiqish uchun:

O'zbekiston Respublikasi Iqtisodiy taraqqiyot va kambag'allikni qisqartirish vazirligi tomonidan — har yili 15-aprelga qadar o'rta muddatli davr uchun kamida ikkita ssenariydagi asosiy makroiqtisodiy ko'rsatkichlar prognozining dastlabki bahosi;

birinchi darajali budjet mablag'larini taqsimlovchilar tomonidan — har yili 1-mayga qadar O'zbekiston Respublikasi Prezidentining va O'zbekiston Respublikasi Vazirlar Mahkamasining qabul qilingan qarorlari, shuningdek davlat dasturlari asosida o'rta muddatli davrda amalga oshiriladigan, shuningdek tugash muddati kelgan tadbirlar ro'yxati hisobga olingan holda zarur bo'lgan mablag'lar, obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalar to'g'risidagi dastlabki takliflar;

davlat maqsadli jamg'armalarini taqsimlovchi organlar tomonidan — har yili 1-mayga qadar navbatdagi o'rta muddatli davr uchun davlat maqsadli jamg'armalarining daromadlar prognozlari va xarajatlarning dastlabki miqdorlari, shuningdek O'zbekiston Respublikasi Prezidentining va O'zbekiston Respublikasi Vazirlar Mahkamasining qabul qilingan qarorlari, shuningdek davlat dasturlari asosida kelgusi o'rta muddatli davrda amalga oshiriladigan, shuningdek tugash muddati kelgan tadbirlarning bajarilishini zarur bo'lgan mablag'lar bilan ta'minlash uchun O'zbekiston Respublikasining respublika budjetidan ajratiladigan budjetlararo transfertlarning dastlabki miqdorlari bo'yicha takliflar;

Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari tomonidan — har yili 1-mayga qadar daromadlar prognozlari, xarajatlarning (joriy xarajatlar hamda obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalar) dastlabki miqdorlari, shuningdek O'zbekiston Respublikasining respublika budjetidan ajratiladigan budjetlararo transfertlarning dastlabki miqdorlari;

O'zbekiston Respublikasi Davlat soliq qo'mitasi, Davlat bojxona qo'mitasi va boshqa vazirliklar, shuningdek idoralar tomonidan — har yili 15-mayga qadar amaldagi soliq-budjet siyosatidan kelib chiqqan holda o'rta muddatli davr uchun Davlat budjetiga soliq va bojxona tushumlarining prognozlari bo'yicha hisob-kitoblar O'zbekiston Respublikasi Moliya vazirligiga taqdim etiladi.

Fiskal strategiyani ishlab chiqishda O'zbekiston Respublikasi Moliya vazirligi O'zbekiston Respublikasi Iqtisodiy taraqqiyot va kambag'allikni qisqartirish vazirligi bilan kelgusidagi o'rta muddatli davr uchun birinchi darajali budjet mablag'larini taqsimlovchilarga ajratiladigan, shuningdek Qoraqalpog'iston Respublikasi budjetiga, viloyatlar va Toshkent shahar mahalliy budjetlariga obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalarga ajratiladigan xarajatlarning cheklangan miqdorlarini belgilaydi.

Fiskal strategiya O'zbekiston Respublikasi Moliya vazirligi tomonidan ishlab chiqiladi.

90¹-modda. Fiskal strategiyani tasdiqlash

Kelgusi yil uchun yangilangan Fiskal strategiya:

O'zbekiston Respublikasi Moliya vazirligi tomonidan O'zbekiston Respublikasi Vazirlar Mahkamasiga joriy yilning 1-iyuniga qadar kiritiladi;

O'zbekiston Respublikasi Vazirlar Mahkamasida joriy yilning 15-iyuniga qadar muhokama qilinadi va tasdiqlanadi;

O'zbekiston Respublikasi Vazirlar Mahkamasi tomonidan tasdiqlanganidan keyin O'zbekiston Respublikasi Oliy Majlisining palatalariga ma'lumot uchun kiritiladi va O'zbekiston Respublikasi Moliya vazirligi tomonidan o'zining rasmiy veb-saytida e'lon qilinadi.

90²-modda. Davlat budjetini shakllantirishda budjetdan ajratiladigan budjet mablag'larining cheklangan miqdorlarini yetkazish tartibi

Fiskal strategiya O'zbekiston Respublikasi Vazirlar Mahkamasi tomonidan tasdiqlanganidan keyin besh ish kuni ichida O'zbekiston Respublikasi Moliya vazirligi kelgusi moliya yili uchun:

birinchi darajali budjet mablag'larini taqsimlovchilarga, O'zbekiston Respublikasining respublika budjetidan moliyalashtiriladigan budjet tashkilotlariga va budjet mablag'larini oluvchilarga, shuningdek O'zbekiston Respublikasi Prezidenti Administratsiyasi, O'zbekiston Respublikasi Oliy Majlisi Qonunchilik palatasi hamda O'zbekiston Respublikasi Vazirlar Mahkamasi huzuridagi ikkinchi darajali budjet mablag'larini taqsimlovchilarga — O'zbekiston Respublikasining respublika budjetidan ajratiladigan budjet mablag'larining cheklangan miqdorlarini, shuningdek obyektlarni loyihalashtirish, qurish (rekonstruksiya qilish) va jihozlash uchun kapital qo'yimlar bo'yicha xarajatlarning cheklangan miqdorlarini;

Qoraqalpog'iston Respublikasi Vazirlar Kengashiga, viloyatlar va Toshkent shahar hokimliklariga — O'zbekiston Respublikasining respublika budjetidan Qoraqalpog'iston Respublikasi budjetiga, viloyatlar va Toshkent shahar mahalliy budjetlariga ajratiladigan budjetlararo transfertlarning cheklangan miqdorlarini, shuningdek obyektlarni loyihalashtirish, qurish (rekonstruksiya qilish) va jihozlash uchun kapital qo'yimlar bo'yicha xarajatlarning cheklangan miqdorlarini;

davlat maqsadli jamg'armalarini taqsimlovchi organlarga — O'zbekiston Respublikasining respublika budjetidan davlat maqsadli jamg'armalariga ajratiladigan transfertlarning cheklangan miqdorlarini yetkazadi.

O'zbekiston Respublikasi Moliya vazirligi tomonidan taqdim etilgan kelgusi moliya yili uchun O'zbekiston Respublikasining respublika budjetidan ajratiladigan budjetlararo transfertlarning cheklangan miqdorlari asosida Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari besh ish kuni ichida tegishli budjetlarning budjet so'rovlarini tuzish hamda ularni taqdim etish muddatlarini belgilash to'g'risida qarorlar qabul qiladi.

Qoraqalpog'iston Respublikasi budjetining, viloyatlar va Toshkent shahar mahalliy budjetlarining budjet so'rovlarini tuzish hamda ularni taqdim etish muddatlarini belgilash haqida qaror qabul qilinganidan keyin Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari:

tumanlar va shaharlar hokimliklariga Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan ajratiladigan budjetlararo transfertlarning cheklangan miqdorlarini;

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan moliyalashtiriladigan hududiy budjet mablag'larini taqsimlovchilarga — kelgusi moliya yili uchun ajratiladigan budjet mablag'larining cheklangan miqdorlarini yetkazadi.

Tumanlar va shaharlar hokimlari Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan

ajratiladigan budjetlararo transfertlarning cheklangan miqdorlarini olganidan keyin uch ish kuni ichida tegishli budjetlarning budjet so'rovlarini tuzish hamda ularni taqdim etish muddatlarini belgilash to'g'risida qarorlar qabul qiladi.

Tumanlar va shaharlar hokimliklarining moliya bo'limlari tegishli budjetlarning budjet so'rovlarini tuzish va ularni taqdim etish muddatlarini belgilash haqidagi qarorlarni olganidan keyin kelgusi moliya yili uchun ajratiladigan budjet mablag'larining cheklangan miqdorlarini tumanlar va shaharlar budjetlaridan moliyalashtiriladigan hududiy budjet mablag'larini taqsimlovchilarga yetkazadi.

91-modda. Budjet so'rovlarini ko'rib chiqish tartibi

Budjet so'rovlarini ko'rib chiqish:

tumanlar va shaharlar budjetlaridan moliyalashtiriladigan hududiy budjet mablag'larini taqsimlovchilar bo'yicha — tumanlar va shaharlar hokimliklarining moliya bo'limlari tomonidan;

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan moliyalashtiriladigan hududiy budjet mablag'larini taqsimlovchilar, shuningdek tumanlar va shaharlar budjetlari loyihalari bo'yicha — Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan;

birinchi darajali budjet mablag'larini taqsimlovchilar tasarrufidagi budjet tashkilotlari va budjet mablag'larini oluvchilar bo'yicha, shuningdek O'zbekiston Respublikasining respublika budjetidan moliyalashtiriladigan ikkinchi darajali budjet mablag'larini taqsimlovchilar bo'yicha — tegishli birinchi darajali budjet mablag'larini taqsimlovchilar tomonidan;

Qoraqalpog'iston Respublikasining respublika budjeti, viloyatlarning viloyat budjetlari va Toshkent shahrining shahar budjeti, shuningdek birinchi darajali budjet mablag'larini taqsimlovchilarining obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalari bo'yicha — O'zbekiston Respublikasi Iqtisodiy taraqqiyot va kambag'allikni qisqartirish vazirligi tomonidan;

birinchi darajali budjet mablag'larini taqsimlovchilar, Qoraqalpog'iston Respublikasi budjeti, viloyatlar va Toshkent shahar mahalliy budjetlari loyihalari, shuningdek O'zbekiston Respublikasi Tiklanish va taraqqiyot jamg'armasi hamda davlat maqsadli jamg'armalari budjetlarining loyihalari bo'yicha — O'zbekiston Respublikasi Moliya vazirligi tomonidan amalga oshiriladi.

Shuningdek O'zbekiston Respublikasi Moliya vazirligi quyidagilarni ko'rib chiqadi:

O'zbekiston Respublikasi Prezidenti Administratsiyasi, O'zbekiston Respublikasi Oliy Majlisi Qonunchilik palatasi va O'zbekiston Respublikasi Vazirlar Mahkamasi huzuridagi ikkinchi darajali budjet mablag'larini taqsimlovchilar bo'yicha budjet so'rovlarini;

O'zbekiston Respublikasi Iqtisodiy taraqqiyot va kambag'allikni qisqartirish vazirligi tomonidan obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalar bo'yicha umumlashtirilgan budjet so'rovlarini.

92-modda. Budjet so'rovlarini taqdim etish muddatlari

Kelgusi yil uchun budjet so'rovlari joriy yilning 1-avgustiga qadar:

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan, tumanlar va shaharlar budjetlaridan moliyalashtiriladigan hududiy budjet mablag'larini taqsimlovchilar tomonidan tegishli moliya organlariga;

birinchi darajali budjet mablag'larini taqsimlovchilar, O'zbekiston Respublikasining respublika budjetidan moliyalashtiriladigan obyektlarni loyihalashtirish, qurish (rekonstruksiya qilish) hamda jihozlash uchun kapital qo'yilmalar bo'yicha O'zbekiston Respublikasi Iqtisodiy taraqqiyot va kambag'allikni qisqartirish vazirligi, shuningdek davlat maqsadli jamg'armalarini taqsimlovchi organlar tomonidan — O'zbekiston Respublikasi Moliya vazirligiga taqdim etiladi.

O'zbekiston Respublikasi Iqtisodiy taraqqiyot va kambag'allikni qisqartirish vazirligi o'rta muddatli davr uchun makroiqtisodiy ko'rsatkichlarning aniqlashtirilgan prognozlarini O'zbekiston Respublikasi Moliya vazirligiga — joriy yilning 15-avgustiga qadar kiritadi.

O'zbekiston Respublikasi Davlat soliq qo'mitasi, O'zbekiston Respublikasi Davlat bojxona qo'mitasi va boshqa vazirliklar hamda idoralar Davlat budjeti va davlat maqsadli jamg'armalari daromadlarining prognozi bo'yicha takliflarni O'zbekiston Respublikasi Moliya vazirligiga hamda davlat maqsadli jamg'armalarini taqsimlovchi organlarga — joriy yilning 20-avgustigacha taqdim etadi.

Bunda O'zbekiston Respublikasi Moliya vazirligi kelgusidagi o'rta muddatli davr uchun makroiqtisodiy ko'rsatkichlarning aniqlashtirilgan prognozlaridan kelib chiqqan holda Davlat budjeti va davlat maqsadli jamg'armalari daromadlarining yangilangan prognozi bo'yicha tayyorlangan takliflar asosida quyidagilarga:

birinchi darajali budjet mablag'larini taqsimlovchilarga kelgusi moliya yili uchun ajratiladigan budjet mablag'larining cheklangan miqdorlariga;

Qoraqalpog'iston Respublikasi budjetining, viloyatlar va Toshkent shahar mahalliy budjetlarining, shuningdek birinchi darajali budjet mablag'larini taqsimlovchilarning kelgusi moliya yili uchun obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalar bo'yicha xarajatlarning cheklangan miqdorlariga;

Qoraqalpog'iston Respublikasi budjetiga, viloyatlar va Toshkent shahar mahalliy budjetlariga kelgusi moliya yili uchun O'zbekiston Respublikasining respublika budjetidan ajratiladigan budjetlararo transfertlarning cheklangan miqdorlariga;

Davlat maqsadli jamg'armalariga kelgusi moliya yili uchun O'zbekiston Respublikasining respublika budjetidan ajratiladigan budjetlararo transfertlarning cheklangan miqdorlariga o'zgartirishlar kiritadi.

Budjet so'rovlarini ko'rib chiqish jarayonida O'zbekiston Respublikasi Moliya vazirligi budjet so'rovlari olinganidan keyin bir oy muddatda quyidagilarga bildirishnomalar yuboradi:

birinchi darajali budjet mablag'larini taqsimlovchilarga va davlat maqsadli jamg'armalarini taqsimlovchi organlarga — kelgusi moliya yili uchun ajratiladigan budjet mablag'larining cheklangan miqdorlariga kiritilgan o'zgartirishlar, amalga oshirish uchun asoslar mavjud bo'lmagan, ijtimoiy-iqtisodiy samaradorligi past bo'lgan, budjet daromadlarining tegishli o'sishi bilan ta'minlanmagan xarajatlarni kamaytirish to'g'risida, shuningdek budjet tashkilotlari va budjet mablag'larini oluvchilar faoliyatining samaradorligi ko'rsatkichlari pasaygan hollarda xarajatlarni maqbullashtirish haqida;

Qoraqalpog'iston Respublikasi Vazirlar Kengashiga, viloyatlar, Toshkent shahar hokimliklariga va davlat maqsadli jamg'armalarini taqsimlovchi organlarga — tegishli budjetlarning va davlat maqsadli jamg'armalari budjetlarining daromadlari hamda xarajatlarning prognozlari asossiz ravishda pasaytirilgan yoki oshirilgan hollarda mazkur prognozlarga tuzatish kiritish haqida, shuningdek budjetlararo transfertlarning cheklangan miqdorlari to'g'risida;

O'zbekiston Respublikasi Iqtisodiy taraqqiyot va kambag'allikni qisqartirish vazirligiga — Qoraqalpog'iston Respublikasi budjetining, viloyatlar va Toshkent shahar mahalliy budjetlarining, shuningdek birinchi darajali budjet mablag'larini taqsimlovchilarning obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalar bo'yicha xarajatlarga kiritiladigan o'zgartirishlar to'g'risida.

Bunda birinchi darajali budjet mablag'larini taqsimlovchilar, Qoraqalpog'iston Respublikasi Vazirlar Kengashi, viloyatlar, Toshkent shahar hokimliklari va davlat maqsadli jamg'armalarini taqsimlovchi organlar, shuningdek obyektlarni loyihalashtirish, qurish (rekonstruksiya qilish) hamda jihozlash uchun kapital qo'yilmalar bo'yicha O'zbekiston Respublikasi Iqtisodiy taraqqiyot va kambag'allikni qisqartirish vazirligi O'zbekiston Respublikasi Moliya vazirligining yozma bildirishnomalarini olganidan keyin uch ish kuni ichida mazkur yozma bildirishnomalarda ko'rsatilgan fikr-mulohazalarni hisobga olgan holda yangilangan budjet so'rovlarini taqdim etishi shart.

93-modda. Qoraqalpog‘iston Respublikasi budgetining, viloyatlar va Toshkent shahar mahalliy budgetlarining hamda davlat maqsadli jamg‘armalari budgetlarining loyihalarini tayyorlash muddatlari

Kelgusi moliya yili uchun Qoraqalpog‘iston Respublikasi budgetining, viloyatlar va Toshkent shahar mahalliy budgetlarining hamda davlat maqsadli jamg‘armalari budgetlarining loyihalari:

tumanlar va shaharlar hokimliklarining moliya bo‘limlari tomonidan Qoraqalpog‘iston Respublikasi Moliya vazirligiga, viloyatlar va Toshkent shahar hokimliklarining moliya boshqarmalariga Qoraqalpog‘iston Respublikasi Vazirlar Kengashi, viloyatlar va Toshkent shahar hokimliklari tomonidan belgilangan muddatlarda, biroq joriy yilning 25-iyulidan kechiktirmay;

Qoraqalpog‘iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari, davlat maqsadli jamg‘armalarini taqsimlovchi organlar tomonidan O‘zbekiston Respublikasi Moliya vazirligiga joriy yilning 1-avgustidan kechiktirmay taqdim etiladi.

Davlat maqsadli jamg‘armalari budgetlarining loyihalarini tayyorlash tartibi qonunchilik bilan belgilanadi.

94-modda. Qoraqalpog‘iston Respublikasi budgetining, viloyatlar va Toshkent shahar mahalliy budgetlarining loyihalarini ishlab chiqish

Tumanlar va shaharlar budgetlarining loyihalari tumanlar va shaharlar hokimliklarining moliya bo‘limlari tomonidan:

daromadlar bo‘yicha — Davlat budgetiga kiritiladigan daromadlar prognoziga doir takliflar hamda davlat soliq inspeksiyalari, hokimliklarning bo‘limlari va davlat boshqaruvi organlarining boshqa tuman hamda shahar bo‘linmalari tomonidan ma‘muriy-hududiy birlik iqtisodiyotini rivojlantirishning makroiqtisodiy ko‘rsatkichlari prognoziga muvofiq taqdim etiladigan boshqa axborot asosida;

Qoraqalpog‘iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan ajratiladigan budgetlararo transfertlarning cheklangan miqdorlari asosida;

xarajatlar bo‘yicha — tumanlar va shaharlar budgetlaridan moliyalashtiriladigan hududiy budget mablag‘larini taqsimlovchilarning budget so‘rovlari asosida ishlab chiqiladi.

Qoraqalpog‘iston Respublikasi budgetining, viloyatlar va Toshkent shahar mahalliy budgetlarining loyihalari Qoraqalpog‘iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan:

daromadlar bo‘yicha — Davlat budgetiga kiritiladigan daromadlar prognoziga doir takliflar hamda davlat soliq boshqarmalari va hokimliklarning boshqarmalari, Qoraqalpog‘iston Respublikasi, viloyatlar va Toshkent shahar davlat boshqaruvi organlarining bo‘linmalari tomonidan ma‘muriy-hududiy birlik iqtisodiyotini rivojlantirishning makroiqtisodiy ko‘rsatkichlari prognoziga muvofiq taqdim etiladigan boshqa axborot asosida;

O‘zbekiston Respublikasining respublika budgetidan ajratiladigan budgetlararo transfertlarning cheklangan miqdorlari asosida;

xarajatlar bo‘yicha — Qoraqalpog‘iston Respublikasining respublika budgetidan, viloyatlarning viloyat budgetlaridan, Toshkent shahrining shahar budgetidan moliyalashtiriladigan hududiy budget mablag‘larini taqsimlovchilarning budget so‘rovlari hamda tegishli tumanlar va shaharlar budgetlarining loyihalari, shuningdek Qoraqalpog‘iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan moliyalashtiriladigan ayrim tadbirlar uchun xarajatlarning prognoz qilinayotgan hajmi asosida ishlab chiqiladi.

Qoraqalpog‘iston Respublikasi budgetining, viloyatlar va Toshkent shahar mahalliy budgetlarining loyihalarini taqchillik bilan ishlab chiqishga yo‘l qo‘yilmaydi.

Qoraqalpog‘iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimliklari tegishli budgetlarni birinchi navbatda ish haqi hamda unga tenglashtirilgan

to'lovlar, oziq-ovqat mahsulotlari va dori-darmon vositalarini sotib olish, shuningdek kommunal xizmatlar xarajatlarini nazarda tutgan holda shakllantiradi.

Tumanlar va shaharlar hokimliklari tumanlar va shaharlar budjetlari tasdiqlangan xarajatlarining (bundan tumanlar va shaharlar budjetlari zaxira jamg'armalarining mablag'lari mustasno) 5 foiziga teng miqdordagi mablag'larni jamoatchilik fikri asosida shakllantiriladigan tadbirlarni moliyalashtirishga yo'naltiradi.

95-modda. Davlat budjetining va davlat maqsadli jamg'armalari budjetlarining loyihasini ishlab chiqish

Davlat budjetining loyihasini ishlab chiqish O'zbekiston Respublikasi Moliya vazirligi tomonidan:

makroiqtisodiy ko'rsatkichlar prognozi;

daromadlarning tashkil topish manbalari bo'yicha Davlat budjeti daromadlari prognozi;

birinchi darajali budjet mablag'larini taqsimlovchilarning budjet so'rovlari va O'zbekiston Respublikasining respublika budjeti hisobidan ayrim tadbirlar uchun xarajatlar hajmining prognozi;

Qoraqalpog'iston Respublikasi budjeti, viloyatlar va Toshkent shahrining mahalliy budjetlari loyihalari asosida ishlab chiqiladi.

Davlat budjetining loyihasida xarajatlar daromadlarning prognoz qilinayotgan hajmidan kelib chiqib Davlat budjeti taqchilligining cheklangan miqdori hisobga olingan, uni qoplash manbalari belgilangan holda nazarda tutiladi.

Davlat budjetining loyihasi:

ushbu Kodeksning 50 va 69-moddalariga muvofiq Davlat budjetining daromadlar manbalari bo'yicha daromadlari va yo'nalishlar bo'yicha xarajatlari prognozidan;

Davlat budjeti taqchilligining eng yuqori miqdori va uni qoplash manbalaridan tarkib topadi.

Davlat maqsadli jamg'armalarini taqsimlovchi organlar tomonidan ishlab chiqilgan davlat maqsadli jamg'armalari budjetlarining loyihalari tushumlar manbalari bo'yicha daromadlar va yo'nalishlar bo'yicha xarajatlar prognozidan tarkib topadi.

Davlat maqsadli jamg'armalari budjetlarining loyihalarini taqchillik bilan ishlab chiqishga, agar taqchillik davlat maqsadli jamg'armalarining yil boshidagi qoldiq mablag'lari bilan qoplanmasa, yo'l qo'yilmaydi.

96-modda. Budjetnoma

Budjetnoma — erishilgan natijalar hisobga olingan holda mamlakatni kelgusi davrda ijtimoiy-iqtisodiy rivojlantirishning asosiy yo'nalishlarini nazarda tutuvchi hujjat bo'lib, ushbu yo'nalishlar asosida Davlat budjeti to'g'risidagi qonun loyihasi ishlab chiqiladi.

Budjetnoma quyidagilarni o'z ichiga oladi:

O'zbekiston Respublikasi konsolidatsiyalashgan budjetining loyihasini ishlab chiqishda foydalanilgan asosiy makroiqtisodiy ko'rsatkichlarning o'rta muddatli davr uchun prognozini;

O'zbekiston Respublikasi konsolidatsiyalashgan budjetining joriy yildagi ijrosining prognoz bahosini;

yangilangan Fiskal strategiyani;

prognoz yil uchun Davlat budjetining va davlat maqsadli jamg'armalari budjetlarining, O'zbekiston Respublikasi Tiklanish va taraqqiyot jamg'armasi daromadlari hamda xarajatlarining loyihasini va kelgusi ikki yil uchun budjet mo'ljallarini;

sohalar bo'yicha rivojlanishning asosiy yo'nalishlari, maqsadlari, vazifalari, sifat va miqdor ko'rsatkichlarini;

davlat qarzining holati to'g'risidagi ma'lumotlarni, shuningdek O'zbekiston Respublikasi nomidan va O'zbekiston Respublikasining kafolati ostida jalb qilinadigan qarz mablag'larining yillik cheklangan miqdorini.

17-bob. Davlat budjeti to'g'risidagi Qonunni qabul qilish tartibi

97-modda. Davlat budjeti to'g'risidagi qonun loyihasini va budjetnomani kiritish tartibi

Davlat budjeti to'g'risidagi qonun loyihasi va budjetnoma:

O'zbekiston Respublikasi Moliya vazirligi tomonidan O'zbekiston Respublikasi Vazirlar Mahkamasiga — joriy yilning 15-sentabriga qadar kiritiladi;

O'zbekiston Respublikasi Vazirlar Mahkamasi tomonidan O'zbekiston Respublikasi Prezidenti Administratsiyasiga — joriy yilning 20-sentabriga qadar kiritiladi;

O'zbekiston Respublikasi Vazirlar Mahkamasi tomonidan O'zbekiston Respublikasi Hisob palatasiga xulosa taqdim etishi uchun — joriy yilning 20-sentabriga qadar kiritiladi. O'zbekiston Respublikasi Hisob palatasi O'zbekiston Respublikasi Vazirlar Mahkamasiga Davlat budjeti to'g'risidagi qonun loyihasi va o'rta muddatli davr uchun fiskal strategiya bo'yicha xulosani joriy yilning 5-oktabridan kechiktirmay taqdim etadi;

O'zbekiston Respublikasi Vazirlar Mahkamasi tomonidan O'zbekiston Respublikasi Oliy Majlisining Qonunchilik palatasiga, qoida tariqasida, joriy yilning 15-oktabridan kechiktirmay O'zbekiston Respublikasi Hisob palatasining xulosasi bilan kiritiladi.

Budjetnoma O'zbekiston Respublikasi Vazirlar Mahkamasi tomonidan O'zbekiston Respublikasi Oliy Majlisining Senatiga ham, qoida tariqasida, joriy yilning 15-oktabridan kechiktirmay kiritiladi.

Davlat budjeti to'g'risidagi qonun loyihasi, o'rta muddatli davr uchun fiskal strategiya O'zbekiston Respublikasi Oliy Majlisi Qonunchilik palatasiga yuborilishidan oldin, xuddi shuningdek Davlat budjetining va davlat maqsadli jamg'armalari budjetlarining ijrosi to'g'risidagi hisobotlar O'zbekiston Respublikasi Oliy Majlisi palatalariga yuborilishidan oldin majburiy ravishda jamoatchilik muhokamasiga qo'yiladi, shuningdek O'zbekiston Respublikasi Moliya vazirligi tomonidan ishlab chiqiladigan "Fuqarolar uchun budjet" axborot nashri jamoatchilik muhokamasi uchun parallel ravishda e'lon qilinadi.

98-modda. Davlat budjeti to'g'risidagi Qonunni qabul qilish

Davlat budjeti to'g'risidagi qonun loyihasi O'zbekiston Respublikasi Oliy Majlisining Qonunchilik palatasi tomonidan, qoida tariqasida, joriy yilning 15-noyabriga qadar ko'rib chiqilishi kerak.

O'zbekiston Respublikasi Oliy Majlisining Qonunchilik palatasi tomonidan qabul qilingan Davlat budjeti to'g'risidagi Qonun O'zbekiston Respublikasi Oliy Majlisining Senatiga ko'rib chiqish uchun qabul qilingan kundan e'tiboran besh kun ichida yuboriladi.

Davlat budjeti to'g'risidagi Qonun O'zbekiston Respublikasi Oliy Majlisining Senati tomonidan, qoida tariqasida, joriy yilning 15-dekabridan kechiktirmay ma'qullanadi.

99-modda. Qoraqalpog'iston Respublikasi budjetini, viloyatlar va Toshkent shahar mahalliy budjetlarini tasdiqlash

Navbatdagi yil uchun Qoraqalpog'iston Respublikasi budjetining, viloyatlar va Toshkent shahar mahalliy budjetlarining loyihalari:

Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari tomonidan O'zbekiston Respublikasi Hisob palatasiga tegishli xulosani taqdim etishi uchun joriy yilning 20-sentabriga qadar yuboriladi. O'zbekiston Respublikasi Hisob palatasi Qoraqalpog'iston Respublikasi Vazirlar Kengashiga, viloyatlar va Toshkent shahar hokimliklariga Qoraqalpog'iston Respublikasi budjetining, viloyatlar va Toshkent shahar mahalliy budjetlarining loyihalari bo'yicha xulosani joriy yilning 1-oktabridan kechiktirmay taqdim etadi;

Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari tomonidan joriy yilning 10-oktabridan kechiktirmay jamoatchilik muhokamasi uchun joylashtiriladi;

ularning jamoatchilik muhokamasi yakunlari bo'yicha kelib tushgan asoslangan takliflar va fikr-mulohazalar asosida qayta ko'rib chiqiladi hamda O'zbekiston Respublikasi Hisob palatasining xulosasi bilan birgalikda Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari tomonidan joriy yilning 25-oktabridan kechiktirmay tegishincha

Qoraqalpog‘iston Respublikasi Jo‘qorg‘i Kengesiga, xalq deputatlari viloyatlar va Toshkent shahar Kengashlariga kiritiladi.

Davlat budjeti to‘g‘risidagi Qonun rasmiy e‘lon qilingandan so‘ng Qoraqalpog‘iston Respublikasi Jo‘qorg‘i Kengesi, xalq deputatlari viloyatlar va Toshkent shahar Kengashlari tomonidan bir hafta ichida tegishincha Qoraqalpog‘iston Respublikasi budjeti, viloyatlar va Toshkent shahar mahalliy budjetlari to‘g‘risidagi qarorlar Davlat budjeti to‘g‘risidagi Qonunga muvofiqlashtirilgan holda qabul qilinadi.

Navbatdagi yil uchun tumanlar va shaharlar budjetlarining loyihalari tumanlar va shaharlar hokimliklari tomonidan:

joriy yilning 10-oktabridan kechiktirmay jamoatchilik muhokamasi uchun joylashtiriladi;

ularning jamoatchilik muhokamasi yakunlari bo‘yicha kelib tushgan asoslangan takliflar va fikr-mulohazalar asosida qayta ko‘rib chiqiladi hamda joriy yilning 1-noyabridan kechiktirmay tegishincha xalq deputatlari tumanlar va shaharlar Kengashlariga kiritiladi.

Qoraqalpog‘iston Respublikasi budjeti, viloyatlar va Toshkent shahar mahalliy budjetlari to‘g‘risida qarorlar qabul qilinganidan so‘ng uch ish kuni ichida xalq deputatlari tumanlar va shaharlar Kengashlari ushbu qarorlarga muvofiqlashtirilgan holda tegishincha tumanlarning va shaharlarning budjetlari to‘g‘risida qarorlar qabul qiladi.

Qoraqalpog‘iston Respublikasi budjeti, viloyatlar va Toshkent shahar mahalliy budjetlari, tumanlar va shaharlar budjetlari to‘g‘risidagi tegishli qarorlar Qoraqalpog‘iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimliklari tomonidan ular qabul qilinganidan so‘ng uch ish kuni ichida o‘zlarining rasmiy veb-saytlariga joylashtiriladi.

100-modda. Davlat budjetini va davlat maqsadli jamg‘armalari budjetlarini yetkazish

Davlat budjeti to‘g‘risidagi Qonun rasmiy e‘lon qilinganidan keyin O‘zbekiston Respublikasi Moliya vazirligi:

Qoraqalpog‘iston Respublikasi budjetiga, viloyatlar va Toshkent shahar mahalliy budjetlariga O‘zbekiston Respublikasining respublika budjetidan beriladigan budjetlararo transfertlar hajmlarini Qoraqalpog‘iston Respublikasi Vazirlar Kengashi, viloyatlar va Toshkent shahar hokimliklari e‘tiboriga — uch ish kuni ichida;

birinchi darajali budjet mablag‘larini taqsimlovchilar, O‘zbekiston Respublikasining respublika budjetidan moliyalashtiriladigan budjet tashkilotlari va budjet mablag‘lari oluvchilar uchun nazarda tutilgan budjetdan ajratiladigan mablag‘lar hajmlarini ularning e‘tiboriga — uch ish kuni ichida;

davlat maqsadli jamg‘armalarini taqsimlovchi organlar uchun belgilangan daromadlar va xarajatlarning hajmlarini ularning e‘tiboriga — o‘n ish kuni ichida yetkazadi.

Qoraqalpog‘iston Respublikasi budjeti, viloyatlar va Toshkent shahar mahalliy budjetlari tasdiqlanganidan keyin Qoraqalpog‘iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari:

tumanlar va shaharlar budjetlarining daromatlari va xarajatlari hajmlarini, shuningdek ularga tegishincha Qoraqalpog‘iston Respublikasining respublika budjetidan, viloyatlarning viloyat budjetlaridan, Toshkent shahrining shahar budjetidan beriladigan budjetlararo transfertlar hajmlarini tumanlar va shaharlar hokimliklari e‘tiboriga — uch ish kuni ichida;

Qoraqalpog‘iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan moliyalashtiriladigan hududiy budjet mablag‘larini taqsimlovchilar e‘tiboriga ular uchun nazarda tutilgan budjetdan ajratiladigan mablag‘lar hajmlarini — bir haftalik muddatda yetkazadi.

Tumanlar va shaharlar budjetlari tasdiqlanganidan keyin tumanlar va shaharlar hokimliklarining moliya bo‘limlari tumanlar va shaharlar budjetlaridan moliyalashtiriladigan hududiy budjet mablag‘larini taqsimlovchilar e‘tiboriga ular uchun nazarda tutilgan budjetdan ajratiladigan mablag‘larning hajmlarini bir haftalik muddatda yetkazadi.

101-modda. O‘zbekiston Respublikasining Favqulodda Davlat budjeti

O'zbekiston Respublikasining Favqulodda Davlat budjeti O'zbekiston Respublikasining Prezidenti qaroriga ko'ra favqulodda holat sharoitlarida qabul qilinadigan budjetdir.

Ijro etuvchi hokimiyat organlari favqulodda holat sharoitlarida budjet sohasidagi vakolatlarini O'zbekiston Respublikasi Prezidentining qaroriga ko'ra amalga oshiradi.

O'zbekiston Respublikasi Favqulodda Davlat budjetining amal qilishi davrida O'zbekiston Respublikasi Oliy Majlisi palatalarining O'zbekiston Respublikasi Davlat budjeti to'g'risidagi qarorlarining, shuningdek Qoraqalpog'iston Respublikasi Jo'qorg'i Kengesining, xalq deputatlari viloyatlar va Toshkent shahar Kengashlarining Qoraqalpog'iston Respublikasining budjeti, viloyatlar va Toshkent shahar mahalliy budjetlari daromadlari va xarajatlari hajmi haqidagi qarorlarining amal qilishi to'xtatib turiladi.

O'zbekiston Respublikasi Favqulodda Davlat budjetining amal qilishi tugatilishi bilan Davlat budjeti va davlat maqsadli jamg'armalari budjetlari parametrlariga aniqlik kiritiladi.

18-bob. Xarajatlar smetalarini va shtat jadvallarini tuzish hamda tasdiqlash, ularni ro'yxatdan o'tkazish tartibi

102-modda. Budjet tashkilotlari va budjet mablag'lari oluvchilarning xarajatlar smetalarini tuzish

Xarajatlar smetalari budjet tashkilotlari va budjet mablag'lari oluvchilar tomonidan, yil oylari bo'yicha taqsimlangan holda:

xarajatlarning birinchi — uchinchi guruhlar bo'yicha xarajatlarning moddalariga ko'ra ajratib;

xarajatlarning to'rtinchi guruhi bo'yicha xarajatlarning moddalariga ko'ra ajratmasdan tuziladi.

Xarajatlar smetasiga xarajatlarning moddalar bo'yicha to'rtinchi guruh xarajatlari yoyilmasi, shuningdek davlat ehtiyojlari uchun ustuvor ravishda kichik tadbirkorlik subyektlaridan xarid qilinadigan tovarlar (ishlar, xizmatlar) guruhlarining ro'yxati bo'yicha xarajatlar yoyilmasi ilova qilinadi.

O'zbekiston Respublikasining xorijdagi har bir diplomatik vakolatxonasi va konsullik muassasasi bo'yicha xarajatlar smetalari O'zbekiston Respublikasining xorijdagi diplomatik vakolatxonalari va konsullik muassasalarining O'zbekiston Respublikasi Moliya vazirligi bilan kelishilgan yillik jamlanma xarajatlar smetalari asosida xorijiy va milliy valyutada tuziladi.

Budjet tashkilotlarining va budjet mablag'lari oluvchilarning xarajatlar smetalari ikki nusxada, budjet mablag'larini taqsimlovchi tasarrufidagi budjet tashkilotlari va budjet mablag'lari oluvchilar bo'yicha uch nusxada tuziladi.

Moliya organlari va budjet mablag'larini taqsimlovchilar budjet tashkilotlari hamda budjet mablag'lari oluvchilarning xarajatlar smetalariga doir hisob-kitoblarni talab qilishga haqlidir.

Budjet mablag'larini taqsimlovchi o'z tasarrufidagi tashkilotlardan kelib tushgan xarajatlar smetalarini moliya yili uchun budjet mablag'larini taqsimlovchiga budjetdan ajratiladigan mablag'lar hajmi doirasida ko'rib chiqadi va budjet mablag'larini taqsimlovchining O'zbekiston Respublikasi Moliya vazirligiga taqdim etiladigan jamlanma xarajatlar smetasini tuzadi.

Xarajatlar smetasining, jamlanma xarajatlar smetasining va ularga doir ilovalarning shakllari, shuningdek ularni tuzish tartibi O'zbekiston Respublikasi Moliya vazirligi tomonidan tasdiqlanadi.

103-modda. Budjet tashkilotlarining va budjet mablag'lari oluvchilarning xarajatlar smetalarini tasdiqlash

Budjet tashkilotlari va budjet mablag'lari oluvchilarning xarajatlar smetasi tashkilot bosh buxgalteri (uning o'rinbosari) va moliya-iqtisod bo'linmasi boshlig'i (shtat jadvaliga muvofiq moliyaviy-iqtisodiy masalalar bo'yicha mutaxassis) tomonidan imzolanadi hamda tashkilot rahbari yoki u vakolat bergan shaxs tomonidan tasdiqlanadi.

Budjet mablag'larini taqsimlovchining jamlanma xarajatlar smetasi budjet mablag'larini taqsimlovchining bosh buxgalteri (uning o'rinbosari) va moliya-iqtisod bo'linmasi boshlig'i (shtat jadvaliga muvofiq moliyaviy-iqtisodiy masalalar bo'yicha mutaxassis) tomonidan imzolanadi

hamda budget mablag'larini taqsimlovchining rahbari yoki u vakolat bergan shaxs tomonidan tasdiqlanadi.

O'zbekiston Respublikasining xorijdagi diplomatik vakolatxonalari va konsullik muassasalarining yillik jamlanma xarajatlar smetasi O'zbekiston Respublikasi tashqi ishlar vaziri tomonidan O'zbekiston Respublikasi Moliya vazirligi bilan kelishilgan holda joriy yilning 1-fevraliga qadar tasdiqlanadi.

O'zbekiston Respublikasining xorijdagi diplomatik vakolatxonalari va konsullik muassasalarining xarajatlar smetalari O'zbekiston Respublikasi tashqi ishlar vaziri tomonidan joriy yilning 15-fevraliga qadar tasdiqlanadi.

Kapital qurilish obyektlari bo'yicha xarajatlarning smetalari buyurtmachi tomonidan tasdiqlangan qurilishlarning manzilli ro'yxatlari va obyektlarning titul ro'yxatlari asosida tuziladi.

Budget tashkilotlari va budget mablag'lari oluvchilarning xarajatlar smetalari, budget mablag'larini taqsimlovchining jamlanma xarajatlar smetalari tasdiqlash joriy moliya yilining 10-martidan kechiktirmay amalga oshiriladi.

104-modda. Budget tashkilotlarining va budget mablag'lari oluvchilarning vaqtinchalik xarajatlar smetalari tuzish, tasdiqlash hamda ro'yxatdan o'tkazish

Kelgusi moliya yilining birinchi choragi uchun budget tashkilotlarining va budget mablag'lari oluvchilarning vaqtinchalik xarajatlar smetalari joriy moliya yilining 25-dekabrigacha tuziladi, tasdiqlanadi va ro'yxatdan o'tkaziladi.

Vaqtinchalik xarajatlar smetasida nazarda tutiladigan budgetdan ajratiladigan mablag'lar o'tgan moliya yilining oxirgi choragidagi budgetdan ajratiladigan mablag'lardan ortiq bo'lmasligi lozim. Vaqtinchalik xarajatlar smetasida nazarda tutiladigan budgetdan ajratiladigan mablag'lar qonunchilikda belgilangan tadbirlarni amalga oshirish uchun xarajatlar summasiga aniqlashtirilishi mumkin.

Ro'yxatdan o'tkazish uchun taqdim etilgan xarajatlar smetasida birinchi chorak uchun budgetdan ajratiladigan mablag'lar vaqtinchalik xarajatlar smetasida nazarda tutilgan budgetdan ajratiladigan mablag'lardan kam bo'lmasligi kerak.

Vaqtinchalik xarajatlar smetasini tuzish, tasdiqlash va ro'yxatdan o'tkazish ushbu Kodeksning 102, 103 va 107-moddalarida belgilangan xarajatlar smetalari tuzish, tasdiqlash hamda ro'yxatdan o'tkazish talablariga muvofiq amalga oshiriladi.

Ro'yxatdan o'tkazilgan xarajatlar smetasi mavjud bo'lmagan taqdirda, joriy moliya yilining 1-apreldan e'tiboran budget tashkiloti va budget mablag'lari oluvchining budgetdan ajratiladigan mablag'lar hisobidan xarajatlari xarajatlar smetasi ro'yxatdan o'tkazilguniga qadar to'xtatib turiladi.

105-modda. Budget tashkilotlarining budgetdan tashqari jamg'armalari bo'yicha daromadlar va xarajatlar smetalari tuzish, tasdiqlash hamda ro'yxatdan o'tkazish

Budget tashkilotlarining budgetdan tashqari jamg'armalari bo'yicha daromadlar va xarajatlar smetalari tuzish hamda tasdiqlash budget tashkilotlarining xarajatlar smetalari uchun belgilangan tartibga o'xshash tartibda amalga oshiriladi.

Vazirliklar va idoralarning budgetdan tashqari jamg'armalari bo'yicha jamlanma daromadlar va xarajatlar smetalari ushbu Kodeksning 107-moddasida xarajatlar smetalari uchun belgilangan muddatlarda va tartibda O'zbekiston Respublikasi Moliya vazirligida ro'yxatdan o'tkazilishi lozim.

Budget tashkilotlarining budgetdan tashqari jamg'armalari bo'yicha daromadlar va xarajatlar smetasining daromad qismi moliya yili boshidagi mablag'lar qoldig'i hamda daromadlarning manbalar kesimidagi prognozidan tashkil topadi.

Qonunchilikka muvofiq budget tashkilotlarining budgetdan tashqari jamg'armalari hisobidan xodimlar soni saqlab turilgan taqdirda, budgetdan tashqari jamg'armalar bo'yicha daromadlar va xarajatlar smetasiga ko'rsatilgan xodimlar soni bo'yicha ro'yxatdan o'tkazilishi lozim bo'lgan shtat jadvali ilova qilinadi.

106-modda. Budget tashkilotining shtat jadvalini tuzish va tasdiqlash

Budjet tashkilotining shtat jadvali 1-yanvar holatiga ko'ra har bir budjet tashkiloti bo'yicha mazkur tashkilot uchun belgilangan mehnatga haq to'lash shartlariga muvofiq, O'zbekiston Respublikasi Moliya vazirligi tomonidan tasdiqlanadigan shakl bo'yicha tuziladi.

Yangidan tuzilayotgan budjet tashkilotining shtat jadvali, agar qonunchilikda boshqacha tartib nazarda tutilmagan bo'lsa, budjet tashkiloti faoliyat ko'rsata boshlashidan ikki oy oldin tuziladi va kuchga kiradi.

Lavozimlarning nomlari va xodimlar soni, mehnatga haq to'lash bo'yicha razryadlar, bazaviy stavkalar:

Xizmatchilarning asosiy lavozimlari va ishchilar kasblari klassifikatorida, namunaviy shtatlarda hamda qonunchilik bilan tasdiqlangan mehnatga haq to'lash bo'yicha tarif razryadlarida, bazaviy stavkalarda nazarda tutilgan lavozimlarga;

tasdiqlangan namunaviy shtatlarda nazarda tutilgan xodimlar soniga;

xodimlarning tasdiqlangan umumiy cheklangan soniga, shu jumladan budjet tashkilotlarining budjet mablag'lari va budjetdan tashqari jamg'armalari hisobidan saqlab turilgan boshqaruv xodimlari soniga;

davlat boshqaruvi organlarining belgilangan tartibda tasdiqlangan boshqaruv, xizmatlar ko'rsatuvchi va texnik xodimlari sonining o'zaro nisbati normativlariga muvofiq bo'lishi kerak.

Ish haqining hisob-kitobi tarifikatsiya ro'yxatlariga muvofiq amalga oshiriladigan lavozimlar shtat jadvaliga lavozimlarning har bir guruhi bo'yicha stavkalar soni, oylik mehnatga haq to'lash jamg'armasi ko'rsatilgan, tarifikatsiya ro'yxati shtat jadvaliga ilova qilingan holda kiritiladi.

Ayrim budjet tashkilotlari uchun tasdiqlangan namunaviy shtat normativlari va mehnatga haq to'lash bo'yicha razryadlar, bazaviy stavkalar mavjud bo'lmaganda, ularning shtat jadvallariga kiritiladigan lavozimlarning nomi va xodimlar soni hamda ularning mehnatga haq to'lash bo'yicha razryadlari, bazaviy stavkalari ushbu tashkilotlar tomonidan tashkilotning o'ziga xos xususiyatidan kelib chiqqan holda O'zbekiston Respublikasi Bandlik va mehnat munosabatlari vazirligi hamda Moliya vazirligi bilan kelishuvga ko'ra belgilanadi.

Amaldagi mehnatga haq to'lash shartlarida nazarda tutilgan, ustamalar, qo'shimcha haq to'lash va xodimlarni moddiy rag'batlantirishga yo'naltiriladigan, bir yil uchun hisob-kitob qilingan mehnatga haq to'lash jamg'armasi budjet tashkilotining shtat jadvalida alohida satr bilan ko'rsatiladi.

Budjet mablag'lari oluvchilar — kapital qurilish bo'yicha buyurtmachilar xizmatlarining shtat jadvali ushbu moddaga muvofiq tuziladi.

Budjet tashkilotining shtat jadvali tashkilotning bosh buxgalteri (uning o'rinbosari) va moliya-iqtisod bo'linmasi boshlig'i (shtat jadvaliga muvofiq moliyaviy-iqtisodiy masalalar bo'yicha mutaxassis) tomonidan imzolanadi hamda tashkilot rahbari yoki u vakolat bergan shaxs tomonidan tasdiqlanadi.

Budjet tashkilotlarining shtat jadvallarini tasdiqlash joriy moliya yilining 10-martidan kechiktirmay amalga oshiriladi.

107-modda. Xarajatlar smetalarini va shtat jadvallarini ro'yxatdan o'tkazish tartibi

Tashkilotlarning ushbu Kodeksda belgilangan tartibda tasdiqlangan xarajatlar smetalari va shtat jadvallari ular moliya organlarida ro'yxatdan o'tkazilganidan keyin amalga kiritiladi.

Joriy yilning 1-apreligacha:

budjet mablag'larini taqsimlovchilarning tasdiqlangan jamlanma xarajatlar smetalari va jamlanma shtat jadvallari, shuningdek xarajatlar smetalari va shtat jadvallari — O'zbekiston Respublikasi Moliya vazirligida;

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan moliyalashtiriladigan tashkilotlarning tasdiqlangan xarajatlar smetalari va shtat jadvallari — Qoraqalpog'iston Respublikasi Moliya vazirligida, viloyatlar va Toshkent shahar hokimliklarining moliya boshqarmalarida;

tumanlar va shaharlar budjetidan moliyalashtiriladigan tashkilotlarning tasdiqlangan xarajatlar smetalari va shtat jadvallari — tumanlar va shaharlar hokimliklarining moliya bo'limlarida ro'yxatdan o'tkazilishi kerak.

Tashkilotlarning O'zbekiston Respublikasi Vazirlar Mahkamasining zaxira jamg'armasi, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining tumanlar va shaharlar budjetining zaxira jamg'armalari, shuningdek tegishli budjetning qo'shimcha manbalari mablag'lari hisobidan xarajatlari tegishli moliya organi tomonidan ro'yxatdan o'tkazilgan xarajatlar smetasi asosida amalga oshiriladi.

Xarajatlar smetalari va shtat jadvallari ro'yxatdan o'tkazishdan oldin moliya organlari:

budjet tashkilotlari xodimlarining xarajatlar smetalari bo'yicha tasdiqlangan ish haqi summalarining shtat jadvallari bo'yicha tasdiqlangan ish haqiga muvofiqligini;

shtat jadvalida nazarda tutilgan lavozimlar nomlarining va xodimlar sonining, mehnatga haq to'lash razryadlarining, bazaviy miqdorlarining belgilangan normativlarga muvofiqligini;

Budjet tashkilotlari xodimlarini moddiy rag'batlantirish maxsus jamg'armasining to'g'ri shakllantirilganligini;

umumiy o'rta, o'rta maxsus, professional davlat ta'lim tashkilotlarining direktor jamg'armasi to'g'ri shakllantirilganligini;

xarajatlar smetasida tasdiqlangan stipendiyalar uchun xarajatlar summasining xarajatlar smetasiga doir hisob-kitoblarga muvofiqligini;

to'rtinchi guruhning moddalar bo'yicha yoyilmasidagi xarajatlar summasining xarajatlar smetasida tasdiqlangan summaga muvofiqligini tekshiradi.

108-modda. Davlat maqsadli jamg'armalarining mablag'lari bo'yicha xarajatlar smetalari tuzish, tasdiqlash va ro'yxatdan o'tkazish

Davlat maqsadli jamg'armalarining mablag'lari bo'yicha xarajatlar smetasi davlat maqsadli jamg'armalari mablag'larini oluvchilar tomonidan ularning bir yil uchun tasdiqlangan parametrlari doirasida oyma-oy bo'lingan holda tuziladi va tasdiqlanadi.

Davlat maqsadli jamg'armalarining mablag'lari bo'yicha xarajatlar smetasining va unga doir ilovalarning shakllari, shuningdek smetani tuzish tartibi O'zbekiston Respublikasi Moliya vazirligi tomonidan tasdiqlanadi.

Davlat maqsadli jamg'armalarining mablag'lari bo'yicha xarajatlar smetalari tasdiqlash joriy yilning 10-martidan kechiktirmay amalga oshiriladi.

Davlat maqsadli jamg'armalarining mablag'lari bo'yicha tasdiqlangan xarajatlar smetalari ro'yxatdan o'tkazish davlat maqsadli jamg'armalarini taqsimlovchi organlar tomonidan joriy yilning 1-apreldan kechiktirmay amalga oshiriladi.

VII bo'lim.

Budjet tizimi budjetlarining ijrosi

19-bob. Budjet tizimi budjetlarini ijro etish tartibi

109-modda. Umumiy qoidalar

Budjet tizimi budjetlarining ijrosi budjet to'g'risidagi qonunchilikda belgilangan budjet tizimi budjetlari daromadlarining tushishini ta'minlash va xarajatlari amalga oshirishni, shuningdek ularning ijrosi bilan bog'liq operatsiyalarni hisobga olishni nazarda tutadi.

O'zbekiston Respublikasi respublika budjetining, davlat maqsadli jamg'armalari budjetlarining ijrosi O'zbekiston Respublikasi Vazirlar Mahkamasi tomonidan ta'minlanadi.

Qoraqalpog'iston Respublikasi budjetining, viloyatlar va Toshkent shahar mahalliy budjetlarining ijrosi Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimliklari tomonidan ta'minlanadi.

Budjet tashkilotlari budjetdan tashqari jamg'armalarining ijrosi budjet tashkilotlari tomonidan ta'minlanadi.

Budjet tizimi budjetlarining ijrosi O'zbekiston Respublikasi Moliya vazirligi tomonidan g'azna ijrosi yo'li bilan amalga oshiriladi. G'azna ijrosi faoliyatni chet elda amalga oshirayotgan budjet tashkilotlariga va budjet mablag'lari oluvchilarga tatbiq etilmaydi.

O'zbekiston Respublikasi Moliya vazirligining axborot tizimida budjet tizimi budjetlari, budjet tashkilotlari va budjet mablag'lari oluvchilar uchun shaxsiy g'azna hisobvaraqlari ochiladi.

Budjet tashkilotlari va budjet mablag'lari oluvchilar o'z xarajatlar smetalarida nazarda tutilgan budjetdan ajratiladigan mablag'larni moliya yili tugaguniga qadar sarflashga haqli.

Mamlakatda mudofaa qobiliyatini, xavfsizlikni ta'minlash, ichki tartibni saqlash bilan bog'liq xarajatlar O'zbekiston Respublikasi Vazirlar Mahkamasi tomonidan belgilanadigan tartibda amalga oshiriladi.

110-modda. Budjet tizimi budjetlarini ijro etish muddatlari

Budjet tizimi budjetlarining ijrosi moliya yili mobaynida va qo'shimcha vaqt davrida amalga oshiriladi.

Keyingi yilning yanvar oyi moliya yiliga qo'shimcha vaqt davri bo'lib, bu davr mobaynida o'tgan yil uchun budjet tizimi budjetlarining ijrosi amalga oshiriladi. O'zbekiston Respublikasi Moliya vazirligi budjet tizimi budjetlarining qo'shimcha vaqt davridagi ijrosi bo'yicha operatsiyalarni o'tkazish tartibini va oxirgi muddatlarini belgilaydi.

111-modda. O'zbekiston Respublikasi Moliya vazirligining bank hisobvaraqlari

Yagona g'azna hisobvarag'i O'zbekiston Respublikasi Moliya vazirligi tomonidan boshqariladigan maxsus bank hisobvarag'i bo'lib, unga budjet tizimi budjetlarining daromadlari va boshqa tushumlari kiritiladi hamda undan mazkur budjetlarning xarajatlari to'lanadi. O'zbekiston Respublikasi Moliya vazirligi O'zbekiston Respublikasi Markaziy bankida va boshqa banklarda o'zga bank hisobvaraqlari ochish huquqiga ega.

Yagona g'azna hisobvarag'i O'zbekiston Respublikasi Markaziy bankida ochiladi.

O'zbekiston Respublikasi Moliya vazirligining bank hisobvaraqlaridan mablag'larning so'zsiz tartibda hisobdan chiqarilishiga yo'l qo'yilmaydi.

O'zbekiston Respublikasi Moliya vazirligining bank hisobvaraqlariga xizmat ko'rsatilganligi uchun haq olinmaydi.

112-modda. Davlat budjeti va davlat maqsadli jamg'armalari budjetlari daromadlari va xarajatlarning yoyilmasi

Davlat budjeti va davlat maqsadli jamg'armalari budjetlari daromadlari va xarajatlarning yoyilmasi (bundan buyon matnda daromadlar va xarajatlar yoyilmasi deb yuritiladi):

budjet tasnifiga muvofiq tuzilgan daromadlar va xarajatlar prognozi ularning tasdiqlangan parametrlariga muvofiqligini;

daromadlar va xarajatlar parametrlari ijrosining monitoringini ta'minlash maqsadida tuziladi.

Daromadlar va xarajatlar yoyilmasining daromad qismi tegishli budjet daromadlarining budjet tasnifiga muvofiq oyma-oy bo'lingan yillik hajmlaridan tashkil topadi.

Daromadlar va xarajatlar yoyilmasining xarajat qismi tegishli budjet xarajatlarning moliya yili uchun tasdiqlangan jamlanma xarajatlar smetalari xarajatlar smetalari asosida tuziladigan, budjet tasnifiga muvofiq oyma-oy bo'lingan yillik hajmlaridan tashkil topadi.

Daromadlar va xarajatlar yoyilmasining yakuniy ma'lumotlari, budjetlararo transfertlar bundan mustasno, tasdiqlangan yillik budjetda qabul qilingan summalarga mos kelishi lozim.

Daromadlar va xarajatlar yoyilmasi:

O'zbekiston Respublikasining respublika budjeti bo'yicha — O'zbekiston Respublikasi Moliya vazirligi tomonidan;

Qoraqalpog'iston Respublikasining respublika budjeti, viloyatlarning viloyat budjetlari va Toshkent shahrining shahar budjeti bo'yicha — Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan;

tumanlar va shaharlar budjetlari bo'yicha — tumanlar va shaharlar hokimliklarining moliya bo'limlari tomonidan;

davlat maqsadli jamg'armalari bo'yicha — davlat maqsadli jamg'armalarini taqsimlovchi organlar tomonidan tuziladi.

Daromadlar va xarajatlar yoyilmasining xarajat qismiga xarajatlar smetalarini tuzish talab qilinmaydigan quyidagi:

budjet tashkilotlari va budjet mablag'lari oluvchilarning xarajatlar smetalarini ro'yxatdan o'tkazish hamda ijro etish jarayonida bo'shaydigan;

tovar-moddiy qimmatliklarning normativdan ortiq zaxiralari bo'yicha hisobga olingan;

advokatlar tomonidan ko'rsatilgan yuridik yordam uchun davlat hisobidan to'lanishi nazarda tutiladigan;

qo'shilgan qiymat solig'i summasini soliq to'lovchilarga qaytarish uchun nazarda tutiladigan;

davlat organlari yoki ular mansabdor shaxslarining qonunga xilof harakatlari (harakatsizligi) natijasida jismoniy yoki yuridik shaxslarga yetkazilgan zararining o'rnini qoplash uchun nazarda tutiladigan;

budjet tashkilotlarida ishlovchi ayollarga homiladorlik va tug'ish nafaqasini to'lash uchun nazarda tutiladigan, budjet tashkilotlarining xarajatlar smetalariga qonunchilikda belgilangan tartibda o'zgartirishlar kiritilgan hollar bundan mustasno;

bir yo'la beriladigan davlat pul mukofotlari va mukofotlarini to'lash uchun nazarda tutiladigan;

Chernobil AES halokati oqibatlarini tugatish ishtirokchilariga kompensatsiyalar to'lash uchun nazarda tutiladigan;

transportda imtiyozli yurishni qoplash uchun nazarda tutiladigan;

davlat qarzi bo'yicha xizmat ko'rsatish, O'zbekiston Respublikasi ishtirokchi bo'lgan xalqaro tashkilotlarga a'zolik badallarini to'lash va ularni moliyalashtirishda ishtirok etish uchun mo'ljallangan;

davlat ehtiyojlari uchun qishloq xo'jaligi mahsulotlarini yetishtirayotgan qishloq xo'jaligi korxonalarini moliyaviy qo'llab-quvvatlash uchun nazarda tutiladigan;

saylov va referendumlar o'tkazish uchun nazarda tutiladigan;

budjetlararo transfertlar ajratish uchun nazarda tutiladigan;

tijorat banklari va boshqa moliya institutlarining ustav kapitalini shakllantirish va ko'paytirish uchun nazarda tutiladigan;

rezident-yuridik shaxslarga budjet ssudalari ajratish va O'zbekiston Respublikasi Moliya vazirligining kredit liniyalarini ochish uchun nazarda tutiladigan;

soliq va budjet siyosatining asosiy yo'nalishlarida nazarda tutilgan tadbirlar hamda moliya yili mobaynida amalga oshirilishi nazarda tutilgan va Davlat budjeti xarajatlarini ko'paytirishni talab qiladigan boshqa tadbirlar uchun mo'ljallangan;

davlat maqsadli jamg'armalariga o'tkazib beriladigan;

O'zbekiston Respublikasi Vazirlar Mahkamasining, Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining tumanlar va shaharlar budjetlarining zaxira jamg'armalarini shakllantirish uchun budjetdan ajratiladigan mablag'lar kiritiladi.

Budjet tashkilotlari va budjet mablag'lari oluvchilarning tasdiqlangan hamda ro'yxatdan o'tkazilgan vaqtinchalik xarajatlar smetalari asosida tegishli budjetlarning moliya yilining birinchi choragi uchun vaqtinchalik xarajatlari yoyilmasi tuziladi.

113-modda. Shaxsiy g'azna hisobvaraqlarining turlari

Shaxsiy g'azna hisobvaraqlari quyidagi turlar bo'yicha ochiladi:

budjet tizimi budjetlarining darajalari bo'yicha shaxsiy g'azna hisobvaraqlari;

Davlat budjetining va davlat maqsadli jamg'armalarining daromadlari bo'yicha shaxsiy g'azna hisobvaraqlari;

budjet tashkilotlari va budjet mablag'lari oluvchilarning shaxsiy g'azna hisobvaraqlari.

Shaxsiy g'azna hisobvaraqlarini yuritish tartibi O'zbekiston Respublikasi Moliya vazirligi tomonidan belgilanadi.

114-modda. Budget tizimi budgetlarining darajalari bo'yicha shaxsiy g'azna hisobvaraqlari

Budget tizimi budgetlarining darajalari bo'yicha shaxsiy g'azna hisobvaraqlari:

O'zbekiston Respublikasining respublika budjeti bo'yicha — O'zbekiston Respublikasi Moliya vazirligi tomonidan;

Qoraqalpog'iston Respublikasining respublika budjeti, viloyatlarning viloyat budgetlari va Toshkent shahrining shahar budjeti bo'yicha — Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan;

tumanlar va shaharlar budgetlari bo'yicha — tumanlar va shaharlar hokimliklarining moliya bo'limlari tomonidan;

davlat maqsadli jamg'armalarining budgetlari bo'yicha — davlat maqsadli jamg'armalarini taqsimlovchi organlar tomonidan ochiladi.

115-modda. Davlat budgetining va davlat maqsadli jamg'armalarining daromadlari bo'yicha shaxsiy g'azna hisobvaraqlari

Davlat budgetining va davlat maqsadli jamg'armalarining daromadlari bo'yicha shaxsiy g'azna hisobvaraqlari O'zbekiston Respublikasi Moliya vazirligi tomonidan ochiladi.

116-modda. Budget tashkilotlari va budget mablag'lari oluvchilarning shaxsiy g'azna hisobvaraqlari

Budget tashkilotlari va budget mablag'lari oluvchilarning shaxsiy g'azna hisobvaraqlari:

O'zbekiston Respublikasining respublika budgetidan moliyalashtiriladigan tashkilotlar uchun — O'zbekiston Respublikasi Moliya vazirligi tomonidan;

Qoraqalpog'iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan moliyalashtiriladigan tashkilotlar uchun — Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan;

tumanlar va shaharlar budgetlaridan moliyalashtiriladigan tashkilotlar uchun — tumanlar va shaharlar hokimliklarining moliya bo'limlari tomonidan;

davlat maqsadli jamg'armalarining budgetidan moliyalashtiriladigan tashkilotlar uchun — davlat maqsadli jamg'armalarini taqsimlovchi organlar tomonidan ochiladi.

117-modda. Budget tizimi budgetlari daromad qismining ijrosi

Budget tizimi budgetlari daromad qismining ijrosi:

tushumlarni Yagona g'azna hisobvarag'iga va boshqa bank hisobvaraqlariga kiritishni;

tushumlarni budget tizimining budgetlari o'rtasida taqsimlashni;

ortiqcha yoki noto'g'ri to'langan tushum summalarini qaytarishni yoxud ularni qarzni to'lash evaziga hisobga olishni;

hisob va hisobotni;

ijro ustidan nazoratni nazarda tutadi.

Davlat budgetiga va davlat maqsadli jamg'armalari budgetlariga daromadlarni yig'ishga vakolatli bo'lgan organlar va tashkilotlar, davlat soliq xizmati organlari va bojxona organlari bundan mustasno, daromadlarning to'g'ri hisoblab chiqilishi, to'liq va o'z vaqtida to'lanishi ustidan nazoratni amalga oshirishi, shuningdek, agar qonunchilikda boshqacha qoida nazarda tutilmagan bo'lsa, davlat soliq xizmati organiga hisobot taqdim etishi shart.

118-modda. Budget tizimi budgetlari o'rtasida tushumlarni taqsimlash

Tartibga soluvchi daromadlardan tushgan tushumlar budget tizimi budgetlari o'rtasida taqsimlanadi.

Budjet tizimi budjetlari o'rtasidagi tartibga soluvchi daromadlardan ajratmalarning normativlari O'zbekiston Respublikasi Prezidenti yoki u vakolat bergan organ tomonidan belgilanadi.

Tartibga soluvchi daromadlardan Qoraqalpog'iston Respublikasining respublika budjetiga, viloyatlarning viloyat budjetlariga, Toshkent shahrining shahar budjetiga hamda tumanlar va shaharlar budjetlariga ajratmalarning normativlari tegishincha Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tomonidan tasdiqlanadi.

Tartibga soluvchi daromadlarni budjet tizimining budjetlari o'rtasida taqsimlash O'zbekiston Respublikasi Moliya vazirligi tomonidan amalga oshiriladi.

Ushbu Kodeksning 51-moddasida ko'rsatilgan qaysi daromadlar bo'yicha tartibga soluvchi daromadlardan ajratmalarning normativlari belgilanmagan bo'lsa, o'sha daromadlar O'zbekiston Respublikasining respublika budjetiga to'liq hajmda kiritilishi lozim, ushbu Kodeksning 52-moddasida nazarda tutilgan hollar bundan mustasno.

Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tegishli moliya organlarining taklifiga ko'ra mahalliy soliqlar to'liq hajmda kiritiladigan budjet darajasini belgilaydi.

Agar qonunchilikda mahalliy budjetlarga o'tkaziladigan daromadlarning taqsimlanishi nazarda tutilmagan bo'lsa, unda bu turdagi daromad Qoraqalpog'iston Respublikasining respublika budjetiga, viloyatlarning viloyat budjetlariga va Toshkent shahrining shahar budjetiga o'tkaziladi.

119-modda. Davlat budjetining va davlat maqsadli jamg'armalari budjetlarining qo'shimcha manbalari

Davlat budjetining qo'shimcha manbalari Davlat budjetining har bir darajasidagi budjetlarida alohida-alohida shakllantiriladi va quyidagilardan tashkil topadi:

O'zbekiston Respublikasi respublika budjetining, Qoraqalpog'iston Respublikasi respublika budjetining, viloyatlar viloyat budjetlarining, Toshkent shahri shahar budjetining, tumanlar va shaharlar budjetlarining har yil boshida aniqlanadigan erkin qoldiq mablag'laridan;

O'zbekiston Respublikasining respublika budjeti, Qoraqalpog'iston Respublikasining respublika budjeti, viloyatlarning viloyat budjetlari, Toshkent shahrining shahar budjeti, tumanlar va shaharlar budjetlari daromadlarining birinchi — uchinchi hisobot choraklari yakunlari bo'yicha aniqlanadigan prognozdan oshirib bajarilishidan;

davlat daromadiga o'tkazilgan mol-mulkni realizatsiya qilishdan tushgan tushumlar;

Qoraqalpog'iston Respublikasining respublika budjetiga, viloyatlarning viloyat budjetlariga, Toshkent shahrining shahar budjetiga, tumanlar va shaharlar budjetlariga elektron savdo maydonchasida yer uchastkalariga bo'lgan huquqlarni sotishdan tushgan mablag'lar;

ushbu Kodeksning 120-moddasi to'rtinchi qismiga muvofiq budjetdan ajratiladigan mablag'lar kamaytirilishi natijasida bo'shab qolgan mablag'lardan.

O'zbekiston Respublikasi respublika budjetining, Qoraqalpog'iston Respublikasi respublika budjetining, viloyatlar viloyat budjetlarining, Toshkent shahri shahar budjetining, tumanlar va shaharlar budjetlarining erkin qoldiq mablag'lari ularning shaxsiy g'azna hisobvaraqlaridagi budjet mablag'lari qoldig'ining ushbu budjetlar uchun joriy moliya yiliga tasdiqlangan aylanma kassa mablag'lari miqdoridan oshgan summasi sifatida aniqlanadi.

O'zbekiston Respublikasi respublika budjeti, Qoraqalpog'iston Respublikasi respublika budjeti, viloyatlar viloyat budjetlari, Toshkent shahri shahar budjeti, tumanlar va shaharlar budjetlari daromadlari prognozining oshirib bajarilishi birinchi — uchinchi hisobot choraklari uchun haqiqatda tushgan tushumlarning tegishli hisobot choraklari uchun soliqlar va boshqa majburiy to'lovlar bo'yicha daromadlarning aniqlangan prognozidan ortiq summasi sifatida qonunchilikda belgilangan tartibda aniqlanadi.

Quyi turuvchi budjetlar daromadlari prognozining oshirib bajarilishi summalarini yuqori turuvchi budjetda markazlashtirishga yo'l qo'yilmaydi.

Qoraqalpog'iston Respublikasining respublika budjetiga, viloyatlarning viloyat budjetlariga, Toshkent shahrining shahar budjetiga, tumanlar va shaharlar budjetlariga elektron

savdo maydonchasida yer uchastkalariga bo'lgan huquqlarni sotishdan tushadigan mablag'larning miqdorlari qonunchilikda belgilangan tartibda aniqlanadi.

Davlat maqsadli jamg'armalari budjetlarining qo'shimcha manbalari quyidagilardir:

yil boshidagi holatga ko'ra davlat maqsadli jamg'armalarining shaxsiy g'azna hisobvaraqlaridagi mablag'larning yil boshiga tasdiqlangan mablag'lar miqdoridan ortiq bo'lgan qoldiqlari;

davlat maqsadli jamg'armalari budjetlarini ijro etish jarayonida joriy yil daromadlari prognozining birinchi — uchinchi hisobot choraklari yakunlari bo'yicha, ushbu moddaning **uchinchi qismida** belgilangan tartibda aniqlanadigan oshirib bajarilishi;

davlat maqsadli jamg'armalari budjetlarini ijro etish jarayonida ularning xarajatlari iqtisod qilinishi natijasida bo'shab qolgan mablag'lar.

120-modda. Budjet tizimi budjetlari xarajatlar qismining ijrosi

Budjet tizimi budjetlari xarajatlar qismining ijrosi:

yuridik va moliyaviy majburiyatlarni qabul qilish, ro'yxatdan o'tkazish va hisobga olishni; kassa xarajatlarini amalga oshirishni, shu jumladan budjetlararo transfertlarni o'tkazishni; hisob va hisobotni;

ijro ustidan nazoratni nazarda tutadi.

Budjet tizimi budjetlarining xarajatlari daromadlar va xarajatlar yoyilmasida nazarda tutilgan budjetdan ajratiladigan mablag'lar doirasida hamda budjet tashkilotlari va budjet mablag'lari oluvchilar faoliyat ko'rsatishini ta'minlaydigan muddatlarda, daromadlarning tushishi hisobga olingan holda amalga oshiriladi.

Budjet tashkilotlariga va budjet mablag'lari oluvchilarga turli darajadagi budjetlardan budjetdan ajratiladigan mablag'larni ajratishga yo'l qo'yilmaydi, O'zbekiston Respublikasi Vazirlar Mahkamasi tomonidan belgilangan hollar bundan mustasno.

Budjet tizimi budjetlarining ijrosi jarayonida budjetdan ajratiladigan mablag'lar:

1) quyidagilar munosabati bilan foydalanilmay qolgan budjetdan ajratiladigan mablag'larning:

budjet tashkilotlarining tarmog'i, shtatlari va kontingentlari bo'yicha reja bajarilmaganligi;

budjet tashkilotlarining tasdiqlangan shtat jadvalida nazarda tutilgan shtat birliklari to'ldirilmaganligi;

kapital qo'yimlarni moliyalashtirish uchun nazarda tutilgan mablag'lar moliya yili yakuni bo'yicha to'liq o'zlashtirilmaganligi;

budjet tashkiloti va budjet mablag'lari oluvchilar faoliyati to'xtatib turilganligi — to'xtatib turilgan davr uchun;

2) budjet tashkilotlari va budjet mablag'lari oluvchilarning tasdiqlangan xarajatlar smetalarida nazarda tutilgan, davlat moliyaviy nazorati bo'yicha tadbirlar davomida aniqlangan ortiqcha va qonunga xilof ravishda budjetdan ajratilgan mablag'larning summalariga;

3) qonunchilik hujjatlari qabul qilinishi munosabati bilan budjetdan ajratiladigan mablag'lar miqdorlarining qisqartirilishi summalariga;

4) moliya yili boshiga tovar-moddiy qimmatliklarning normativdan ortiq zaxiralarining summalariga;

5) dotatsiyalar va subsidiyalarni to'lash uchun mo'ljallanib, ammo zarurati qolmagan summalariga kamaytiriladi.

Budjetdan ajratiladigan mablag'larni ushbu moddaning **to'rtinchi qismiga** muvofiq kamaytirish tartibi O'zbekiston Respublikasi Moliya vazirligi tomonidan belgilanadi.

121-modda. Davlat xaridlari

Davlat xaridlari tovarlarni (ishlarni, xizmatlarni) yetkazib beruvchilarning raqobati va ochiqlikni ta'minlash asosida amalga oshiriladi.

Davlat xaridlari amalga oshirilishi va ularning yakunlari to'g'risidagi e'lonlar belgilangan tartibda operatorning maxsus axborot portalida joylashtirilishi kerak.

Davlat xaridlari amalga oshirilishi to'g'risidagi e'lonlarni maxsus axborot portalida joylashtirish joriy moliya yilining 10-dekabridan kechiktirmasdan amalga oshiriladi.

Raqobat va ochiqlik cheklangan holdagi davlat xaridlari qonunchilikda nazarda tutilgan hollarda amalga oshirilishi mumkin.

122-modda. Budjet tashkilotlari va budjet mablag'lari oluvchilar tomonidan yuridik majburiyatlarni qabul qilish, ularni ro'yxatdan o'tkazish hamda hisobga olish

Yuridik majburiyatlar iqtisodiy tasnif kodlari bo'yicha budjetdan ajratiladigan mablag'lar doirasida budjet tashkilotlari va budjet mablag'lari oluvchilar tomonidan qabul qilinadi hamda g'aznachilik bo'linmalari tomonidan ro'yxatdan o'tkaziladi.

Budjet tashkilotlarining budjetdan tashqari jamg'armalari hisobidan ijro etilishi lozim bo'lgan yuridik majburiyatlar g'aznachilik bo'linmalari tomonidan hisobga olinadi.

Budjet tashkilotlari va budjet mablag'lari oluvchilarning budjetdan ajratiladigan mablag'lar bo'yicha tovarlarni (ishlarni, xizmatlarni) yetkazib beruvchilar bilan tuzgan shartnomalari, shuningdek ularga kiritilgan o'zgartirish va qo'shimchalar ular g'aznachilik bo'linmalarida ro'yxatdan o'tkazilganidan keyin kuchga kiradi.

Budjet tashkilotlari va budjet mablag'lari oluvchilar yuridik majburiyatlar yuzaga kelishini tasdiqlovchi hujjatlarni g'aznachilik bo'linmalarida ro'yxatdan o'tkazish uchun joriy moliya yilining 25-dekabridan kechiktirmay taqdim etadi.

Budjet tashkilotlari va budjet mablag'lari oluvchilarning tovarlarni (ishlarni, xizmatlarni) yetkazib berish to'g'risida tuziladigan shartnomalarida 15 foiz miqdorida oldindan to'lovni amalga oshirish nazarda tutiladi, O'zbekiston Respublikasi Vazirlar Mahkamasi tomonidan belgilangan hollar bundan mustasno.

Budjet tashkilotlarining va budjet mablag'lari oluvchilarning tovarlarni (ishlarni, xizmatlarni) import qilish bo'yicha shartnomalari, ularga kiritilgan o'zgartirish va qo'shimchalar ushbu shartnomalar qonunchilikda nazarda tutilgan tartibda vakolatli organlarda tegishli ekspertizadan o'tganidan va hisobga qo'yilganidan so'ng g'aznachilik bo'linmalari tomonidan ro'yxatdan o'tkaziladi. Bunda shartnomalarda ko'rsatilgan summalar g'aznachilik bo'linmalari tomonidan O'zbekiston Respublikasining milliy valyutasida hisobga olinadi.

Budjet tashkilotlari va budjet mablag'lari oluvchilarning birinchi hamda ikkinchi guruh xarajatlari bo'yicha yuridik majburiyatlari g'aznachilik bo'linmalari tomonidan buyurtmalar shaklida ro'yxatdan o'tkaziladi.

Budjet tashkilotlari va budjet mablag'lari oluvchilarning tovarlarni (ishlarni, xizmatlarni) yetkazib beruvchilar bilan shartnomalari joriy moliya yili doirasida amal qilish muddati bilan tuzilishi lozim, kapital qo'yilmalar bo'yicha shartnomalar hamda qonunchilikda nazarda tutilgan amal qilish muddati bir necha yilni tashkil etishi mumkin bo'lgan hollar bundan mustasno. Shartnomaning amal qilish muddati tugagach, agar shartnomaning amal qilish muddatini uzaytirish to'g'risida qo'shimcha bitim tuzilmagan bo'lsa, yetkazib beruvchi (pudratchi) tomonidan tovarlarni (ishlarni, xizmatlarni) yetkazib berish bo'yicha yuridik majburiyatlarni bajarish tugatiladi.

Budjetdan ajratiladigan mablag'lar asosida belgilangan yuridik majburiyatlarni qabul qilish uchun limit birinchi navbatda tegishli moddalar bo'yicha moliya yili boshida mavjud bo'lgan, budjetdan ajratiladigan mablag'lar hisobidan to'lanishi lozim bo'lgan va g'aznachilik bo'linmalarida ro'yxatdan o'tkazilgan shartnomalar bo'yicha yuzaga kelgan kreditorlik qarzi summasiga band qilib qo'yiladi.

Mablag'larni:

budjet tashkilotining iqtisod qilingan budjetdan ajratiladigan mablag'lari hisobidan o'z budjet tashkilotlarini rivojlantirish jamg'armasiga, shuningdek tibbiyot muassasasi tomonidan — xarajatlar smetasida nazarda tutilgan maqsadli budjetdan ajratiladigan mablag'lari hisobidan o'zining tibbiyot tashkilotlarini moddiy rag'batlantirish va rivojlantirish jamg'armasiga;

har bir obyekt bo'yicha kelishilgan manzilli va titul ro'yxatlarda hamda shaxsiy g'azna hisobvaraqlarida ushbu maqsadlar uchun nazarda tutilgan summalar doirasida kapital qo'yilmalar bo'yicha buyurtmachi xizmatini saqlab turishga;

solliqlar va boshqa majburiy to'lovlarni, davlat hokimiyati va boshqaruvi organlarining xizmatlari uchun haq to'lashga;

yuridik majburiyatlar mavjudligini tasdiqlovchi boshqa hujjatlar asosida amalga oshiriladigan xarajatlarni to'lashga o'tkazish shartnoma tuzilmagan holda amalga oshirilishi mumkin.

123-modda. Moliyaviy majburiyatlarni qabul qilish va ro'yxatdan o'tkazish

Moliyaviy majburiyatlar qabul qilingan yuridik majburiyatlar va xarajatlarni to'lash uchun berilgan ruxsatnomalar doirasida hisobvara-q-fakturalar hamda moliyaviy majburiyatlar mavjudligini tasdiqlovchi hujjatlar asosida g'aznachilik bo'linmalari tomonidan qabul qilinadi hamda ro'yxatdan o'tkaziladi.

Birinchi va ikkinchi guruh xarajatlari, shuningdek ushbu Kodeksning 122-moddasi o'ninchi qismida ko'rsatilgan xarajatlar bo'yicha moliyaviy majburiyatlar yuridik majburiyatlarni qabul qilishga doir buyurtmalar asosida, ish beruvchining fuqarolik javobgarligini majburiy sug'urta qilish bo'yicha esa, ish beruvchining fuqarolik javobgarligini majburiy sug'urta qilish shartnomalari asosida g'aznachilik bo'linmalari tomonidan ro'yxatdan o'tkaziladi.

Amal qilish muddati tugagan shartnomalar bo'yicha yetkazib berilgan tovarlar (ko'rsatilgan xizmatlar, bajarilgan ishlar) haqini to'lash bo'yicha moliyaviy majburiyatlarni ro'yxatdan o'tkazish joriy moliya yili doirasida hamda ushbu Kodeks 122-moddasining sakkizinchi qismida ko'rsatilgan hollarda hisobvara-q-faktura va o'zaro majburiyatlarni solishtirish dalolatnomasi asosida amalga oshiriladi.

124-modda. Kassa xarajatlarini amalga oshirish

G'aznachilik bo'linmalari budjet tashkilotlarining va budjet mablag'lari oluvchilarning buyurtmalari bo'yicha to'lovlarni ularda budjetdan ajratiladigan mablag'lar, yuridik va moliyaviy majburiyatlar mavjud bo'lgan taqdirda, shuningdek budjet tashkilotlari budjetdan tashqari jamg'armalari mablag'larining qoldiqlari doirasida amalga oshiradi.

Budjet tashkilotlari va budjet mablag'lari oluvchilar xarajatlarni to'lash uchun to'lov hujjatlarini g'aznachilik bo'linmalariga to'lov amalga oshiriladigan sanadan kechi bilan bir ish kuni oldin taqdim etadi.

G'aznachilik bo'linmalari tomonidan xizmat ko'rsatiladigan budjet tashkilotlari (budjet mablag'lari oluvchilar) o'rtasidagi, budjet tizimi budjetlarining turli darajalari o'rtasidagi, shuningdek davlat maqsadli jamg'armalari budjetlari o'rtasidagi to'lovlar g'azna memorial orderlari asosida amalga oshiriladi.

Budjet tashkilotlarining va budjet mablag'lari oluvchilarning chet el valyutasidagi to'lovlari hamda pul o'tkazmalari qonunchilikda belgilangan tartibda O'zbekiston Respublikasining norezidentlari foydasiga amalga oshiriladi.

Tovarlarni (ishlarni, xizmatlarni) yetkazib beruvchi tomonidan shaxsiy g'azna hisobvarag'iga joriy yoki kelgusi yilda qaytariladigan Davlat budjeti va davlat maqsadli jamg'armalarining mablag'lari hisobidan o'tgan moliya yilida hosil bo'lgan debitorlik qarzining summasi, tegishli moliya yiliga qo'shimcha davrda qaytariladiganidan tashqari, tegishli budjet daromadlariga o'tkaziladi.

125-modda. Yagona g'azna hisobvarag'idagi mablag'larni boshqarish

O'zbekiston Respublikasi Moliya vazirligi Yagona g'azna hisobvarag'idagi mablag'larni boshqarishni Davlat budjeti daromadlari tushumlari va xarajatlarning qisqa muddatli prognozlarini tuzish yo'li bilan amalga oshiradi.

Qabul qilingan moliyaviy majburiyatlarni bajarish uchun Yagona g'azna hisobvarag'ida mablag'lar yetishmagan taqdirda, O'zbekiston Respublikasi Moliya vazirligi Davlat budjeti xarajatlarning cheklangan hajmini belgilaydi hamda uning asosida budjet tashkilotlari va budjet mablag'lari oluvchilarga xarajatlarni to'lash uchun ruxsatnomalar beradi.

Xarajatlarni to'lash uchun ruxsatnomalar berish tartibi O'zbekiston Respublikasi Vazirlar Mahkamasi tomonidan belgilanadi.

O'zbekiston Respublikasi Moliya vazirligi Yagona g'azna hisobvarag'idagi va boshqa bank hisobvaraqlaridagi budjet tizimi budjetlarining vaqtincha bo'sh turgan mablag'larini boshqaradi.

Yagona g'azna hisobvarag'ining vaqtincha bo'sh turgan mablag'lari mavjud bo'lgan taqdirda, O'zbekiston Respublikasi Moliya vazirligi tijorat banklarida depozitlarga joylashtirilishi mumkin bo'lgan mablag'larning hajmini belgilaydi.

Yagona g'azna hisobvarag'ining vaqtincha bo'sh turgan mablag'larini joylashtirish va ularni tijorat banklarida depozitlarga joylashtirishdan olingan daromadlardan foydalanish tartibi O'zbekiston Respublikasi Vazirlar Mahkamasi tomonidan belgilanadi.

126-modda. Davlat budjeti, davlat maqsadli jamg'armalari va O'zbekiston Respublikasi Tiklanish va taraqqiyot jamg'armasining qo'shimcha manbalaridan foydalanish

O'zbekiston Respublikasi respublika budjetining qo'shimcha manbalari O'zbekiston Respublikasining respublika budjeti taqchilligini qoplashga, joriy moliya yili uchun belgilangan aylanma kassa mablag'larining miqdorini to'ldirishga, qolgan qismi esa, O'zbekiston Respublikasi Vazirlar Mahkamasining qarorlari bilan belgilanadigan tadbirlarni moliyalashtirishga yo'naltiriladi.

Qoraqalpog'iston Respublikasi respublika budjetining, viloyatlar viloyat budjetlarining, Toshkent shahri shahar budjetining, shuningdek tumanlar va shaharlar budjetlarining qo'shimcha manbalari birinchi navbatda joriy moliya yili uchun belgilangan aylanma kassa mablag'larining miqdorini to'ldirishga yo'naltiriladi.

O'zbekiston Respublikasi respublika budjetining, Qoraqalpog'iston Respublikasi respublika budjetining, viloyatlar viloyat budjetlarining, Toshkent shahri shahar budjetining, shuningdek tumanlar va shaharlar budjetlarining qo'shimcha manbalari tegishli budjet hisobidan moliyalashtirilishi nazarda tutilmagan tashkilotlarni saqlab turishga yo'naltirilishi mumkin emas.

O'zbekiston Respublikasi respublika budjeti, davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining qo'shimcha manbalari va yil boshiga qoldiq mablag'lari tegishli ravishda ular umumiy xarajatlarining 3 foizidan oshmagan miqdorda O'zbekiston Respublikasi Prezidentining va Vazirlar Mahkamasining qarorlariga muvofiq foydalaniladi hamda foydalanilgan mablag'lar bo'yicha O'zbekiston Respublikasi Oliy Majlisi palatalariga har chorakda hisobot taqdim etiladi. Mazkur xarajatlar 3 va undan ortiq foizga oshgan taqdirda Davlat budjeti to'g'risidagi Qonunga o'zgartirishlar kiritiladi.

Qoraqalpog'iston Respublikasi respublika budjetining, viloyatlar viloyat budjetlarining, Toshkent shahri shahar budjetining, tumanlar va shaharlar budjetlarining qo'shimcha manbalardan foydalanish to'g'risidagi qarorlar tegishli ravishda Qoraqalpog'iston Respublikasi Jo'qorg'i Kengesi, xalq deputatlari viloyatlar, Toshkent shahar, tumanlar va shaharlar Kengashlari tomonidan Qoraqalpog'iston Respublikasi Vazirlar Kengashining, viloyatlar, Toshkent shahar, tumanlar va shaharlar hokimliklarining takliflariga asosan birinchi navbatda ijtimoiy soha muassasalarining moddiy-texnika bazasini mustahkamlash maqsadida qabul qilinadi.

Tumanlar va shaharlar hokimliklari tumanlar va shaharlar budjetlari qo'shimcha manbalarining kamida 30 foizini jamoatchilik fikri asosida shakllantiriladigan tadbirlarni moliyalashtirishga yo'naltiradi.

Qoraqalpog'iston Respublikasi Vazirlar Kengashi Raisi, viloyatlar, Toshkent shahar, tumanlar va shaharlar hokimlari favqulodda va shunga o'xshash kechiktirib bo'lmaydigan choralar ko'rilishi talab etiladigan hollarda ishlatilgan mablag'lar to'g'risida Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, tumanlar va shaharlar Kengashlariga hisobot berish sharti bilan qo'shimcha manbalarni yo'naltirish bo'yicha qarorlar qabul qiladi.

127-modda. Davlat budjetining daromadlari va xarajatlarini boshqarish

Joriy moliya yili uchun mo'ljallangan Davlat budjeti taqchilligining tasdiqlangan cheklangan miqdori ortgan taqdirda, O'zbekiston Respublikasi Vazirlar Mahkamasi O'zbekiston Respublikasi Moliya vazirligining taqdimnomasiga ko'ra O'zbekiston Respublikasi Oliy Majlisining palatalariga Davlat budjeti xarajatlarini qisqartirish to'g'risida takliflar kiritadi.

Davlat budjeti xarajatlarini qisqartirishda xarajatlarning ustuvorligi va ijtimoiy yo'naltirilganligi budjet tashkilotlarining va budjet mablag'lari oluvchilarning qabul qilingan yuridik hamda moliyaviy majburiyatlari hisobga olingan holda baholanadi.

Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, shuningdek tumanlar va shaharlar Kengashlari o'z budjetlarining balansiligi buzilishiga va Davlat budjeti taqchilligining tasdiqlangan cheklangan miqdori oshishiga olib keladigan tegishli budjet daromadlarini qisqartirishga yoki xarajatlarini ko'paytirishga qaratilgan biror-bir qaror qabul qilishga haqli emas.

Qoraqalpog'iston Respublikasi budjeti, viloyatlar va Toshkent shahar mahalliy budjetlari qabul qilinganidan keyin moliya yili mobaynida Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, shuningdek tumanlar va shaharlar Kengashlarining tegishli budjet daromadlari qisqarishiga olib keladigan qarorlari tegishli budjet xarajatlari qisqartirilgan taqdirdagina qabul qilinishi mumkin.

Agar Davlat budjeti qabul qilinganidan keyin moliya yili mobaynida tegishli budjetlarning daromadlari va xarajatlari parametrlarini ko'paytirish yoki kamaytirish to'g'risida qarorlar qabul qilinsa, O'zbekiston Respublikasi Moliya vazirligi, Qoraqalpog'iston Respublikasi, viloyatlar va Toshkent shahar moliya organlari tomonidan tegishli darajadagi budjetlar hajmlariga o'zgartirishlar kiritiladi. Xarajatlarni ko'paytirish yoki qisqartirish barcha darajadagi budjetlar o'rtasida o'zaro hisob-kitoblar yo'li bilan amalga oshiriladi.

128-modda. Ijro hujjatlari bo'yicha undiruvni Davlat budjeti va davlat maqsadli jamg'armalari mablag'lariga qaratish

Undiruvni Davlat budjeti mablag'lariga qaratishni nazarda tutuvchi ijro hujjatlarini ijro etish moliya organlari tomonidan tegishli budjet mablag'lari hisobidan amalga oshiriladi.

Ijro hujjatlari bo'yicha tegishli budjetdan mablag'lar olish uchun ijro hujjatida kimning foydasiga budjet mablag'lari o'tkazilishi nazarda tutilgan bo'lsa, o'sha shaxslar yoxud ularning vakillari (bundan buyon matnda undiruvchilar deb yuritiladi) tegishli moliya organlariga ijro hujjatining asl nusxasini ilova qilgan holda ariza taqdim etadi. Arizada budjet mablag'lari o'tkazilishi talab qilinayotgan undiruvchining bank hisobvarag'i ko'rsatilgan bo'lishi lozim.

Ijro varaqasi yoki sud buyrug'i sudyaning elektron raqamli imzosi bilan tasdiqlangan elektron hujjat tarzida axborot tizimi orqali taqdim etilishi mumkin.

Moliya organi ijro hujjati kelib tushgan kundan e'tiboran belgilangan tartibda uning ijro etilishini ta'minlaydi.

Undiruvni davlat maqsadli jamg'armalari mablag'lariga qaratishni nazarda tutuvchi ijro hujjatlarini ijro etish davlat maqsadli jamg'armalarini taqsimlovchi organlar tomonidan O'zbekiston Respublikasi Vazirlar Mahkamasi belgilagan tartibda amalga oshiriladi.

129-modda. Ijro hujjatlari bo'yicha budjet tashkilotlarining moliyaviy majburiyatlarini bajarish

Budjet tashkilotlarining moliyaviy majburiyatlari bo'yicha undiruvni nazarda tutuvchi ijro hujjatlarini ijro etish sud hujjatlarini va boshqa organlar hujjatlarini ijro etish to'g'risidagi **qonunchilikka** muvofiq, ushbu moddada belgilangan o'ziga xos xususiyatlar hisobga olingan holda davlat ijrochilari tomonidan amalga oshiriladi. Budjet tashkilotlaridan ijro yig'imi undirilishiga yo'l qo'yilmaydi.

Budjet tashkilotlarining moliyaviy majburiyatlari bo'yicha undiruvni nazarda tutuvchi ijro hujjatlarini ijro etish:

birinchi navbatda budjet tashkilotining budjetdan tashqari jamg'armasi mablag'lari hisobidan;

to'lanishi lozim bo'lgan qarz budjet tashkilotining xarajatlar smetasi bo'yicha xarajatlar moddasiga muvofiq bo'lganda — budjetdan ajratiladigan mablag'lar hajmi doirasida amalga oshiriladi.

130-modda. Qabul qilingan Davlat budjeti va davlat maqsadli jamg'armalarining budjetlari mavjud bo'lmaganda budjetni ijro etish tartibi

Agar kelgusi moliya yili uchun Davlat budjeti, davlat maqsadli jamg'armalari budjetlari yil boshlanguniga qadar qabul qilinmagan bo'lsa, Davlat budjeti va davlat maqsadli jamg'armalari budjetlari quyidagi shartlarga rioya etilgan holda ijro etiladi:

o'tgan moliya yilida amalda bo'lgan soliqlar va boshqa majburiy to'lovlarni taqsimlash normativlari saqlab qolinadi;

boshlanayotgan moliya yilida xarajatlar tasdiqlangan vaqtinchalik xarajatlar smetalariga muvofiq amalga oshiriladi.

Davlat budjeti va davlat maqsadli jamg'armalarining budjetlari moliya yili boshlanganidan keyin qabul qilingan taqdirda, moliya yili mobaynida xarajatlarning umumiy summasi qabul qilingan Davlat budjetiga va davlat maqsadli jamg'armalari budjetlariga muvofiqlashtirilishi kerak.

131-modda. Joriy moliya yilini yakunlash

Joriy moliya yilining budjet tizimi budjetlariga tushumlarni kiritish bilan bog'liq bo'lgan barcha operatsiyalari joriy moliya yilining oxirgi ish kunida yakunlanadi.

Davlat budjetiga va davlat maqsadli jamg'armalarining budjetlariga kelgusi yilda kiritilgan daromadlar yangi boshlangan yil daromadlari hisoblanadi.

Davlat budjeti va davlat maqsadli jamg'armalarining budjetlari daromadlari bo'yicha tranzit hisobvaraqlariga joriy yilning oxirgi ish kuni tugaguniga qadar kiritilgan va yangi boshlangan yilning uch ish kuni mobaynida Yagona g'azna hisobvarag'iga o'tkazilgan daromadlar o'tgan yilning daromadlari hisoblanadi.

Joriy yilning Davlat budjeti va davlat maqsadli jamg'armalari budjetlaridan barcha to'lovlar moliya yiliga qo'shimcha vaqt davri tugaganidan so'ng yakunlanadi.

Qo'shimcha vaqt davrida joriy moliya yili uchun Davlat budjeti va davlat maqsadli jamg'armalari budjetlarini ijro etish bo'yicha operatsiyalar, shu jumladan:

budjetlararo munosabatlarni tartibga solish;

budjet tashkilotlari va budjet mablag'lari oluvchilarning kreditorlik qarzlarini to'lash;

budjet tashkilotlari tomonidan iqtisod qilingan mablag'lar summalarini budjet tashkilotlarining rivojlantirish jamg'armalariga (tibbiyot tashkilotlarining moddiy rag'batlantirish va rivojlantirish jamg'armalariga) o'tkazish;

Davlat budjeti va davlat maqsadli jamg'armalarining budjetlari mablag'lari hisobidan boshqa ruxsat etilgan to'lovlar amalga oshiriladi.

Budjetlararo munosabatlarni tartibga solish yuqori va quyi turuvchi budjetlar, shuningdek davlat maqsadli jamg'armalari budjetlari o'rtasidagi o'zaro qarzdorlikning jami summasi to'lanishini nazarda tutadi.

O'tgan yilni yakunlash bo'yicha qo'shimcha vaqt davrida muayyan to'lovlarni amalga oshirish tartibi va muddatlari O'zbekiston Respublikasi Moliya vazirligi tomonidan belgilanadi.

20-bob. Budjetlararo munosabatlar

132-modda. Budjetlararo munosabatlar tushunchasi

Budjetlararo munosabatlar O'zbekiston Respublikasining respublika budjeti, Qoraqalpog'iston Respublikasining respublika budjeti, viloyatlarning viloyat budjetlari, Toshkent shahrining shahar budjeti, tumanlar, shaharlar budjetlari, shuningdek davlat maqsadli jamg'armalari budjetlari o'rtasidagi ushbu Kodeks bilan tegishli budjetlarga birlashtirilgan xarajatlarni amalga oshirish uchun zarur bo'lgan tegishli budjetlarni moliyaviy resurslar bilan ta'minlashga doir munosabatlardir.

Budjet jarayonida:

O'zbekiston Respublikasi respublika budjetining tumanlar va shaharlar budjetlari bilan;

davlat maqsadli jamg'armalari budjetlarining tumanlar va shaharlar budjetlari bilan;

Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining bir-biri bilan, shuningdek boshqa ma'muriy-hududiy birlikning tumanlari va shaharlari budjetlari bilan;

tumanlar va shaharlar budjetlari o'rtasida o'zaro munosabatlariga yo'l qo'yilmaydi.

133-modda. Budjetlarning darajalari o'rtasida daromadlar va xarajatlarni o'tkazish

Daromadlarni kompensatsiya qilish yoki xarajatlarni qoplash Davlat budjetini ijro etish jarayonida ushbu Kodeksning 138-moddasida nazarda tutilgan, quyi turuvchi budjetlarning daromadlarini va (yoki) xarajatlarini kamaytirishga yoxud ko'paytirishga olib keladigan hollarda o'zaro hisob-kitoblar bo'yicha mablag'larni ajratish yoki olib qo'yish orqali majburiy tartibda amalga oshiriladi.

134-modda. Budjetlararo transfertlarning shakllari

Budjetlararo transfertlar subvensiyalar, o'tkazib beriladigan daromadlar, dotatsiyalar, budjet ssudasi o'zaro hisob-kitoblar bo'yicha mablag'lar, tartibga soluvchi budjetlararo transfertlar va maqsadli ijtimoiy transfertlar shaklida amalga oshiriladi.

Budjetlararo transfertlarning hajmlari:

joriy moliya yilida turli darajadagi budjetlar daromadlari va xarajatlari o'zgarishiga sabab bo'luvchi qonunchilik hujjatlari qabul qilinganda;

tegishli barcha soliqlar va boshqa majburiy to'lovlarning to'liq tushishidan hamda budjetdan ajratiladigan mablag'larning o'zlashtirilishidan kelib chiqqan holda aniqlanadi.

Yuqori turuvchi moliya organi tashabbusi bilan yuqori turuvchi budjet quyi turuvchi budjet oldidagi budjetlararo transfertning bir shakli bo'yicha majburiyatlari quyi turuvchi budjetning yuqori turuvchi budjet oldidagi budjetlararo transfertning boshqa shakli bo'yicha majburiyatlarini kamaytirish evaziga hisobga olinishi mumkin.

135-modda. Subvensiyalar

Subvensiyalar asosiy makroiqtisodiy ko'rsatkichlar prognozi va Davlat budjetining asosiy parametrlari tasdiqlanayotganda belgilangan xarajatlarni amalga oshirish uchun ajratiladi.

O'zbekiston Respublikasining respublika budjetidan Qoraqalpog'iston Respublikasi budjetiga, viloyatlar va Toshkent shahar mahalliy budjetlariga beriladigan subvensiyalarning miqdorlari Davlat budjeti to'g'risidagi qonun loyihasi qabul qilinayotganda belgilanadi.

Qoraqalpog'iston Respublikasining respublika budjetidan, viloyatlarning viloyat budjetlari va Toshkent shahrining shahar budjetidan tumanlar va shaharlar budjetlariga beriladigan subvensiyalarning miqdorlari Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar Kengashlari tomonidan Qoraqalpog'iston Respublikasi budjeti, viloyatlar va Toshkent shahar mahalliy budjetlari to'g'risidagi qarorlar qabul qilinayotganda belgilanadi.

Foydalanilmagan subvensiyalar joriy moliya yili oxirida tegishli yuqori turuvchi budjetga qaytarilishi kerak.

136-modda. O'tkazib beriladigan daromadlar

Tegishli ma'muriy-hududiy birliklar hududida shakllantiriladigan va yuqori turuvchi budjetga o'tkaziladigan daromadlar ular qaysi ma'muriy-hududiy birlikda shakllantirilgan bo'lsa, o'sha ma'muriy-hududiy birlik budjetiga o'tkazib berilishi mumkin.

O'tkazib beriladigan daromadlarning umumiy hajmi:

O'zbekiston Respublikasining respublika budjetidan quyi turuvchi budjetlarga — Davlat budjeti to'g'risidagi qonun loyihasi qabul qilinayotganda;

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan tumanlar va shaharlar budjetlariga — Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar Kengashlari tomonidan Qoraqalpog'iston Respublikasi budjeti, viloyatlar va Toshkent shahar mahalliy budjetlari to'g'risidagi qarorlar qabul qilinayotganda tasdiqlanadi.

O'zbekiston Respublikasining respublika budjetidan quyi turuvchi budjetlarga tushumlari o'tkazib beriladigan xo'jalik yurituvchi subyektlarning hamda ular tomonidan to'lanadigan soliqlar va boshqa majburiy to'lovlarning turlari ro'yxati O'zbekiston Respublikasi Moliya vazirligi tomonidan O'zbekiston Respublikasi Davlat soliq qo'mitasi bilan birgalikda tasdiqlanadi.

Qoraqalpog‘iston Respublikasi budgetidan, viloyatlar va Toshkent shahar mahalliy budgetlaridan tumanlar va shaharlar budgetlariga tushumlari o‘tkazib beriladigan xo‘jalik yurituvchi subyektlarning hamda ular tomonidan to‘lanadigan soliqlar va boshqa majburiy to‘lovlarning turlari ro‘yxati Qoraqalpog‘iston Respublikasi Moliya vazirligi, viloyatlar va Toshkent shahar moliya boshqarmalari tomonidan Qoraqalpog‘iston Respublikasi, viloyatlar va Toshkent shahar davlat soliq boshqarmalari bilan birgalikda tasdiqlanadi.

Yuqori turuvchi budgetdan quyi turuvchi budgetga o‘tkazib beriladigan daromadlarning summasi tegishli quyi turuvchi budgetga tushishi lozim bo‘lgan daromadlar hisobga olingan holda belgilanadi.

O‘tkazib beriladigan daromadlarni o‘tkazish ular bo‘yicha haqiqatda tushgan tushumlar doirasida, biroq ularning tasdiqlangan hajmidan ortiq bo‘lmagan miqdorda amalga oshiriladi.

137-modda. Dotatsiya

Yuqori turuvchi budgetdan quyi turuvchi budgetga dotatsiya quyi turuvchi budget xarajatlarining rejalashtirilgan hajmi subvensiyalar va o‘tkazib beriladigan daromadlar hisobga olingan holda mazkur budget daromadlarining prognoz qilingan hajmidan oshib ketgan taqdirda ajratiladi.

O‘zbekiston Respublikasining respublika budgetidan davlat maqsadli jamg‘armalarining budgetlariga dotatsiya jamg‘armalar xarajatlarining rejalashtirilgan hajmi yil boshidagi qoldiq hisobga olingan holda jamg‘armalar daromadlarining prognoz qilingan hajmidan oshib ketgan taqdirda ajratilishi mumkin.

Dotatsiyaning miqdori:

O‘zbekiston Respublikasining respublika budgetidan quyi turuvchi budgetlarga va davlat maqsadli jamg‘armalari budgetlariga ajratilganda — Davlat budgeti to‘g‘risidagi qonun loyihasi qabul qilinayotganda;

Qoraqalpog‘iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan tumanlar va shaharlar budgetlariga ajratilganda — Qoraqalpog‘iston Respublikasi Jo‘qorg‘i Kengesi, xalq deputatlari viloyatlar va Toshkent shahar Kengashlari tomonidan Qoraqalpog‘iston Respublikasi budgeti, viloyatlar va Toshkent shahar mahalliy budgetlari to‘g‘risidagi qarorlar qabul qilinayotganda belgilanadi.

138-modda. Budgetlararo o‘zaro hisob-kitoblar

Budgetlararo o‘zaro hisob-kitoblar moliya yili mobaynida budgetlar parametrlari o‘zgarganda yuqori va quyi turuvchi budgetlar o‘rtasida yuzaga keladigan o‘zaro pul munosabatlaridir.

Budgetlararo o‘zaro hisob-kitoblar:

qonunchilik hujjatlari qabul qilinganligi;

Qoraqalpog‘iston Respublikasi budgeti, viloyatlar va Toshkent shahar mahalliy budgetlari daromadlarining prognozi aniqlashtirilganligi;

budget tashkilotlari va budget mablag‘lari oluvchilarning bo‘ysunuvi o‘zgarganda xarajatlar bir budgetdan boshqa budgetga o‘tkazilganligi;

kapital qo‘yilmalar limitlari budgetlar darajalari o‘rtasida qayta taqsimlanganligi munosabati bilan yuzaga keladi.

Budgetlararo o‘zaro hisob-kitoblarga kiritilishi lozim bo‘lgan summa yuqori turuvchi moliya organi tomonidan aniqlanadi.

138¹-modda. Maqsadli ijtimoiy transfertlar

Maqsadli ijtimoiy transfertlar yuqori turuvchi budgetdan quyi turuvchi budgetga ta‘lim va tibbiyot muassasalarining ish haqi va ijtimoiy soliq bo‘yicha xarajatlarini qoplash uchun ajratiladi.

Maqsadli ijtimoiy transfertlarning miqdorlari:

O‘zbekiston Respublikasining respublika budgetidan Qoraqalpog‘iston Respublikasi budgetiga, viloyatlar va Toshkent shahar mahalliy budgetlariga — Davlat budgeti to‘g‘risidagi qonun loyihasi qabul qilinayotganda;

Qoraqalpog‘iston Respublikasining respublika budgetidan, viloyatlarning viloyat budgetlari va Toshkent shahrining shahar budgetidan tumanlar va shaharlar budgetlariga — Qoraqalpog‘iston Respublikasi Jo‘qorg‘i Kengesi, xalq deputatlari viloyatlar va Toshkent shahar Kengashlari tomonidan Qoraqalpog‘iston Respublikasi budgeti, viloyatlar va Toshkent shahar mahalliy budgetlari to‘g‘risidagi qarorlar qabul qilinayotganda belgilanadi.

Foydalanilmagan maqsadli ijtimoiy transfertlar joriy moliya yili oxirida tegishli yuqori turuvchi budgetga qaytarilishi kerak.

138²-modda. Tartibga soluvchi budgetlararo transfertlar

Tartibga soluvchi budgetlararo transfertlar qaytarilmaslik sharti bilan Qoraqalpog‘iston Respublikasi budgeti, viloyatlar va Toshkent shahar mahalliy budgetlari, davlat maqsadli jamg‘armalari budgetlari xarajatlarining tegishli daromadlar prognozlaridan oshgan qismini qoplash uchun beriladi.

Tartibga soluvchi budgetlararo transfertlarning miqdorlari:

O‘zbekiston Respublikasining respublika budgetidan Qoraqalpog‘iston Respublikasi budgetiga, viloyatlar va Toshkent shahar mahalliy budgetlariga — Davlat budgeti to‘g‘risidagi qonun loyihasi qabul qilinayotganda;

Qoraqalpog‘iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan tumanlar va shaharlar budgetlariga — Qoraqalpog‘iston Respublikasi budgeti, viloyatlar va Toshkent shahar mahalliy budgetlari to‘g‘risidagi qarorlar tasdiqlanayotganda belgilanadi.

Davlat budgeti to‘g‘risidagi Qonunga muvofiq O‘zbekiston Respublikasining respublika budgetidan Qoraqalpog‘iston Respublikasi budgetiga, viloyatlar va Toshkent shahar mahalliy budgetlariga, shuningdek Qoraqalpog‘iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan tumanlar va shaharlar budgetlariga ajratiladigan tartibga soluvchi budgetlararo transfertlar miqdorlarini, quyi turuvchi budgetlarning daromdlari prognozlarining ijrosidan qat’i nazar, kamaytirishga yo‘l qo‘yilmaydi.

139-modda. Budgetlararo transfertlarni o‘tkazish tartibi

O‘zbekiston Respublikasining respublika budgetidan budgetlararo transfertlar O‘zbekiston Respublikasi respublika budgetining shaxsiy g‘azna hisobvarag‘idan Qoraqalpog‘iston Respublikasi respublika budgetining, viloyatlar viloyat budgetlarining va Toshkent shahri shahar budgetining, shuningdek davlat maqsadli jamg‘armalari budgetlarining shaxsiy g‘azna hisobvaraqlariga o‘tkaziladi.

Qoraqalpog‘iston Respublikasining respublika budgetidan, viloyatlarning viloyat budgetlaridan va Toshkent shahrining shahar budgetidan budgetlararo transfertlar ularning shaxsiy g‘azna hisobvaraqlaridan tumanlar, shaharlar budgetlarining shaxsiy g‘azna hisobvaraqlariga, shuningdek davlat maqsadli jamg‘armalari budgetlarining shaxsiy g‘azna hisobvaraqlariga o‘tkaziladi.

Davlat maqsadli jamg‘armalari budgetlaridan budgetlararo transfertlar ularning shaxsiy g‘azna hisobvaraqlaridan O‘zbekiston Respublikasi respublika budgetining, Qoraqalpog‘iston Respublikasi respublika budgetining, viloyatlar viloyat budgetlarining va Toshkent shahri shahar budgetining shaxsiy g‘azna hisobvaraqlariga o‘tkaziladi.

Budgetlararo transfertlarni o‘tkazish g‘azna memorial orderlari asosida amalga oshiriladi.

Budgetlararo transfertlar bo‘yicha hisob-kitoblar joriy moliya yilida qo‘shimcha vaqt davri hisobga olingan holda tugallanishi kerak.

140-modda. Budget ssudasi shaklidagi budgetlararo transfert

Budget ssudasi shaklidagi budgetlararo transfert (budget ssudasi) budget manbalarining to‘liq safarbar qilinishi tegishli budgetlarda nazarda tutilgan xarajatlar qoplanishini ta‘minlamagan taqdirda, qaytarish sharti bilan foizsiz yoki foiz to‘lash sharti bilan beriladi.

Budget ssudasi:

bir moliya yilida prognoz qilingan daromadlar va rejalashtirilgan xarajatlar o'rtasidagi rejali vaqtinchalik kassa uzilishini qoplash uchun — to'qqiz oygacha bo'lgan muddatga foizsiz asosda;

daromadlar tushumlari va xarajatlarni amalga oshirish o'rtasida kutilayotgan vaqtinchalik kassa uzilishlarini qoplash uchun — bir moliya yili ichida olti oygacha bo'lgan muddatga foizsiz asosda hamda bir moliya yilidan ortiq, ammo uch moliya yilidan ortiq bo'lmagan muddatga yillik ikki foizli miqdorda beriladi.

Rejali budjet ssudasi daromadlarning prognoz qilingan tushumlari, nazarda tutilgan budjetlararo transfertlar, aylanma kassa mablag'laridan va yil boshidagi erkin qoldiqlardan vaqtinchalik mablag' jalb qilish, tegishli tasdiqlangan budjetlarda nazarda tutilgan ayrim choraklardagi xarajatlarning qoplanishini ta'minlamagan hollarda beriladi.

Budjet ssudasi:

O'zbekiston Respublikasining respublika budjeti mablag'lari hisobidan — Qoraqalpog'iston Respublikasining respublika budjetiga, viloyatlarning viloyat budjetlariga, Toshkent shahrining shahar budjetiga, davlat maqsadli jamg'armalari budjetlariga;

Qoraqalpog'iston Respublikasining respublika budjeti, viloyatlarning viloyat budjetlari, Toshkent shahrining shahar budjeti mablag'lari hisobidan — tumanlar va shaharlar budjetlariga ularning daromadlari hamda xarajatlari o'rtasidagi rejali yoki kutilayotgan vaqtinchalik kassa uzilishini qoplash uchun beriladi.

Qoraqalpog'iston Respublikasining respublika budjetiga, viloyatlarning viloyat budjetlariga, Toshkent shahrining shahar budjetiga, tumanlar va shaharlar budjetlariga, davlat maqsadli jamg'armalari budjetlariga daromadlar to'liq tushmagan yoki ularning moliya yili uchun tegishli budjetlarda nazarda tutilgan xarajatlarni muddatidan oldin amalga oshirish zarurati yuzaga kelgan, tegishli budjet daromadlari va xarajatlarini muvozanatlashtirish bo'lmagan taqdirda, O'zbekiston Respublikasi Moliya vazirligiga, Qoraqalpog'iston Respublikasi Moliya vazirligiga, viloyatlar va Toshkent shahar hokimliklarining moliya boshqarmalariga yozma yoki elektron shaklda murojaat qilish budjet ssudasi ajratilishi uchun asos bo'lishi mumkin.

Ajratiladigan budjet ssudalarining miqdorlari kelgusi moliya yili uchun alohida choraklardagi daromadlar va xarajatlar o'rtasida yuzaga keladigan rejali vaqtinchalik kassa uzilishini qoplash uchun tegishli budjetning yillik rejali daromadlari hamda xarajatlari har chorakda qayta taqsimlanayotganda belgilanadi.

Budjet ssudalarini berishning majburiy sharti ulardan belgilangan maqsadda foydalanish, shuningdek budjet ssudasini ajratish to'g'risidagi shartnomada belgilangan muddatga muvofiq ularni o'z vaqtida qoplashdan iboratdir.

Budjet ssudasi Qoraqalpog'iston Respublikasi Vazirlar Kengashi va tegishli hokimliklarning, davlat maqsadli jamg'armasini taqsimlovchi organ rahbarining budjet ssudasiga bo'lgan ehtiyojni asoslovchi hisob-kitoblar ilova qilingan so'rovi asosida beriladi.

Budjet ssudasi olish to'g'risidagi so'rovda so'ralayotgan budjet ssudasining miqdori va u so'ralayotgan davr, shuningdek budjet ssudasini qaytarishning kafolatlangan manbalari ko'rsatiladi.

Budjet ssudasini berish to'g'risidagi so'rovni ko'rib chiqishda moliya organi qaror qabul qilish uchun zarur bo'lgan axborot va hisob-kitoblarni so'rab olish huquqiga ega.

Taqdim etiladigan axborot va hisob-kitoblarda kassa uzilishi sabablarining quyidagi batafsil tahlili keltiriladi:

a) tegishli budjetning yil boshidan oxirgi hisobot davrigacha bo'lgan ijrosi to'g'risidagi axborot;

b) hisobot davri uchun kassa uzilishlarining yuzaga kelishiga sabab bo'luvchi daromadlarning belgilangan prognoz ko'rsatkichlari;

v) soliq to'lovlari bo'yicha budjet oldidagi qarzdorlik miqdori va uning shakllanish sabablari, hudud bo'yicha qarzdorlikning o'sib borishi;

g) tegishli davr uchun budjetda nazarda tutilgan budjet tasnifining tegishli kodlari bo'yicha birinchi navbatdagi xarajatlar miqdori;

d) kutilayotgan daromadlar tushumi, shu jumladan soliq turlari bo'yicha va tegishli hisobot davri uchun kutilayotgan xarajatlar;

e) kassa uzilishi yuzaga kelishi sabablarining izohi, so'rovning asoslanganligi va budget ssudasining o'z vaqtida qaytarilishini ta'minlovchi chora-tadbirlar rejasi.

Budget ssudasini berish to'g'risidagi murojaat tegishli moliya organi tomonidan murojaat olingan sanadan e'tiboran besh ish kuni ichida ko'rib chiqiladi va uning natijasi to'g'risida murojaat etuvchiga xabar qilinadi.

Budget ssudasini olish to'g'risidagi so'rovni ko'rib chiqish natijasi ijobiy bo'lgan taqdirda tegishli moliya organi bir ish kuni ichida arizachini ajratiladigan budget ssudasining miqdori, uni ajratishdan maqsad va belgilangan qaytarib berish muddatlari to'g'risida xabar qiladi.

Budget ssudasini berish rad etilgan taqdirda tegishli moliya organi bir ish kuni ichida budget ssudasi berish rad etilganligi to'g'risida aniq sabablar va asoslarni ko'rsatgan holda arizachiga xabar qiladi.

Axborot va hisob-kitoblar taqdim etilmagan yoki to'liq taqdim etilmagan taqdirda budget ssudasini olish uchun so'rov ko'rib chiqilmaydi hamda budget ssudasini berish rad etilganligi to'g'risida arizachiga ikki ish kuni ichida xabar qilinadi.

O'zbekiston Respublikasining respublika budgetidan beriladigan budget ssudasini ajratish uchun taqdim etiladigan axborot va hisob-kitoblar:

hududiy moliya organlari va davlat soliq boshqarmalari tomonidan tayyorlanadi hamda tegishincha Qoraqalpog'iston Respublikasi Vazirlar Kengashi Raisi, viloyatlar va Toshkent shahar hokimlari yoki ularning birinchi o'rinbosarlari tomonidan imzolanadi;

davlat maqsadli jamg'armalarini taqsimlovchi organlar tomonidan tayyorlanadi va ularning rahbarlari tomonidan imzolanadi.

Qoraqalpog'iston Respublikasining respublika budgetidan, viloyatlarning viloyat budgetlaridan, Toshkent shahrining shahar budgetidan budget ssudasini ajratish uchun taqdim etiladigan axborot hamda hisob-kitoblar tumanlar va shaharlar hokimlari yoki ularning birinchi o'rinbosarlari tomonidan imzolanadi.

Qoraqalpog'iston Respublikasi Vazirlar Kengashi va tegishli hokimliklarning, davlat maqsadli jamg'armasini taqsimlovchi organ rahbarining so'rovini ko'rib chiqish natijalari bo'yicha besh ish kuni ichida quyidagilardan:

O'zbekiston Respublikasining respublika budgetidan budget ssudasini berish to'g'risidagi qaror — O'zbekiston Respublikasi moliya vaziri tomonidan;

Qoraqalpog'iston Respublikasining respublika budgetidan, viloyatlarning viloyat budgetlaridan, Toshkent shahrining shahar budgetidan budget ssudasini berish to'g'risidagi qaror — tegishincha Qoraqalpog'iston Respublikasi moliya vaziri, viloyatlar va Toshkent shahar moliya boshqarmalari boshliqlari tomonidan qabul qilinadi.

Budget ssudasini ajratish budget ssudasini berayotgan moliya organi va budget ssudasini oluvchi moliya organi (davlat maqsadli jamg'armalarini taqsimlovchi organ) o'rtasida tuziladigan budget ssudasini ajratish to'g'risidagi shartnoma bilan rasmiylashtiriladi.

Budget ssudasini qaytarish muddatlarini uzaytirish budget ssudasini oluvchida uni belgilangan muddatlarda o'z vaqtida to'lash imkoniyatini istisno etadigan moliyaviy qiyinchiliklar yuzaga kelgan hollarda amalga oshiriladi.

Budget ssudasini qaytarish muddatlarini uzaytirish budget ssudasini berish uchun ushbu moddada belgilangan tartibda va shartlarda amalga oshiriladi.

Budget ssudalarini qaytarish muddatlari kelgusi moliya yiliga uzaytirilganda, budget ssudalarining qaytarilmagan qismidan yillik ikki foiz miqdorida to'lov belgilanadi va budget ssudalari qaysi tegishli budgetlardan berilgan bo'lsa, o'sha budgetlarga yo'naltiriladi.

Budget ssudasini oluvchi tegishli moliya organiga budget ssudasini to'lash muddatini uzaytirish to'g'risidagi so'rov bilan uni to'lash muddati tugashidan kamida besh ish kuni oldin murojaat qiladi.

Budget ssudasini to'lash budget ssudasini ajratish to'g'risidagi shartnomada belgilangan muddatlarda:

mablag'larni o'tkazish;

quyi turuvchi budjetlarga va davlat maqsadli jamg'armalariga o'tkazilishi lozim bo'lgan budjetlararo transfertlar evaziga o'zaro hisobga olish;

ish haqini to'lash, ijtimoiy ehtiyojlarga ajratmalar, stipendiyalar, pensiyalar, kam ta'minlangan oilalarga moddiy yordam, kompensatsiya to'lovlari va nafaqalar to'lash xarajatlari qoplanganidan keyin quyi turuvchi budjetlarning hamda davlat maqsadli jamg'armalari budjetlarining shaxsiy g'azna hisobvaraqlaridan mablag'larni so'zsiz undirib olish yo'li bilan amalga oshiriladi.

141-modda. Aylanma kassa mablag'lari

O'zbekiston Respublikasi respublika budjetining, Qoraqalpog'iston Respublikasi respublika budjetining, viloyatlar viloyat budjetlarining, Toshkent shahri shahar budjetining, shuningdek tumanlar, shaharlar budjetlarining aylanma kassa mablag'lari ularning daromadlari bilan xarajatlari o'rtasidagi vaqtinchalik kassa uzilishini qoplash maqsadida shakllantiriladi.

Aylanma kassa mablag'larining miqdorlari:

O'zbekiston Respublikasining respublika budjeti, Qoraqalpog'iston Respublikasi budjeti, viloyatlar va Toshkent shahar mahalliy budjetlari uchun — O'zbekiston Respublikasi Prezidentining yoki O'zbekiston Respublikasi Vazirlar Mahkamasining qarori bilan;

tumanlar va shaharlar budjetlari uchun — Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar Kengashlari tomonidan Qoraqalpog'iston Respublikasi budjeti, viloyatlar va Toshkent shahar mahalliy budjetlari to'g'risidagi qarorlar qabul qilinayotganda belgilanadi.

Yil mobaynida aylanma kassa mablag'laridan jalb qilingan summalar yil oxirigacha tiklanishi lozim. Aylanma kassa mablag'larining yil oxiridagi miqdori belgilangan summaga mos kelishi kerak.

Kelgusi moliya yili uchun belgilangan aylanma kassa mablag'lari:

tegishli budjetlarning shaxsiy g'azna hisobvaraqlaridagi mablag'larning yil boshidagi qoldiqlari;

joriy yilning birinchi — uchinchi choraklari yakunlari bo'yicha daromadlar prognozining oshirib bajarilishi summolari hisobidan to'ldiriladi.

Tumanlar va shaharlar budjetlarining ushbu moddaning **to'rtinchi qismida** ko'rsatilgan manbalari yetarli bo'lmaganda tumanlar va shaharlar budjetlarining aylanma kassa mablag'larini to'ldirish to'g'risida Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tomonidan qaror qabul qilinishi mumkin.

142-modda. Qoraqalpog'iston Respublikasi budjetiga, viloyatlar va Toshkent shahar mahalliy budjetlariga qo'llaniladigan cheklovlar

Qoraqalpog'iston Respublikasi budjeti, viloyatlar va Toshkent shahar mahalliy budjetlari balanslashtirilgan daromadlar va xarajatlarga ega bo'lishi lozim. Qoraqalpog'iston Respublikasi budjeti, viloyatlar va Toshkent shahar mahalliy budjetlari taqchilligiga yo'l qo'yilmaydi.

Qoraqalpog'iston Respublikasi budjeti, viloyatlar va Toshkent shahar mahalliy budjetlarini qabul qilish va ijro etishda:

mablag'lar jalb qilishni amalga oshirishga, yuqori turuvchi budjetlardan budjet ssudalari olish bundan mustasno;

tasdiqlangan budjetdan ajratilgan mablag'lardan ortiq xarajatlarni amalga oshirishga, ushbu Kodeksning 143-moddasi **ikkinchi qismida** nazarda tutilgan hollar bundan mustasno;

tegishli budjetlar mablag'lari hisobidan boshqa yuridik va jismoniy shaxslar foydasiga moliyaviy kafolatlar va kafilliklar berishga;

Qoraqalpog'iston Respublikasi respublika budjetining, viloyatlar viloyat budjetlarining, Toshkent shahri shahar budjetining, shuningdek tumanlar va shaharlar budjetlarining mablag'lari hisobidan moliyalashtirish manbasi aniq bo'lmasdan boshlangan tadbirlarni moliyalashtirishga va (yoki) parallel loyihalashtirish, tender savdolarini o'tkazmasdan amalga oshirilgan qurish va ta'mirlash ishlarini moliyalashtirishga;

yuridik va jismoniy shaxslarga budjet ssudalari va kredit liniyalari berishga yo'l qo'yilmaydi.

21-bob. Budjet tizimi budjetlariga o'zgartirishlar kiritish

143-modda. Budjet tizimi budjetlariga o'zgartirishlar kiritish tartibi

Moliya yili mobaynida budjet tizimi budjetlariga o'zgartirishlar kiritish:

budjet tizimi budjetlari daromadlari va (yoki) xarajatlarini kamaytirishni yoki ko'paytirishni nazarda tutuvchi qonunchilik hujjatlari o'zgargan;

bir budjet tashkiloti va budjet mablag'lari oluvchi uchun budjetdan ajratiladigan mablag'lar kamaytirilib, mos ravishda boshqa budjet tashkiloti va budjet mablag'lari oluvchi uchun budjetdan ajratiladigan mablag'lar ko'paytirilgan;

budjet tashkilotlari va budjet mablag'lari oluvchilarda budjetdan ajratiladigan mablag'lar xarajatlarning bir moddasidan boshqa moddasiga o'tkazish zaruriyati yuzaga kelgan;

Davlat budjeti mablag'larining moliya yili boshidagi erkin qoldiqlari ushbu Kodeksning 126-moddasida nazarda tutilgan tartibda xarajatlarni moliyalashtirishga yo'naltirilgan;

budjet tasnifiga o'zgartirishlar kiritilgan;

ushbu Kodeks 120-moddasining to'rtinchi qismida nazarda tutilgan hollarda amalga oshiriladi.

Davlat budjeti daromadlari prognozining oshirib bajarilishi, Qoraqalpog'iston Respublikasining respublika budjetiga, viloyatlarning viloyat budjetlariga va Toshkent shahrining shahar budjetiga davlat daromadiga o'tkazilgan mol-mulkni realizatsiya qilishdan, shuningdek elektron savdo maydonchasida yer uchastkalariga bo'lgan huquqlarni realizatsiya qilishdan tushgan mablag'lar hisobidan xarajatlar Davlat budjetiga o'zgartirishlar kiritilmasdan amalga oshiriladi.

Budjet tizimi budjetlarini ijro etishda budjet tizimi budjetlarining daromadlari va xarajatlariga kiritilgan o'zgartirishlar O'zbekiston Respublikasi Moliya vazirligining axborot tizimida hisobga olinadi.

Moliya yili mobaynida Qoraqalpog'iston Respublikasi budjeti, viloyatlar va Toshkent shahar mahalliy budjetlari xarajatlariga ularning tasdiqlangan parametrlari doirasida birinchi va ikkinchi guruh xarajatlari, shuningdek oziq-ovqat mahsulotlari va dori-darmonlar sotib olish xarajatlari bo'yicha budjetdan ajratiladigan mablag'larni ko'paytirish yoki kamaytirishni nazarda tutuvchi o'zgartirishlar faqat O'zbekiston Respublikasi Moliya vazirligi bilan kelishilgandan keyin amalga oshiriladi.

Davlat budjeti daromadlari va xarajatlariga tasdiqlangan budjetlar doirasida uning ijrosi jarayonida qonunchilik hujjatlari asosida o'zgartirishlar kiritish tegishincha O'zbekiston Respublikasi Moliya vazirligi va hududiy moliya organlari tomonidan amalga oshiriladi hamda O'zbekiston Respublikasi Moliya vazirligining axborot tizimida hisobga olib boriladi.

Budjet tashkilotlarining budjetdan tashqari jamg'armalari mablag'lari hisobidan amalga oshiriladigan xarajatlarni ularning tasdiqlangan hajmlariga nisbatan ko'paytirish, ularning o'rnini qoplash manbalari mavjud bo'lgan taqdirda, Davlat budjeti to'g'risidagi Qonunga o'zgartirishlar kiritilmasdan amalga oshiriladi.

145-modda. O'zbekiston Respublikasi respublika budjetining xarajatlar yoyilmasiga o'zgartirishlar kiritish tartibi

Birinchi darajali budjet mablag'larini taqsimlovchi uchun O'zbekiston Respublikasi respublika budjetidan ajratiladigan mablag'larni boshqa birinchi darajali budjet mablag'larini taqsimlovchiga o'tkazish (bundan ushbu moddaning ikkinchi qismida ko'rsatilgan hollar mustasno):

10 va undan ortiq foiz miqdorda O'zbekiston Respublikasi Hisob palatasi xulosasi asosida O'zbekiston Respublikasi Oliy Majlisining palatalari tomonidan;

10 foizdan kam miqdorda O'zbekiston Respublikasi Moliya vazirligining taklifi asosida O'zbekiston Respublikasi Vazirlar Mahkamasi tomonidan amalga oshiriladi.

Davlat budjeti to'g'risidagi Qonunga muvofiq birinchi darajali budjet mablag'lari taqsimlovchilarga O'zbekiston Respublikasi respublika budjetidan ajratiladigan mablag'lar tarkibida nazarda tutilgan qayta taqsimlanadigan mablag'lar birinchi darajali budjet mablag'larini

taqsimlovchilar uchun O'zbekiston Respublikasi respublika budjetidan ajratiladigan mablag'larni hamda Qoraqalpog'iston Respublikasi budjeti, viloyatlar va Toshkent shahar mahalliy budjetlariga beriladigan budjetlararo transfertlarni ko'paytirish orqali O'zbekiston Respublikasi Moliya vazirligi tomonidan qayta taqsimlanadi.

Birinchi darajali budjet mablag'larini taqsimlovchilar uchun ajratilgan budjet mablag'lari doirasida bir ikkinchi darajali budjet mablag'larini taqsimlovchi uchun ajratilgan mablag'larni boshqa ikkinchi darajali budjet mablag'larini taqsimlovchiga o'tkazish:

10 va undan ortiq foiz miqdorda O'zbekiston Respublikasi Moliya vazirligining taklifiga ko'ra O'zbekiston Respublikasi Vazirlar Mahkamasi tomonidan;

10 foizdan kam miqdorda tegishli birinchi darajali budjet mablag'larini taqsimlovchining taklifiga ko'ra O'zbekiston Respublikasi Moliya vazirligi tomonidan amalga oshiriladi.

Obyektlarni loyihalashtirish, qurish (rekonstruksiya qilish) va jihozlash uchun kapital qo'yilmalarni amalga oshirish uchun nazarda tutilgan mablag'larni joriy xarajatlarga yo'naltirish taqiqlanadi.

O'zbekiston Respublikasi Vazirlar Mahkamasining zaxira jamg'armasidan mablag'larni ajratish hamda birinchi darajali budjet mablag'larini taqsimlovchilarni qayta tashkil etish Davlat budjeti to'g'risidagi Qonunga o'zgartirishlar kiritilmasdan amalga oshiriladi.

147-modda. Qoraqalpog'iston Respublikasi respublika budjetining, viloyatlar viloyat budjetlarining va Toshkent shahri shahar budjetining xarajatlari yoyilmasiga o'zgartirishlar kiritish tartibi

Bir hududiy budjet mablag'larini taqsimlovchi uchun ajratilgan budjet mablag'larini boshqa hududiy budjet mablag'larini taqsimlovchiga o'tkazish ajratiladigan budjet mablag'larining cheklangan miqdorining:

10 va undan ortiq foiz miqdorda Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar Kengashlari tomonidan;

10 foizdan kam miqdorda Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari tomonidan amalga oshiriladi, bundan ushbu Kodeks 145-moddasining **ikkinchi qismida** nazarda tutilgan hollar mustasno.

Hududiy budjet mablag'larini taqsimlovchi tasarrufidagi bir budjet tashkiloti va budjet mablag'lari oluvchidan boshqa budjet tashkiloti va budjet mablag'lari oluvchi uchun budjetdan ajratiladigan mablag'larni o'tkazish hududiy budjet mablag'larini taqsimlovchilar so'roviga ko'ra tegishli hududiy moliya organlari tomonidan amalga oshiriladi.

148-modda. Tumanlar va shaharlar budjetlarining xarajatlari yoyilmasiga o'zgartirishlar kiritish tartibi

Bir hududiy budjet mablag'larini taqsimlovchi uchun ajratilgan budjet mablag'larni boshqa hududiy budjet mablag'larini taqsimlovchiga o'tkazish ajratiladigan budjet mablag'larining cheklangan miqdorining:

10 foiz va undan ortiq miqdorda xalq deputatlari tumanlar va shaharlar Kengashlari tomonidan;

10 foizdan kam miqdorda tumanlar va shaharlar hokimliklari tomonidan amalga oshiriladi, bundan ushbu Kodeks 145-moddasining **ikkinchi qismida** nazarda tutilgan hollar mustasno.

Tumanlar va shaharlar budjetlaridan moliyalashtiriladigan hududiy budjet mablag'larini taqsimlovchi tasarrufidagi bir budjet tashkiloti va budjet mablag'lari oluvchidan boshqa budjet tashkiloti va budjet mablag'lari oluvchi uchun budjetdan ajratiladigan mablag'larni o'tkazish hududiy budjet mablag'larini taqsimlovchilar so'roviga ko'ra tumanlar va shaharlar hokimliklarining moliya bo'limlari tomonidan amalga oshiriladi.

149-modda. Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasi xarajatlarga o'zgartirishlar kiritish tartibi

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlarga ularning tasdiqlangan hajmlariga nisbatan 3 foiz va undan ortiq

miqdorga ko'paytirishni yoki kamaytirishni nazarda tutadigan o'zgartirishlar kiritish O'zbekiston Respublikasi Vazirlar Mahkamasining taqdimiga ko'ra O'zbekiston Respublikasi Oliy Majlisining palatalari tomonidan amalga oshiriladi.

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlariga ularning tasdiqlangan hajmlariga nisbatan 3 foizdan kam miqdorda ko'paytirish yoki kamaytirishni nazarda tutadigan o'zgartirishlar kiritish davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasi taqsimlovchi organlarining taqdimiga ko'ra O'zbekiston Respublikasi Vazirlar Mahkamasi tomonidan amalga oshiriladi.

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlarini ularning tasdiqlangan hajmlariga nisbatan ko'paytirish ularni qoplash manbalari mavjud bo'lgan taqdirda amalga oshiriladi.

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlariga ularning tasdiqlangan umumiy hajmlarini ko'paytirmasdan yoki kamaytirmasdan o'zgartirishlar kiritish davlat maqsadli jamg'armalarini hamda O'zbekiston Respublikasi Tiklanish va taraqqiyot jamg'armasining taqsimlovchi organlari tomonidan O'zbekiston Respublikasi Moliya vazirligi bilan kelishuvga ko'ra amalga oshiriladi.

150-modd. Xarajatlar smetasiga va shtat jadvaliga o'zgartirishlar kiritish tartibi

Budjet tashkilotining yoki budjet mablag'lari oluvchining so'roviga ko'ra moliya yilida uning uchun nazarda tutilgan xarajatlarning ayrim moddalar bo'yicha budjetdan ajratiladigan mablag'larning hajmlari xarajatlarning boshqa moddalari bo'yicha budjetdan ajratiladigan mablag'lar teng miqdorda kamaytirilgan hamda budjet tashkiloti yoki budjet mablag'lari oluvchi uchun nazarda tutilgan budjetdan ajratiladigan mablag'larning tasdiqlangan umumiy hajmi saqlab qolingan holda ko'paytirilishi mumkin. Mazkur o'zgartirishlar budjet tashkilotlari va budjet mablag'lari oluvchilar tomonidan xarajatlar smetasiga yiliga ko'pi bilan to'rt marta kiritiladi va:

O'zbekiston Respublikasining respublika budjetidan moliyalashtiriladigan budjet tashkilotlari va budjet mablag'lari oluvchilar bo'yicha — budjet mablag'larini taqsimlovchi tomonidan;

budjet mablag'larini taqsimlovchilar bo'yicha — O'zbekiston Respublikasi Moliya vazirligi tomonidan;

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan moliyalashtiriladigan budjet tashkilotlari va budjet mablag'lari oluvchilar bo'yicha — Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan;

tumanlar va shaharlar budjetlaridan moliyalashtiriladigan budjet tashkilotlari va budjet mablag'lari oluvchilar bo'yicha — tumanlar va shaharlar hokimliklarining moliya bo'limlari tomonidan;

davlat maqsadli jamg'armalari budjetlaridan moliyalashtiriladigan budjet mablag'lari oluvchilar bo'yicha — davlat maqsadli jamg'armalarini taqsimlovchi organlar tomonidan ro'yxatdan o'tkaziladi.

Budjet tashkilotlarining xarajatlar smetasiga kiritiladigan o'zgartirishlar soni hisobga olinayotganda budjet tashkilotlarida ishlovchi ayollarga homiladorlik va tug'ish nafaqasi to'lash uchun budjet tashkilotining tasdiqlangan xarajatlar smetasi doirasida budjetdan ajratiladigan mablag'larni bir moddadan boshqa moddaga ko'paytirishni yoki kamaytirishni nazarda tutuvchi o'zgartirishlar hisobga olinmaydi.

Budjet tashkilotining va budjet mablag'lari oluvchining so'roviga ko'ra kamaytirish tomonga o'zgartirishlar kiritishga yo'l qo'yilmaydigan xarajatlar moddalari O'zbekiston Respublikasi Moliya vazirligi tomonidan belgilanadi.

Qonunchilikka muvofiq ish haqi miqdorlari oshirilishi munosabati bilan budjet tashkilotining shtat jadvaliga kiritiladigan o'zgartirishlar moliya organi tomonidan ro'yxatdan o'tkazilmaydi.

Budjet tashkilotining shtat jadvaliga kiritilgan o'zgartirishlar O'zbekiston Respublikasi Moliya vazirligi tomonidan belgilangan shakl bo'yicha tegishli moliya organida ro'yxatdan o'tkazilishi lozim, ushbu moddaning **uchinchi qismida** ko'rsatilgan hollar bundan mustasno.

22-bob. Davlat budjeti taqchilligi va profitsiti. Davlat tomonidan mablag' jalb qilish

151-modda. Davlat budjeti taqchilligini moliyalashtirish. Davlat budjeti profitsiti

Davlat budjeti taqchilligi:

belgilangan normativlar bo'yicha davlat aktivlarini sotishdan olingan daromadlarning O'zbekiston Respublikasi respublika budjetiga ajratmalari;

O'zbekiston Respublikasi respublika budjeti mablag'larining moliya yili boshidagi qoldiqlari;

davlat tomonidan mablag' jalb qilish;

qonunchilikka muvofiq boshqa manbalar hisobidan moliyalashtiriladi.

O'zbekiston Respublikasi Markaziy bankining kreditlarini Davlat budjeti taqchilligini qoplash manbasi sifatida jalb qilishga yo'l qo'yilmaydi.

Davlat budjetining daromadlari uning xarajatlaridan ortishi Davlat budjeti profitsitidir.

Davlat budjeti profitsiti faqat Davlat budjeti bo'yicha aniqlanadi.

152-modda. Davlat tomonidan mablag' jalb qilish

Davlat tomonidan mablag' jalb qilish ichki va xorijdan mablag' jalb qilishdan iborat.

Davlat tomonidan ichki mablag'ni jalb qilish O'zbekiston Respublikasi rezidentlaridan mablag'larni jalb etish bo'lib, bu mablag'lar bo'yicha O'zbekiston Respublikasining qarz oluvchi yoki qarz oluvchi-rezidentlarning kreditlarini (qarzlarini) to'lashga kafil sifatidagi majburiyatlari yuzaga keladi.

Chet el manbalaridan (chet davlatlar, xalqaro tashkilotlardan, xalqaro moliya va iqtisodiy institutlardan, chet el hukumatlarining moliya tashkilotlari va O'zbekiston Respublikasining boshqa norezidentlaridan) mablag'larni jalb etish davlat tomonidan xorijdan mablag' jalb qilish bo'lib, bu mablag' bo'yicha O'zbekiston Respublikasining qarz oluvchi yoki qarz oluvchi-rezidentlarning kreditlarini (qarzlarini) to'lashga kafil sifatidagi majburiyatlari yuzaga keladi.

Davlat tomonidan mablag' jalb etish bo'yicha qarorlar belgilangan tartibda qabul qilinadi.

Davlat tomonidan mablag' jalb qilish:

O'zbekiston Respublikasi Davlat budjetining taqchilligini qoplash;

ijtimoiy va infratuzilma loyihalarini, shuningdek atrof-muhitni muhofaza qilishga qaratilgan loyihalarni moliyalashtirish;

davlat qarzini qayta moliyalashtirish;

davlat qarzini boshqarish strategiyasida belgilangan maqsadlarga erishish;

pul mablag'larini boshqarish, shu jumladan vaqtinchalik kassa uzilishining o'rnini qoplash bo'yicha operatsiyalarni bajarish;

to'lov balansini qo'llab-quvvatlash uchun amalga oshiriladi.

Davlat tomonidan mablag' jalb qilish birinchi navbatda O'zbekiston Respublikasi Davlat budjetining taqchilligini qoplash uchun amalga oshiriladi.

153-modda. Davlat tomonidan mablag' jalb qilish turlari

Davlat tomonidan mablag' jalb qilish:

O'zbekiston Respublikasi tomonidan qarz oluvchi sifatida chet davlatlardan, xalqaro tashkilotlardan, xalqaro moliya va iqtisodiy institutlardan, chet el hukumatlarining moliya tashkilotlaridan hamda O'zbekiston Respublikasining boshqa rezidentlari va norezidentlaridan jalb qilingan kreditlar (qarzlar) bo'yicha;

O'zbekiston Respublikasining davlat kafolatlari bo'yicha;

O'zbekiston Respublikasi nomidan chiqarilgan davlat qimmatli qog'ozlari bo'yicha qarz majburiyatlari tarzida amalga oshirilishi mumkin.

Qarz majburiyatlari qisqa muddatli (bir yilgacha bo'lgan muddatga), o'rta muddatli (bir yildan besh yilgacha muddatga) va uzoq muddatli (besh yil va undan ortiq muddatga) bo'lishi mumkin.

O'zbekiston Respublikasi Iqtisodiyot va moliya vazirligi davlat qarzi bo'yicha xizmat ko'rsatilishini ta'minlaydi, davlat kafolatini bajaradi.

154-modda. O'zbekiston Respublikasi tomonidan jalb qilinadigan kreditlar (qarzlar)

O'zbekiston Respublikasi tomonidan xorijiy banklardan, davlatlardan, xalqaro moliya va iqtisodiy institutlardan, chet el hukumatlarining moliya tashkilotlaridan jalb qilinadigan kreditlar (qarzlar) davlat tomonidan xorijdan mablag' jalb qilish jumlasiga kiradi.

O'zbekiston Respublikasi tomonidan jalb qilinadigan kreditlar (qarzlar) belgilangan tartibda:

davlat tomonidan mablag' jalb qilish hisobidan amalga oshiriladigan loyihalarni moliyalashtirishga yoki birgalikda moliyalashtirishga;

davlat tomonidan mablag' jalb qilish hisobidan amalga oshiriladigan loyihalarni bajarishga doir tadbirlarni moliyalashtirish uchun kreditlarni (qarzlarni) qaytadan kreditlashga yo'naltiriladi.

O'zbekiston Respublikasi nomidan jalb qilingan kreditlarni (qarzlarni) qaytadan kreditlashda kredit (qarz) bo'yicha xizmat ko'rsatish yuzasidan ehtimoldagi tavakkalchiliklarni qoplashda foydalanish uchun O'zbekiston Respublikasi marjasi belgilanishi mumkin. Kredit (qarz) bo'yicha qarzдорlik to'liq to'langan taqdirda kredit (qarz) bo'yicha O'zbekiston Respublikasi marjasining foydalanilmay qolgan summasi O'zbekiston Respublikasi respublika budgetining daromadiga kiritiladi.

155-modda. O'zbekiston Respublikasining davlat kafolatlari

O'zbekiston Respublikasining davlat kafolati qarz oluvchi-rezident o'zidan undiriladigan summani qarz (kredit) bo'yicha bitimlarda belgilangan muddatda to'lamagan taqdirda O'zbekiston Respublikasining qarz beruvchi oldidagi qarzni to'liq yoki qisman to'lab berish majburiyatidir.

O'zbekiston Respublikasining davlat kafolatlari qarz beruvchilarga qarz oluvchi-rezidentlar o'zi olgan kreditlar (qarzlar) bo'yicha majburiyatlarni bajarishining ta'minoti sifatida beriladi. Jismoniy shaxslarning majburiyatlari bo'yicha O'zbekiston Respublikasining davlat kafolatlari berilmaydi.

O'zbekiston Respublikasining davlat kafolatlari O'zbekiston Respublikasi Prezidentining yoki O'zbekiston Respublikasi Vazirlar Mahkamasining qaroriga ko'ra beriladi.

O'zbekiston Respublikasi Moliya vazirligi O'zbekiston Respublikasining davlat kafolatlarini rasmiylashtirish bo'yicha vakolatli organdir.

O'zbekiston Respublikasi Moliya vazirligi O'zbekiston Respublikasining berilgan davlat kafolatlari bilan shart qilib qo'yilgan to'lovlarni amalga oshirgach, amalga oshirilgan to'lovlar va ular bilan bog'liq xarajatlar summasini qarz oluvchi-rezidentdan so'zsiz undirib olish huquqiga ega.

O'zbekiston Respublikasining davlat kafolatlarini rasmiylashtirish, taqdim etish, ro'yxatdan o'tkazish va ular bo'yicha majburiyatlarni bajarish tartibi O'zbekiston Respublikasi Vazirlar Mahkamasi tomonidan belgilanadi.

156-modda. O'zbekiston Respublikasi nomidan chiqariladigan davlat qimmatli qog'ozlari

O'zbekiston Respublikasi Moliya vazirligi O'zbekiston Respublikasi nomidan davlat qimmatli qog'ozlarini chiqaradi. Davlat qimmatli qog'ozlarini chiqarish va ularning cheklangan hajmi to'g'risidagi qaror belgilangan tartibda qabul qilinadi.

O'zbekiston Respublikasi Markaziy banki:

O'zbekiston Respublikasi Moliya vazirligi tomonidan emissiya qilingan davlat g'aznachilik obligatsiyalarini joylashtirishda;

davlat g'aznachilik obligatsiyalari bo'yicha qiymatni, foizlarni va boshqa to'lovlarni to'lashda;

davlat g'aznachilik obligatsiyalari bo'yicha boshqa operatsiyalarni amalga oshirishda fiskal agent sifatida ishtirok etishi mumkin.

23-bob. Budjet ssudalari, kredit liniyalari va kreditlar

157-modda. Budjet ssudalari, kredit liniyalari va kreditlar berish

Budjet ssudalari, kredit liniyalari va kreditlar O'zbekiston Respublikasining respublika budjeti mablag'lari va qonunchilikka muvofiq boshqa manbalar hisobidan berilishi mumkin.

Budjet ssudalari, kredit liniyalari va kreditlarni berish qonunchilik hamda shartnoma bilan belgilanadigan muddatlilik, qaytarish, maqsadli foydalanish shartlariga va boshqa shartlarga asoslanadi.

158-modda. Rezident-yuridik shaxslarga beriladigan (ochiladigan) budjet ssudalari va kredit liniyalari

Budjet ssudalari va kredit liniyalari rezident-yuridik shaxslarga O'zbekiston Respublikasi Vazirlar Mahkamasining qarorlari asosida berilishi (ochilishi) mumkin.

Rezident-yuridik shaxslarga budjet ssudalari va kredit liniyalari O'zbekiston Respublikasi Markaziy banki asosiy stavkasining 50 foizidan kam bo'lmagan miqdordagi foiz stavkalari bo'yicha beriladi.

Rezident-yuridik shaxslarga budjet ssudalarini va kredit liniyalarini chet el valyutasida berish taqiqlanadi.

Budjet ssudalari budjet tashkilotlariga bevosita O'zbekiston Respublikasi Moliya vazirligi tomonidan beriladi.

Kredit liniyalari O'zbekiston Respublikasi Moliya vazirligi tomonidan rezident-yuridik shaxslarga ularga xizmat ko'rsatadigan tijorat banklari orqali, shuningdek bevosita tijorat banklariga ochiladi.

159-modda. Budjet ssudasi va kredit liniyasini o'z vaqtida qaytarmaslik

Budjet ssudasi yoki kredit liniyasi, shu jumladan foizlar budjet ssudasini berish yoki kredit liniyasini ochish to'g'risidagi shartnomada belgilangan muddatlarda va hajmlarda o'z vaqtida qaytarilmagan taqdirda O'zbekiston Respublikasi Moliya vazirligi:

qarzni qarzdordan so'zsiz tartibda undiradi;

har bir kechiktirilgan kun uchun muddati o'tkazib yuborilgan qarz summasining 0,033 foizi miqdorida penya hisoblaydi.

160-modda. Chet davlatlarga beriladigan kreditlar

Chet davlatlarga kreditlar belgilangan tartibda beriladi.

VIII bo'lim.

Budjet hisobi va hisoboti

24-bob. Budjet hisobi va hisobotini yuritish tartibi

161-modda. Umumiy qoidalar

Budjet hisobi budjet tizimi budjetlarini ijro etishda hisobga olinadigan, pulda ifodalangan aktivlar va majburiyatlarning, shuningdek mazkur aktivlar va majburiyatlarni o'zgartiruvchi operatsiyalarning holati to'g'risidagi axborotni to'plash, ro'yxatdan o'tkazish va umumlashtirishning tartibga solingan tizimidir.

Budjet hisoboti budjet hisobi ma'lumotlari asosida belgilangan shakllar bo'yicha tuziladigan aktivlar va majburiyatlarning holati to'g'risidagi ma'lumotlarning umumlashtirilgan tizimidir.

Budjet hisobi va budjet hisobotining yagona uslubiyati O'zbekiston Respublikasi Moliya vazirligi tomonidan ushbu Kodeks, budjet hisobining standartlariga, shuningdek boshqa qonunchilik hujjatlariga muvofiq belgilanadi. Budjet hisobining standartlari O'zbekiston Respublikasi Moliya vazirligi tomonidan tasdiqlanadi.

Budjet tashkilotlari tomonidan budjet hisobi va budjet hisobotining yagona uslubiyatiga rioya etilgan holda budjet hisobining batafsil bo'lishini ta'minlaydigan ichki idoraviy hujjatlar qo'llanilishi mumkin.

Budjet tizimi budjetlari ijrosining budjet hisobi:

moliya organlari;

g'aznachilik bo'linmalari;

davlat soliq xizmati organlari va bojxona organlari;

budjet tashkilotlari;

davlat maqsadli jamg'armalarini taqsimlovchi organlar tomonidan yuritiladi.

Davlat budjetining va davlat maqsadli jamg'armalari budjetlarining ijrosi bo'yicha budjet hisobi kassa usuli bo'yicha yuritiladi.

162-modda. Budjet hisoboti turlari

Budjet hisoboti quyidagi hisobot turlarini o'z ichiga oladi:

budjet tashkilotlarining va budjet mablag'lari oluvchilarning moliyaviy hisobotlari;

Davlat budjetiga va davlat maqsadli jamg'armalari budjetlariga daromadlarning tushumlari to'g'risidagi hisobot;

Davlat budjetining ijrosi to'g'risidagi hisobot;

davlat maqsadli jamg'armalari budjetlarining ijrosi to'g'risidagi hisobot.

163-modda. Budjet tashkilotlarining va budjet mablag'lari oluvchilarning moliyaviy hisobotlari

Budjet tashkilotlarining va budjet mablag'lari oluvchilarning choraklik moliyaviy hisobotlari hisobot yilining 1-aprel, 1-iyul va 1-oktabr holatiga, yillik moliyaviy hisobotlar esa, kelgusi hisobot yilining 1-yanvar holatiga ko'ra tuziladi.

Budjet tashkilotlarining va budjet mablag'lari oluvchilarning moliyaviy hisobotlari mazkur tashkilotlarning rahbari yoki u vakolat bergan shaxs hamda bosh buxgalteri tomonidan imzolanadi.

Choraklik va yillik moliyaviy hisobotlar:

budjet mablag'larini taqsimlovchilar bo'yicha — O'zbekiston Respublikasi Moliya vazirligiga;

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan moliyalashtiriladigan budjet tashkilotlari va budjet mablag'lari oluvchilar bo'yicha — Qoraqalpog'iston Respublikasi Moliya vazirligiga, viloyatlar va Toshkent shahar hokimliklarining moliya boshqarmalariga;

tumanlar va shaharlar budjetlaridan moliyalashtiriladigan budjet tashkilotlari va budjet mablag'lari oluvchilar bo'yicha — tumanlar va shaharlar hokimliklarining moliya bo'limlariga taqdim etiladi.

Budjet mablag'larini taqsimlovchilar O'zbekiston Respublikasining respublika budjetidan moliyalashtiriladigan o'z tasarrufidagi tashkilotlarning moliyaviy hisobotlari asosida choraklik va yillik jamlanma moliyaviy hisobotlarni tuzadi hamda O'zbekiston Respublikasi Moliya vazirligiga taqdim etadi.

Tasarrufdagi tashkilotlar uchun moliyaviy hisobotlarni taqdim etish muddatlari budjet mablag'larini taqsimlovchi tomonidan o'zi O'zbekiston Respublikasi Moliya vazirligiga jamlanma moliyaviy hisobotlarni taqdim etadigan muddatlar hisobga olingan holda belgilanadi.

Budjet mablag'larini taqsimlovchilarning jamlanma moliyaviy hisobotlari budjet mablag'larini taqsimlovchining rahbari yoki u vakolat bergan shaxs va bosh buxgalter tomonidan imzolanadi.

Davlat maqsadli jamg'armalari budjetlaridan budjet mablag'lari oluvchilar davlat maqsadli jamg'armalarini taqsimlovchi organlar tomonidan belgilangan tartibda choraklik va yillik moliyaviy hisobotlarni tuzadi hamda davlat maqsadli jamg'armalarini taqsimlovchi organlarga taqdim etadi.

Qoraqalpog'iston Respublikasining respublika budjetidan, viloyatlarning viloyat budjetlaridan va Toshkent shahrining shahar budjetidan moliyalashtiriladigan budjet tashkilotlari va budjet mablag'lari oluvchilar ushbu moddaning **uchinchi qismida** ko'rsatilgan tegishli moliya

organlariga moliyaviy hisobotlarni ular belgilagan muddatlarda, lekin O'zbekiston Respublikasi Moliya vazirligi tomonidan belgilangan muddatlardan kechiktirmay taqdim etadi.

Tumanlar va shaharlar budjetlaridan moliyalashtiriladigan budjet tashkilotlari va budjet mablag'lari oluvchilar ushbu moddaning **uchinchi qismida** ko'rsatilgan tegishli moliya organlariga moliyaviy hisobotlarni ular belgilagan muddatlarda, lekin yuqori turuvchi moliya organi tomonidan belgilangan muddatlardan kechiktirmay taqdim etadi.

Elektron hujjat tarzida taqdim etilgan moliyaviy hisobotlar budjet tashkilotlari va budjet mablag'lari oluvchilar rahbarlarining yoki ular vakolat bergan shaxslarning va bosh buxgalterlarining elektron raqamli imzosi bilan tasdiqlanadi.

Budjet tashkilotlari va budjet mablag'lari oluvchilarning choraklik hamda yillik moliyaviy hisobotlarni tuzish, tasdiqlash va taqdim etish tartibi O'zbekiston Respublikasi Moliya vazirligi tomonidan belgilanadi.

164-modda. Davlat budjetiga va davlat maqsadli jamg'armalari budjetlariga daromadlarning tushumlari to'g'risidagi hisobot

Tumanlar va shaharlar davlat soliq inspeksiyalari tegishli tumanlar va shaharlar hokimliklarining moliya bo'limlariga hisobot davri uchun soliqlar va boshqa majburiy to'lovlarning hisoblanishi hamda tushumi to'g'risida hisobot taqdim etadi.

Qoraqalpog'iston Respublikasi, viloyatlar va Toshkent shahar davlat soliq boshqarmalari hamda Davlat bojxona qo'mitasining Qoraqalpog'iston Respublikasi, viloyatlar, Toshkent shahri bo'yicha boshqarmalari, shu jumladan ixtisoslashtirilgan bo'linmalari Qoraqalpog'iston Respublikasi moliya vazirligiga, viloyatlar va Toshkent shahar hokimliklarining moliya boshqarmalariga hisobot davri uchun soliqlar va boshqa majburiy to'lovlarning hisoblanishi hamda tushumi to'g'risida hisobotlar taqdim etadi.

O'zbekiston Respublikasi Davlat soliq qo'mitasi va Davlat bojxona qo'mitasi O'zbekiston Respublikasi Moliya vazirligiga hisobot davri uchun soliqlar va boshqa majburiy to'lovlarning hisoblanishi hamda tushumi to'g'risida hisobotlar taqdim etadi.

Soliqlar va boshqa majburiy to'lovlarning hisoblanishi va tushumi to'g'risidagi hisobotlarning shakllari hamda ularni taqdim etish muddatlari O'zbekiston Respublikasi Moliya vazirligi tomonidan belgilanadi.

O'zbekiston Respublikasi Markaziy banki O'zbekiston Respublikasi Moliya vazirligi va davlat maqsadli jamg'armalarini taqsimlovchi organlarga O'zbekiston Respublikasi Moliya vazirligi tomonidan belgilangan shakllar va muddatlarda Davlat budjeti va davlat maqsadli jamg'armalari budjetlari daromadlarining tushumlari to'g'risida hisobot taqdim etadi.

165-modda. Davlat budjetining ijrosi to'g'risidagi hisobot

Davlat budjetining ijrosi to'g'risidagi hisobot budjet tasnifiga muvofiq muayyan davr uchun Davlat budjeti daromadlari va xarajatlarining ijrosi natijalaridan iborat bo'ladi.

Davlat budjetining ijrosi to'g'risidagi hisobot quyidagi hisobot shakllarini o'z ichiga oladi:

Davlat budjeti ijrosining balansini;

Davlat budjeti daromadlarining ijrosi to'g'risidagi hisobotni;

Davlat budjeti xarajatlarining ijrosi to'g'risidagi hisobotni;

budjet tashkilotlarining debitorlik va kreditorlik qarzlari to'g'risidagi ma'lumotnomani;

Davlat budjetidan moliyalashtiriladigan budjet tashkilotlari bo'yicha tarmoq, shtatlar va kontingentga doir rejaning bajarilishi to'g'risidagi hisobotni.

Tumanlar va shaharlar bo'yicha g'aznachilik bo'linmalari tegishli tumanlar va shaharlar hokimliklarining moliya bo'limlariga tumanlar va shaharlar budjetlarining kassa ijrosi to'g'risidagi hisobotni taqdim etadi.

Tumanlar va shaharlar hokimliklarining moliya bo'limlari hisobot davri uchun tumanlar va shaharlar budjetlarining ijrosi to'g'risidagi hisobotni O'zbekiston Respublikasi Moliya vazirligi tomonidan belgilangan shakllar bo'yicha:

yuqori turuvchi moliya organlariga — ular belgilagan muddatlarda;

tegishli hokimliklarga — tumanlar va shaharlar budgetlarining ijrosi to'g'risidagi hisobot yuqori turuvchi moliya organlariga taqdim etilganidan so'ng uch ish kuni ichida taqdim etadi.

Qoraqalpog'iston Respublikasi, viloyatlar va Toshkent shahri bo'yicha g'aznachilik boshqarmalari Qoraqalpog'iston Respublikasi respublika budgetining, viloyatlar viloyat budgetlarining va Toshkent shahri shahar budgetining kassa ijrosi to'g'risidagi hisobotni tegishincha Qoraqalpog'iston Respublikasi Moliya vazirligiga, viloyatlar va Toshkent shahar hokimliklarining moliya boshqarmalariga taqdim etadi.

G'aznachilik bo'linmalari tomonidan tegishli budgetlarning kassa ijrosi to'g'risidagi hisobotlarni moliya organlariga taqdim etish tartibi O'zbekiston Respublikasi Moliya vazirligi tomonidan belgilanadi.

Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari:

a) hisobot davri uchun Qoraqalpog'iston Respublikasi budgetining, viloyatlar va Toshkent shahar mahalliy budgetlarining ijrosi to'g'risidagi choraklik hisobotni O'zbekiston Respublikasi Moliya vazirligi tomonidan belgilangan shakllar bo'yicha:

O'zbekiston Respublikasi Moliya vazirligiga — u belgilagan muddatlarda;

Qoraqalpog'iston Respublikasi budgetining, viloyatlar va Toshkent shahar mahalliy budgetlarining ijrosi to'g'risidagi hisobot O'zbekiston Respublikasi Moliya vazirligiga taqdim etilganidan so'ng uch ish kuni ichida Qoraqalpog'iston Respublikasi Vazirlar Kengashiga hamda tegishli hokimliklarga taqdim etadi;

b) hisobot davri uchun Qoraqalpog'iston Respublikasi budgetining, viloyatlar va Toshkent shahar mahalliy budgetlarining ijrosi to'g'risidagi yillik hisobotni O'zbekiston Respublikasi Moliya vazirligi tomonidan belgilangan shakllar bo'yicha va muddatlarda Qoraqalpog'iston Respublikasi Vazirlar Kengashiga va tegishli hokimliklarga, shuningdek O'zbekiston Respublikasi Moliya vazirligiga taqdim etadi.

O'zbekiston Respublikasi Moliya vazirligi ushbu moddaning **ikkinchi qismida** ko'rsatilgan shakllar bo'yicha Davlat budgetining ijrosi to'g'risidagi yillik hisobotni tuzadi.

O'zbekiston Respublikasi Moliya vazirligi O'zbekiston Respublikasi Vazirlar Mahkamasiga:

Davlat budjeti ijrosining borishi to'g'risidagi choraklik hisobotni O'zbekiston Respublikasi Vazirlar Mahkamasi tomonidan belgilangan muddatlarda;

Davlat budgetining ijrosi to'g'risidagi yillik hisobotni hisobot yilidan keyingi yilning 1-apreligacha taqdim etadi.

166-modda. Davlat maqsadli jamg'armalari budgetlarining ijrosi to'g'risidagi hisobot

Davlat maqsadli jamg'armalari budgetlarining ijrosi to'g'risidagi hisobot quyidagilarni o'z ichiga oladi:

davlat maqsadli jamg'armalari budgetlari ijrosining balansini;

davlat maqsadli jamg'armalari budgetlari daromadlarining ijrosi to'g'risidagi hisobotni;

davlat maqsadli jamg'armalari budgetlari xarajatlarining ijrosi to'g'risidagi hisobotni;

davlat maqsadli jamg'armalarining debitorlik va kreditorlik qarzlari to'g'risidagi ma'lumotlarini;

davlat maqsadli jamg'armalari nomoliyaviy aktivlarining harakati to'g'risidagi hisobotni;

davlat maqsadli jamg'armalarining milliy va chet el valyutasidagi pul mablag'lari harakati to'g'risidagi hisobotni;

davlat maqsadli jamg'armalarini taqsimlovchi organlar bo'yicha tarmoq, shtatlar va kontingentga doir rejaning bajarilishi to'g'risidagi hisobotni.

Davlat maqsadli jamg'armalarini taqsimlovchi organlar har oyda O'zbekiston Respublikasi Moliya vazirligiga tahliliy maqsadlar uchun davlat maqsadli jamg'armalari budgetlari daromadlari va xarajatlarining ijrosi to'g'risidagi hisobotlarni taqdim etadi.

Davlat maqsadli jamg'armalari budgetlarining ijrosi to'g'risidagi hisobotlarni tuzish, tasdiqlash va taqdim etish tartibi O'zbekiston Respublikasi Moliya vazirligi tomonidan belgilanadi.

Davlat maqsadli jamg'armalarini taqsimlovchi organlar O'zbekiston Respublikasi Moliya vazirligiga:

O'zbekiston Respublikasi Moliya vazirligi tomonidan belgilanadigan muddatlarda davlat maqsadli jamg'armalari budjetlarining ijrosi to'g'risidagi choraklik hisobotni;

davlat maqsadli jamg'armalari budjetlarining ijrosi to'g'risidagi yillik hisobotni hisobot yilidan keyingi yilning 1-apreliga qadar taqdim etadi.

166¹-modda. Budjet jarayonining ochiqligini ta'minlash tartibi

Birinchi darajali budjet mablag'larini taqsimlovchilar, ikkinchi darajali budjet mablag'larini taqsimlovchilar, hududiy budjet mablag'larini taqsimlovchilar, davlat maqsadli jamg'armalari, O'zbekiston Respublikasi Tiklanish va taraqqiyot jamg'armasi har chorak yakunlari bo'yicha keyingi chorak birinchi oyining 25 sanasiga qadar o'zining rasmiy veb-saytlariga:

o'z tasarrufidagi budjet tashkilotlari kesimida budjet mablag'larining taqsimoti;

davriy moliyaviy hisobotlar;

davlat maqsadli jamg'armalaridan subsidiyalar va kredit oluvchilar;

kapital qo'yilmalar hisobidan amalga oshirilayotgan loyihalarning ijrosi;

o'tkazilgan tanlovlar (tenderlar) va amalga oshirilgan davlat xaridlari to'g'risidagi ma'lumotlarni joylashtiradi.

Hududiy budjet mablag'larini taqsimlovchilarning rasmiy veb-saytlari mavjud bo'lmagan taqdirda ular tegishincha Qoraqalpog'iston Respublikasi Vazirlar Kengashining, viloyatlar va Toshkent shahar, tumanlar va shaharlar hokimliklarining rasmiy veb-saytlariga ushbu moddaning birinchi qismida ko'rsatilgan ma'lumotni joylashtiradi.

Davlat moliyaviy nazorat organlari moliya yilining birinchi oyida moliya yili uchun ish rejalari to'g'risidagi ma'lumotlarni, har chorak yakunlariga ko'ra esa nazorat tadbirlari natijalari bo'yicha aniqlangan moliyaviy huquqbuzarliklar va ijobiy natijalar haqidagi ma'lumotlarni chorakdan keyingi oyning 25 sanasidan kechiktirmay o'z rasmiy veb-saytlariga joylashtiradi.

Qoraqalpog'iston Respublikasi budjetining, viloyatlar va Toshkent shahar mahalliy budjetlarining, tumanlar va shaharlar budjetlarining qo'shimcha manbalari hisobidan xarid qilingan tovarlar hamda xizmatlar, qurilish, rekonstruksiya qilish va ta'mirlash ishlari olib borilayotgan obyektlar ro'yxati, shuningdek qurilish-ta'mirlash ishlarining moliyalashtirilishi to'g'risidagi ma'lumotlar har chorak yakunlari bo'yicha keyingi chorak birinchi oyining 10 sanasiga qadar tegishincha Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimliklari tomonidan majburiy tartibda o'z rasmiy veb-saytlarida joylashtiriladi.

O'zbekiston Respublikasi Iqtisodiy taraqqiyot va kambag'allikni qisqartirish vazirligi hamda budjet mablag'larini tegishli taqsimlovchilar O'zbekiston Respublikasi Davlat budjeti mablag'lari hisobidan moliyalashtiriladigan ijtimoiy va ishlab chiqarish infratuzilmasini rivojlantirish dasturlarining ijro etilishi to'g'risidagi axborotni birinchi darajali budjet mablag'larini taqsimlovchilar kesimida o'z rasmiy veb-saytlariga har chorak yakunlariga ko'ra, chorakdan keyingi oyning 25 sanasidan kechiktirmay joylashtiradi.

O'zbekiston Respublikasi Davlat soliq qo'mitasi hamda Davlat bojxona qo'mitasi soliq va bojxona imtiyozlari ro'yxatini, shuningdek soliq to'lovchilar kesimida taqdim etilgan soliq va bojxona imtiyozlarining miqdori to'g'risidagi axborotni o'z rasmiy veb-saytlariga har chorakda chorakdan keyingi oyning 25 sanasidan kechiktirmay, yil yakunlariga ko'ra esa kelgusi yilning 1-apreliga qadar joylashtiradi.

Qoraqalpog'iston Respublikasi Vazirlar Kengashi, viloyatlar va Toshkent shahar, tumanlar va shaharlar hokimliklari tegishli mahalliy budjetlar qo'shimcha mablag'laridan foydalanilishiga doir qarorlarni (farmoyishlarni) ular qabul qilinganidan so'ng uch ish kuni ichida majburiy tartibda o'z rasmiy veb-saytlariga hamda "Ochiq budjet" axborot portaliga joylashtiradi.

Ma'lumotni ushbu moddaning **birinchi — yettinchi qismlarida** ko'rsatilgan tegishli tashkilotlarning rasmiy veb-saytlariga joylashtirish tartibi O'zbekiston Respublikasi Hisob palatasi bilan kelishilgan holda O'zbekiston Respublikasi Moliya vazirligi tomonidan belgilanadi.

25-bob. Davlat budjetining va davlat maqsadli jamg'armalari budjetlarining ijrosi to'g'risidagi hisobotlarni tasdiqlash

167-modda. Davlat budjetining va davlat maqsadli jamg'armalari budjetlarining ijrosi to'g'risidagi yillik hisobotning tashqi auditi hamda uni baholash

O'zbekiston Respublikasi Vazirlar Mahkamasi O'zbekiston Respublikasi respublika budjetining va davlat maqsadli jamg'armalari budjetlarining ijrosi to'g'risidagi yillik hisobotni O'zbekiston Respublikasi Hisob palatasiga tashqi audit o'tkazish va baholash uchun hisobot yilidan keyingi yilning 5-apreliga qadar yuboradi.

Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari Qoraqalpog'iston Respublikasi budjetining, viloyatlar va Toshkent shahar mahalliy budjetlarining ijrosi to'g'risidagi, O'zbekiston Respublikasi Moliya vazirligi tomonidan belgilangan shakldagi yillik hisobotni tashqi audit o'tkazish va baholash uchun O'zbekiston Respublikasi Hisob palatasiga hisobot yilidan keyingi yilning 5-apreliga qadar yuboradi.

O'zbekiston Respublikasi Hisob palatasi:

O'zbekiston Respublikasi respublika budjetining va davlat maqsadli jamg'armalari budjetlarining ijrosi to'g'risidagi yillik hisobotga doir xulosani hisobot yilidan keyingi yilning 10-mayidan kechiktirmay O'zbekiston Respublikasi Vazirlar Mahkamasiga yuboradi;

Qoraqalpog'iston Respublikasi budjetining, viloyatlar va Toshkent shahar mahalliy budjetlarining ijrosi to'g'risidagi yillik hisobotga doir tegishli xulosalarni hisobot yilidan keyingi yilning 10-mayidan kechiktirmay Qoraqalpog'iston Respublikasi Vazirlar Kengashiga, viloyatlar, Toshkent shahar hokimliklariga yuboradi.

O'zbekiston Respublikasi Vazirlar Mahkamasi Davlat budjetining va davlat maqsadli jamg'armalari budjetlarining ijrosi to'g'risidagi yillik hisobotni O'zbekiston Respublikasi Hisob palatasining xulosasi bilan birgalikda hisobot yilidan keyingi yilning 15-mayidan kechiktirmay O'zbekiston Respublikasi Oliy Majlisi palatalariga taqdim etadi.

Qoraqalpog'iston Respublikasi Vazirlar Kengashi va tegishli hokimliklar Qoraqalpog'iston Respublikasi budjetining, viloyatlar va Toshkent shahar mahalliy budjetlarining ijrosi to'g'risidagi yillik hisobotlarni O'zbekiston Respublikasi Hisob palatasining xulosasi bilan birgalikda tegishincha Qoraqalpog'iston Respublikasi Jo'qorg'i Kengesiga, xalq deputatlari viloyatlar va Toshkent shahar Kengashlariga ushbu Kodeksning 168-moddasida nazarda tutilgan muddatlarda taqdim etadi.

Davlat budjetining va davlat maqsadli jamg'armalari budjetlarining ijrosi to'g'risidagi yillik hisobotlarning tashqi auditi va ularni baholash natijalari yuzasidan O'zbekiston Respublikasi Hisob palatasining xulosalari majburiy ravishda e'lon qilinadi.

168-modda. Qoraqalpog'iston Respublikasi budjetining, viloyatlar va Toshkent shahar mahalliy budjetlarining, shuningdek tumanlar va shaharlar budjetlarining ijrosi to'g'risidagi hisobotlarni ko'rib chiqish hamda tasdiqlash

Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, shuningdek tumanlar va shaharlar Kengashlari Qoraqalpog'iston Respublikasi Vazirlar Kengashi, viloyatlar, Toshkent shahar, tumanlar va shaharlar hokimlari tomonidan hisobot davri uchun taqdim etilgan tegishli budjetlarning ijrosi to'g'risidagi hisobotlarni o'z partiyalar guruhlarida va doimiy komissiyalarida (qo'mitalarida) dastlabki tarzda muhokama qilish asosida ko'rib chiqadi.

Qoraqalpog'iston Respublikasi Vazirlar Kengashi, viloyatlar, Toshkent shahar, tumanlar va shaharlar hokimlari tegishli budjetlar ijrosi to'g'risidagi yillik hisobotlarni hisobot yilidan keyingi yilning 10-mayidan so'ng tegishincha Qoraqalpog'iston Respublikasi Jo'qorg'i Kengesiga, xalq deputatlari viloyatlar va Toshkent shahar, shuningdek tumanlar va shaharlar Kengashlariga taqdim etadi.

Tegishli budjetlarning ijrosi to'g'risidagi hisobotlarni taqdim etish muddatlari tegishincha Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, shuningdek tumanlar va shaharlar Kengashlari tomonidan belgilanadi.

Tegishli budjetlarning ijrosi to'g'risidagi hisobotlar tegishincha Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, shuningdek tumanlar va shaharlar Kengashlari qarorlari bilan tasdiqlanadi.

Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar, tumanlar hamda shaharlar Kengashlari tegishli budjetlardan moliyalashtiriladigan hududiy budjet mablag'larini taqsimlovchilarning budjet mablag'laridan va budjetdan tashqari mablag'lardan samarali foydalanilishi, shuningdek erishilgan natijalar to'g'risidagi hisobotlarini eshitish huquqiga ega.

169-modda. Davlat budjetining va davlat maqsadli jamg'armalari budjetlarining ijrosi to'g'risidagi hisobotlarni ko'rib chiqish hamda tasdiqlash

O'zbekiston Respublikasi Oliy Majlisining Qonunchilik palatasi, Senati O'zbekiston Respublikasi Vazirlar Mahkamasi tomonidan tegishli hisobot davri uchun taqdim etilgan Davlat budjetining va davlat maqsadli jamg'armalari budjetlarining ijrosi to'g'risidagi hisobotni tegishincha O'zbekiston Respublikasi Oliy Majlisi Qonunchilik palatasidagi siyosiy partiyalar fraksiyalarida, O'zbekiston Respublikasi Oliy Majlisi palatalarining qo'mitalarida muhokama qilish asosida ko'rib chiqadi.

Tegishli hisobot davri uchun O'zbekiston Respublikasi Davlat budjetining va davlat maqsadli jamg'armalari budjetlarining ijrosi to'g'risidagi hisobot O'zbekiston Respublikasi Oliy Majlisi Qonunchilik palatasidagi siyosiy partiyalar fraksiyalarida, O'zbekiston Respublikasi Oliy Majlisi palatalarining qo'mitalarida ko'rib chiqilganidan keyin tegishincha O'zbekiston Respublikasi Oliy Majlisi palatalarining majlislarida ko'rib chiqiladi hamda O'zbekiston Respublikasi Oliy Majlisi Qonunchilik palatasining, Senatining qarori bilan tasdiqlanadi.

O'zbekiston Respublikasi Oliy Majlisining Qonunchilik palatasi birinchi darajali budjet mablag'larini taqsimlovchilarning va davlat maqsadli jamg'armalarini taqsimlovchi organlarning o'zlariga ajratilgan budjet mablag'laridan va budjetdan tashqari mablag'lardan samarali foydalanilishi, shuningdek erishilgan natijalar to'g'risidagi hisobotlarini eshitish huquqiga ega.

Davlat budjetining va davlat maqsadli jamg'armalari budjetlarining ijrosi to'g'risidagi yillik hisobot tegishincha O'zbekiston Respublikasi Oliy Majlisining palatalari tomonidan tasdiqlanganidan keyin hisobot yili uchun Davlat budjetining va davlat maqsadli jamg'armalari budjetlarining ijrosi to'g'risidagi axborot O'zbekiston Respublikasi Moliya vazirligining rasmiy veb-saytiga joylashtiriladi.

IX bo'lim.

Budjet tizimi budjetlarining ijrosini nazorat qilish

26-bob. Davlat moliyaviy nazorati

170-modda. Umumiy qoidalar

Davlat moliyaviy nazorati budjet to'g'risidagi qonunchilikning davlat moliyaviy nazorati obyektlari tomonidan buzilishi hollarini aniqlash, bartaraf etish va unga yo'l qo'ymaslik, shuningdek budjet sohasida korrupsiyaga oid huquqbuzarliklarning oldini olish maqsadida davlat moliyaviy nazorat organlari tomonidan amalga oshiriladi.

Davlat moliyaviy nazorati:

respublika darajasida — O'zbekiston Respublikasi respublika budjetining, davlat maqsadli jamg'armalari budjetlarining va O'zbekiston Respublikasi respublika budjetidan moliyalashtiriladigan budjet tashkilotlari budjetdan tashqari jamg'armalarining shakllantirilishi hamda ijro etilishi ustidan;

mahalliy darajada — Qoraqalpog'iston Respublikasi budjetining, viloyatlar va Toshkent shahar mahalliy budjetlarining, Qoraqalpog'iston Respublikasi budjetidan, viloyatlar va Toshkent shahar mahalliy budjetlaridan moliyalashtiriladigan budjet tashkilotlari budjetdan tashqari jamg'armalarining shakllantirilishi hamda ijro etilishi ustidan amalga oshiriladi.

Davlat moliyaviy nazorat organlari davlat moliyaviy nazoratini davlat moliyaviy nazorat organlari yoki vakolatli organ tomonidan tasdiqlanadigan nazorat qilish yillik rejalariga muvofiq amalga oshiradi.

Ayrim hollarda rejadan tashqari davlat moliyaviy nazoratini amalga oshirishga:

O'zbekiston Respublikasi Prezidentining yoki O'zbekiston Respublikasi Vazirlar Mahkamasining;

davlat moliyaviy nazorat organiga budget to'g'risidagi qonunchilik buzilganligi faktlari to'g'risida ma'lumotlar kelib tushgan hollarda davlat moliyaviy nazorat organlari rahbarlarining qarorlari asosida yo'l qo'yiladi.

171-modda. Davlat moliyaviy nazorat organlari

O'zbekiston Respublikasi Hisob palatasi, O'zbekiston Respublikasi Moliya vazirligi va uning tasarrufidagi vakolatli organlar hamda O'zbekiston Respublikasi Bosh prokuraturasi huzuridagi Iqtisodiy jinoyatlarga qarshi kurashish departamentining Davlat moliyaviy nazorati inspeksiyasi davlat moliyaviy nazorat organlaridir.

Davlat budgetining va davlat maqsadli jamg'armalari budgetlarining daromadlari qismi bo'yicha davlat moliyaviy nazorati berilgan vakolatlar doirasida davlat soliq xizmati organlari tomonidan amalga oshiriladi.

172-modda. Davlat moliyaviy nazorati prinsiplari

Davlat moliyaviy nazoratini o'tkazishning qonuniyligi va mustaqilligi, shuningdek davlat moliyaviy nazorati natijalarining ishonchliligi va xolisligi davlat moliyaviy nazoratining prinsiplaridir.

173-modda. Davlat moliyaviy nazoratining shakllari, turlari va usullari

Davlat moliyaviy nazorati taftish, tekshirish (shu jumladan budget to'g'risidagi qonunchilikning avvalgi taftishda yoki tekshirishda aniqlangan buzilishi hollarini bartaraf etish yuzasidan nazorat tartibidagi tekshirish) va o'rganish shaklida amalga oshiriladi.

Davlat moliyaviy nazoratining turlari quyidagi:

dastrabki nazorat — moliyaviy operatsiyalar bajarilguniga qadar g'aznachilik bo'linmalari moliya organlari va O'zbekiston Respublikasi Hisob palatasi tomonidan amalga oshiriladigan;

joriy nazorat — moliyaviy operatsiyalar bajarilishi jarayonida g'aznachilik bo'linmalari, moliya organlari va davlat soliq xizmati organlari tomonidan amalga oshiriladigan;

yakuniy nazorat — moliyaviy operatsiyalar bajarilganidan so'ng ushbu Kodeksning [171-moddasida](#) ko'rsatilgan davlat moliyaviy nazorat organlari tomonidan amalga oshiriladigan nazoratlardir.

Davlat moliyaviy nazoratining usullari quyidagilardir:

hujjatlarni tekshirish hajmiga qarab:

yoppasiga nazorat — tekshirilayotgan davr uchun barcha buxgalteriya, moliya, statistika, bank hujjatlari va boshqa hujjatlarni nazorat qilish;

tanlov asosidagi nazorat — muayyan davr uchun buxgalteriya, moliya, statistika, bank hujjatlari va boshqa hujjatlarning ayrim qismlarini nazorat qilish;

nazoratning maqsadga yo'naltirilganligi va predmetiga qarab:

kompleks nazorat — davlat moliyaviy nazorati obyektining muayyan davr uchun moliyaviy-xo'jalik faoliyatining barcha yo'nalishlarini nazorat qilish;

mavzuli nazorat — davlat moliyaviy nazorati obyektining muayyan davr uchun ayrim masalalar bo'yicha faoliyatini nazorat qilish;

muqobil nazorat — operatsiyalar yagonaligi bilan o'zaro bog'liq bo'lgan va turli davlat moliyaviy nazorati obyektlarida turgan hujjatlarni solishtirishni o'z ichiga olgan tekshirish, bundan tadbirkorlik subyektlari mustasno.

174-modda. O'zbekiston Respublikasi Hisob palatasi tomonidan amalga oshiriladigan davlat moliyaviy nazorati

O'zbekiston Respublikasi Hisob palatasi:

O'zbekiston Respublikasi Davlat budjeti to'g'risidagi qonun loyihasini va o'rta muddatli davr uchun fiskal strategiyani, shuningdek Qoraqalpog'iston Respublikasi budjetining, viloyatlar va Toshkent shahar mahalliy budjetlarining loyihalarini ekspertizadan o'tkazishni;

qabul qilinayotgan davlat dasturlari va hududiy dasturlarning moliyalashtirish manbalari bilan ta'minlanganligi auditini;

budjet tizimi budjetlariga hamda belgilangan tartibda tashkil etilgan boshqa jamg'armalarga mablag'lar tushumining to'liqligini o'rganish va nazorat qilishni;

budjet tizimi budjetlarining hamda belgilangan tartibda tashkil etilgan boshqa jamg'armalarning daromadlarini ko'paytirish zaxiralarini aniqlash va safarbar qilishni;

budjet tizimi budjetlarining hamda belgilangan tartibda tashkil etilgan boshqa jamg'armalarning amalga oshirilayotgan xarajatlari samaradorligini va qonuniyligini auditdan o'tkazishni, barcha darajalarda ularni qisqartirish bo'yicha imkoniyatlarni aniqlashni;

budjet tizimi budjetlari mablag'lari va davlatdan qarz olish hisobidan amalga oshirilayotgan investitsiya loyihalarining maqsadga muvofiqligini va asoslilikini baholashni;

soliq, bojxona va budjet to'g'risidagi qonunchilikni takomillashtirishga doir takliflar ishlab chiqishni, budjetga oid rejalashtirishning zamonaviy usullarini tizimli qoidabuzarliklarning sabablarini, shuningdek xalqaro tajribani umumlashtirish va o'rganish orqali joriy etishni;

O'zbekiston Respublikasining respublika budjeti va Qoraqalpog'iston Respublikasi budjeti, viloyatlar va Toshkent shahar mahalliy budjetlari o'rtasidagi nisbat maqbulligini, mahalliy davlat hokimiyati organlarining daromadga oid vakolatlari va xarajatlarga doir majburiyatlari chegaralanishining to'g'riligini baholashni, ularning moliyaviy jihatdan o'zini o'zi ta'minlashi yuzasidan takliflar ishlab chiqishni;

O'zbekiston Respublikasi Moliya vazirligining budjet ssudalari va kredit liniyalaridan maqsadli foydalanilishi ustidan nazoratni;

O'zbekiston Respublikasining xorijdagi diplomatik vakolatxonalari va konsullik muassasalari, shuningdek O'zbekiston Respublikasining xalqaro tashkilotlar huzuridagi missiyalari va vakolatxonalari tomonidan chet el valyutasidagi mablag'lardan to'g'ri va maqsadli foydalanilishi ustidan nazoratni;

davlat xaridlari to'g'risidagi qonunchilik talablarining to'g'ri qo'llanilishi ustidan nazoratni;

O'zbekiston Respublikasi pul-kredit va valyuta siyosatining, O'zbekiston Respublikasi aktivlari va majburiyatlari holatining, oltin-valyuta zaxiralarini boshqarishning, shuningdek qimmatbaho metallar va qimmatbaho toshlar bilan amalga oshirilayotgan operatsiyalarning tashqi auditini amalga oshiradi.

175-modda. O'zbekiston Respublikasi Moliya vazirligi, Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari, tumanlar va shaharlar hokimliklarining moliya bo'limlari tomonidan amalga oshiriladigan davlat moliyaviy nazorati

O'zbekiston Respublikasi Moliya vazirligi, Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari, tumanlar va shaharlar hokimliklarining moliya bo'limlari o'z vakolatlari doirasida:

quyi turuvchi moliya organlari tomonidan budjet to'g'risidagi qonunchilik ijrosining ta'minlanishi ustidan;

ijtimoiy nafaqalar va kam ta'minlangan oilalarga moddiy yordam tayinlanishi hamda o'z vaqtida to'lanishi ustidan;

budjet tashkilotlari va budjet mablag'lari oluvchilar tomonidan smeta-shtat intizomiga rioya etilishining ta'minlanishi ustidan;

aksiz solig'i to'g'ri hisoblanishi va o'z vaqtida to'lanishi ustidan;

aksiz to'lanadigan ayrim turdagi tovarlarning aksiz markalari bilan to'liq tamg'alanishi va olingan aksiz markalari sonining ishlab chiqarilayotgan mahsulot hajmiga muvofiqligi ustidan;

budjet tashkilotlari tomonidan budjet hisobini yuritish va moliyaviy hisobotni tuzishning, shuningdek quyi turuvchi hududiy moliya organlari tomonidan budjet hisobotini tuzishning to'g'riligi ustidan davlat moliyaviy nazoratini amalga oshiradi.

176-modda. G'aznachilik bo'linmalari tomonidan amalga oshiriladigan davlat moliyaviy nazorati

G'aznachilik bo'linmalari davlat moliyaviy nazoratini:

budjet tashkilotlarining va budjet mablag'lari oluvchilarning tovarlarni yetkazib beruvchilar (ishlarni bajaruvchilar, xizmatlar ko'rsatuvchilar) bilan Davlat budjeti va davlat maqsadli jamg'armalari budjetlari mablag'lari hisobiga tuzilgan shartnomalarini xarajatlar smetalarida ko'rsatilgan summalar doirasida hamda belgilangan maqsadlarga muvofiq tuzilganligi ustidan nazorat qilish asosida majburiy ro'yxatdan o'tkazish;

xarajatlar smetalarida va ro'yxatdan o'tkazilgan shartnomalarda nazarda tutilgan summalar doirasida budjet tashkilotlari va budjet mablag'lari oluvchilar nomidan hamda ularning topshirig'i bo'yicha tovarlarni (ishlarni, xizmatlarni) yetkazib beruvchilarning hisobvaraqlariga to'lovlarni bevosita amalga oshirish orqali to'lov intizomiga rioya etilishini ta'minlash yo'li bilan amalga oshiradi.

177-modda. O'zbekiston Respublikasi Bosh prokuraturasi huzuridagi Iqtisodiy jinoyatlarga qarshi kurashish departamentining Davlat moliyaviy nazorati inspeksiyasi tomonidan amalga oshiriladigan davlat moliyaviy nazorati

O'zbekiston Respublikasi Bosh prokuraturasi huzuridagi Iqtisodiy jinoyatlarga qarshi kurashish departamentining Davlat moliyaviy nazorati inspeksiyasi:

budjet to'g'risidagi qonunchilikka, budjet va smeta-shtat intizomiga rioya etilishi;

budjet tizimi budjetlarining xarajatlari ijrosi;

budjet tizimi budjetlarining mablag'lari hisobidan to'lovlarni amalga oshirishning navbatiligi, muddatlariga rioya etilishi va to'liqligi;

budjet tizimi budjetlari mablag'larining maqsadli sarflanishi;

rivojlanish davlat dasturlarini amalga oshirish uchun markazlashtirilgan manbalardan ajratiladigan mablag'lardan maqsadli foydalanilishi;

O'zbekiston Respublikasining chet eldagi diplomatik muassasalari tomonidan chet el valyutasidagi mablag'lardan to'g'ri va maqsadli foydalanilishi;

pensiyalar va nafaqalar to'g'ri tayinlanishi, hisoblanishi va o'z vaqtida to'lanishi;

budjet subsidiyalari, ssudalari va kredit liniyalaridan maqsadli foydalanilishi;

O'zbekiston Respublikasi tomonidan yoki uning kafolati ostida jalb qilingan kreditlardan (qarzlardan) maqsadli foydalanilishi;

insonparvarlik yordami va texnik ko'maklashish mablag'laridan maqsadli foydalanilishi;

davlat xaridlari bo'yicha tender (tanlov) savdolarining to'g'ri o'tkazilishi ustidan davlat moliyaviy nazoratini amalga oshiradi.

178-modda. Davlat soliq xizmati organlari tomonidan amalga oshiriladigan davlat moliyaviy nazorati

Davlat soliq xizmati organlari davlat moliyaviy nazoratini soliq to'g'risidagi qonunchilikka muvofiq amalga oshiradi.

179-modda. Davlat moliyaviy nazorat organlarining o'zaro hamkorligi

Budjet tashkilotlarini nazorat qilish rejalari davlat moliyaviy nazorat organlari tomonidan tasdiqlanadi.

Davlat moliyaviy nazorat organlari davlat moliyaviy nazorati obyekti mansabdor shaxslarining harakatlarida jinoyat alomatlari, shu jumladan korrupsiyaga oid huquqbuzarliklarning alomatlari bo'lgan huquqbuzarliklar aniqlangan taqdirda nazorat materiallarini huquqni muhofaza qiluvchi organlarga topshiradi.

Davlat moliyaviy nazorati obyekti mansabdor shaxslariga nisbatan ma'muriy huquqbuzarliklarga doir materiallar sudlarga yoki tegishli vakolatli davlat organlariga topshiriladi.

27-bob. Davlat moliyaviy nazoratini tashkil etish

180-modda. Yakuniy nazorat tarzidagi davlat moliyaviy nazorati

Yakuniy nazorat tarzidagi davlat moliyaviy nazorati nazorat rejasiga ko'ra amalga oshiriladi va davlat moliyaviy nazorat organining qarori asosida o'tkaziladi.

Yakuniy nazorat tarzidagi davlat moliyaviy nazoratini amalga oshiruvchi mansabdor shaxs davlat moliyaviy nazorat organi qarorining ko'chirma nusxasiga va xizmat guvohnomasiga ega bo'lishi kerak.

Yakuniy nazorat tarzidagi davlat moliyaviy nazoratini amalga oshirishda davlat moliyaviy nazorat organlarining mansabdor shaxslariga qo'yiladigan talablar vakolatli organ tomonidan belgilanadi.

181-modda. Davlat moliyaviy nazorat organlari tomonidan ekspertlar va mutaxassislarni jalb etish

Davlat moliyaviy nazorat organlari maxsus kasbiy bilimlarni talab etadigan masalalarni ko'rib chiqish uchun davlat boshqaruvi organlari hamda boshqa tashkilotlarning ekspertlari va mutaxassislarini jalb etishga haqli.

182-modda. Davlat moliyaviy nazoratini o'tkazish davriyligi va muddatlari

Yakuniy nazorat tarzidagi davlat moliyaviy nazorati ushbu Kodeksning 170-moddasiga muvofiq tasdiqlangan davlat moliyaviy nazorati obyektlarini nazorat qilish rejasiga ko'ra yiliga ko'pi bilan bir marta amalga oshiriladi.

Yakuniy nazorat tarzidagi davlat moliyaviy nazoratini amalga oshirish muddati o'ttiz kalendar kundan oshmasligi lozim. Zarur hollarda yakuniy nazorat tarzidagi davlat moliyaviy nazoratini amalga oshirish muddati davlat moliyaviy nazoratini tayinlagan tegishli davlat moliyaviy nazorat organining rahbari yoki u vakolat bergan shaxs tomonidan uzaytirilishi mumkin.

183-modda. Davlat moliyaviy nazorati natijalari bo'yicha rasmiylashtiriladigan hujjatlar

Yakuniy nazorat tarzidagi davlat moliyaviy nazoratining natijalari davlat moliyaviy nazorat organining mansabdor shaxsi tomonidan:

tekshirish va taftish natijalari bo'yicha tuziladigan hujjat — dalolatnoma;

davlat moliyaviy nazorati natijalarini umumlashtiruvchi hujjat — jamlanma dalolatnoma;

o'rganish va nazorat tartibida tekshirish natijalari bo'yicha tuziladigan hujjat — ma'lumotnoma yoki xulosa tarzida rasmiylashtiriladi.

184-modda. Davlat moliyaviy nazorati natijalarini rasmiylashtirish

Yakuniy nazorat tarzidagi davlat moliyaviy nazorati natijalariga doir hujjatlar quyidagilar ko'rsatilgan holda rasmiylashtiriladi:

rasmiylashtirilayotgan hujjatning turi;

tekshirish o'tkazilgan joy, hujjat tuzilgan sana;

davlat moliyaviy nazoratini o'tkazish uchun asos;

davlat moliyaviy nazoratining turi va uni o'tkazish davri;

davlat moliyaviy nazoratini o'tkazgan mansabdor shaxslarning familiyasi, ismi va otasining ismi;

davlat moliyaviy nazorati obyektining to'liq nomi, nazorat bilan qamrab olingan davr uchun mas'ul mansabdor shaxslarning lavozimi, familiyasi, ismi va otasining ismi ular egallab turgan lavozimlarida ishlagan davr albatta ko'rsatilgan holda;

davlat moliyaviy nazorati obyektining joylashgan yeri (pochta manzili), bank rekvizitlari;

oldingi taftish (tekshirish) natijalari yuzasidan ko'rilgan chora-tadbirlar haqidagi ma'lumotlar;

davlat moliyaviy nazorati bilan qamrab olingan davr hamda uni o'tkazish uchun davlat moliyaviy nazorati objekti tomonidan taqdim etilgan hujjatlar haqidagi umumiy ma'lumotlar;

taftish (tekshirish) jarayonida aniqlangan qoidabuzarliklar faktlari, normalari buzilgan qonunchilik hujjatlari ko'rsatilgan holda.

Yakuniy nazorat tarzidagi davlat moliyaviy nazorati natijalariga doir hujjatga davlat moliyaviy nazoratini o'tkazish uchun asos bo'lib xizmat qilgan hujjatlarning ko'chirma nusxalari, davlat moliyaviy nazorati doirasida harakatlarni bajarish to'g'risidagi bayonnomalar, inventarizatsiya dalolatnomalari, jalb etilgan ekspertlar va mutaxassislarning xulosalari, nazoratni o'tkazish jarayonida davlat moliyaviy nazoratini amalga oshiruvchi mansabdor shaxslarning so'roviga ko'ra olingan materiallar, shuningdek nazorat doirasida bajarilgan harakatlarni tasdiqlovchi boshqa hujjatlar qo'shib qo'yilishi lozim.

Davlat moliyaviy nazorati natijalariga doir hujjatga qonunchilik hujjatlari bilan, hujjatlar bilan yoki davlat moliyaviy nazorati obyekti faoliyatining davlat moliyaviy nazorati jarayonida amalga oshirilgan tartib-taomillar natijalari bilan tasdiqlanmagan turli xil xulosalarni, taxminlarni va faktlarni, tergov materiallaridan ma'lumotlarni va davlat moliyaviy nazorati obyekti mansabdor shaxslari tergov organlariga bergan ko'rsatuvlarga havolalarni kiritishga yo'l qo'yilmaydi.

Davlat moliyaviy nazorati natijalariga doir hujjatda davlat moliyaviy nazorati obyekti mansabdor va moddiy javobgar shaxslari harakatlariga huquqiy baho berilmasligi, shuningdek ularning qilmishlari, niyatlari va maqsadlari tavsiflanmasligi lozim.

Ushbu moddaning **birinchi qismida** nazarda tutilgan ma'lumotlar ma'lumotnoma (xulosa) rasmiylashtirilayotganda majburiy emas.

Davlat moliyaviy nazoratining natijalariga doir hujjatlar davlat moliyaviy nazoratini o'tkazgan mansabdor shaxslar, shuningdek davlat moliyaviy nazorati obyekti mansabdor va mas'ul shaxslari tomonidan imzolanadi.

Davlat moliyaviy nazorati obyekti mansabdor va mas'ul shaxslari davlat moliyaviy nazorati natijalariga rozi bo'lmagan taqdirda, hujjatni o'z e'tirozlari bilan imzolaydi hamda o'n kunlik muddat ichida e'tirozlarini davlat moliyaviy nazorat organiga yozma shaklda taqdim etadi.

Davlat moliyaviy nazorati obyekti tomonidan e'tirozlar o'n kunlik muddatda yozma shaklda taqdim etilmagan taqdirda, davlat moliyaviy nazorati natijalariga doir hujjat davlat moliyaviy nazorati obyekti tomonidan qabul qilingan deb hisoblanadi hamda davlat moliyaviy nazorat organi tomonidan uni amalga oshirish choralari ko'riladi.

Davlat moliyaviy nazorati obyekti sudga murojaat etgan taqdirda, o'zining sudga murojaat etganligini tasdiqlovchi hujjatni o'n kunlik muddatda davlat moliyaviy nazorat organiga taqdim etishi shart. Sud tomonidan davlat moliyaviy nazorati obyekti murojaati xususida qaror qabul qilinguniga qadar davlat moliyaviy nazorat organi davlat moliyaviy nazorati natijalari bo'yicha rasmiylashtirilgan hujjatning nizoli bandlarga tegishli qismi bo'yicha amalga oshirilishini to'xtatib turadi.

Davlat moliyaviy nazorati natijalariga doir hujjatlarda bayon etilgan ma'lumotlarning ishonchliligi, xolisligi va to'liqligi davlat moliyaviy nazorat organlarining mansabdor shaxslari tomonidan ta'minlanadi.

185-modda. Davlat moliyaviy nazorati obyekti mansabdor shaxslarining huquq va majburiyatlari

Davlat moliyaviy nazorati obyekti mansabdor shaxslari:

davlat moliyaviy nazorati amalga oshirilishining maqsadi, boshlanish sanasi va davomiyligini bilishga;

davlat moliyaviy nazorat organlarining tekshiruvchi mansabdor shaxslaridan mazkur organ rahbarining qarorini va yakuniy nazorat tarzidagi davlat moliyaviy nazoratini amalga oshirish huquqini beruvchi bir martalik guvohnomani, shuningdek shaxsiy guvohnomani talab qilishga;

davlat moliyaviy nazoratini o'tkazish uchun asosga ega bo'lmagan shaxslarni davlat moliyaviy nazoratiga qo'ymaslikka;

davlat moliyaviy nazorati natijalari yuzasidan shikoyat qilishga haqlidir.

Davlat moliyaviy nazorati obyekti mansabdor shaxslari:

davlat moliyaviy nazorat organining mansabdor shaxslari davlat moliyaviy nazoratini o'tkazishi uchun zarur sharoitlar yaratishi;

davlat moliyaviy nazorat organi va uning mansabdor shaxslarining qonuniy talablarini bajarishi, shuningdek davlat moliyaviy nazorat organi mansabdor shaxslarining qonuniy faoliyatiga monelik qilmasligi;

davlat moliyaviy nazoratini o'tkazish vaqtida davlat moliyaviy nazorat organining mansabdor shaxslariga mazkur nazoratni amalga oshirish uchun zarur bo'lgan hujjatlar va ma'lumotlarni taqdim etishi hamda ularning ishonchliligi, xolisligi va to'liqligi uchun shaxsan javobgar bo'lishi;

budjet to'g'risidagi qonunchilik buzilgan holda foydalanilgan mablag'larning o'zni qoplanishini, shuningdek tovarlarni (ishlarni, xizmatlarni) yetkazib beruvchilar tomonidan shartnoma majburiyatlari bajarilishini ta'minlashi shart.

Davlat moliyaviy nazorati obyektining mansabdor shaxslari qonunchilikka muvofiq boshqa huquqlarga ham ega bo'lishi va ularning zimmasida boshqa majburiyatlar ham bo'lishi mumkin.

186-modda. Davlat moliyaviy nazoratini o'tkazishdagi cheklolar

Davlat moliyaviy nazoratini:

davlat moliyaviy nazorati obyekti mansabdor shaxsining yaqin qarindoshi, erining (xotinining) qarindoshi bo'lgan;

davlat moliyaviy nazorati obyektida shaxsiy mulkiy manfaatlari bo'lgan;

tekshiruv bilan qamrab olingan davrda davlat moliyaviy nazorati obyektida ishlagan davlat moliyaviy nazorat organlarining mansabdor shaxslari tomonidan o'tkazish taqiqlanadi.

Ushbu moddaning **birinchi qismida** ko'rsatilgan holatlar yuzaga kelgan taqdirda davlat moliyaviy nazorat organlarining mansabdor shaxslari bu haqda davlat moliyaviy nazoratini tayinlagan organning rahbarini yozma shaklda xabardor qilishi kerak.

28-bob. Budjet to'g'risidagi qonunchilikni buzish

187-modda. Budjet intizomini buzish

Quyidagilar budjet intizomini buzishdir:

Davlat budjeti, davlat maqsadli jamg'armalari budjetlari va budjet tashkilotlarining budjetdan tashqari jamg'armalari mablag'larini ularni olish (ulardan foydalanish) shartlariga muvofiq bo'lmagan maqsadlarga moliya yili davomida yo'naltirish;

mehnatga haq to'lash bo'yicha belgilangan razryadlarga, lavozim maoshlari, ustamalar, ish haqiga qo'shimchalar va boshqa to'lovlar miqdorlariga rioya etmasdan moliya yili davomida to'lovlarni amalga oshirish;

budjetdan moliyalashtiriladigan muassasalar va tashkilotlarga ish haqi, pensiyalar, nafaqalar, stipendiyalar va ularga tenglashtirilgan boshqa xarajatlarni to'lash uchun pul mablag'lari berilishini, shuningdek pensiyalarni yetkazib berishni amalga oshiruvchi muassasalarga pul mablag'lari berilishini banklarning rahbarlari va boshqa mansabdor shaxslari tomonidan asossiz kechiktirish.

188-modda. Smeta-shtat intizomini buzish

Smeta-shtat intizomini buzish quyidagilar natijasida Davlat budjeti, davlat maqsadli jamg'armalari budjetlari va budjet tashkilotlarining budjetdan tashqari jamg'armalari mablag'larini moliya yili davomida sarflashdir:

noto'g'ri ma'lumotlar asosida va normativlarga nisbatan oshirib ko'rsatilgan budjetdan ajratiladigan mablag'larni xarajatlar smetasiga kiritish;

xodimlarning belgilab qo'yilgan cheklangan umumiy soniga, xodimlarning toifalari o'rtasidagi o'zaro nisbat normativlariga, namunaviy shtat normativlariga rioya etmaslik;

budjet tashkilotlarining budjetdan tashqari jamg'armalarini shakllantirish va ulardan foydalanish tartibiga rioya etmaslik;

tarifikatsiya ro'yxatlarini tuzishning belgilangan tartibi va normativlariga rioya etmaslik.

189-modda. Budjet hisobini va moliyaviy hisobotni yuritish tartibini buzish

Boshlang'ich hisob hujjatlarining mavjud emasligi, budget hisobi va moliyaviy hisobot ma'lumotlarining boshlang'ich hisob hujjatlarining ma'lumotlariga nomuvofiqligi, budget hisobi va moliyaviy hisobotlarda operatsiyalar va mol-mulkning to'liq aks ettirilmaganligi budget hisobini va moliyaviy hisobotni yuritish tartibini buzishdir.

190-modda. Budget so'rovini, ro'yxatdan o'tkazish uchun xarajatlar smetalarini va shtat jadvallarini, shuningdek moliyaviy hisobotni hamda davlat maqsadli jamg'armalari budgetlarining ijrosi to'g'risidagi hisobotlarni taqdim etish tartibini buzish

Moliya organlariga budget so'rovini, ro'yxatdan o'tkazish uchun xarajatlar smetalarini va shtat jadvallarini, shuningdek moliyaviy hisobotni hamda davlat maqsadli jamg'armalari budgetlarining ijrosi to'g'risidagi hisobotlarni belgilangan muddatlarda taqdim etmaslik budget so'rovini, ro'yxatdan o'tkazish uchun xarajatlar smetalarini va shtat jadvallarini, shuningdek moliyaviy hisobotni hamda davlat maqsadli jamg'armalari budgetlarining ijrosi to'g'risidagi hisobotlarni taqdim etish tartibini buzishdir.

190¹-modda. Budget jarayonining ochiqligini ta'minlash tartibini buzish

Ma'lumotning ushbu Kodeks 166¹-moddasida nazarda tutilgan muddatlar buzilgan holda tegishli tashkilotlarning rasmiy veb-saytlarida mavjud emasligi, to'liq joylashtirilmaganligi va (yoki) joylashtirilmaganligi budget jarayonining ochiqligini ta'minlash tartibini buzishdir.

191-modda. O'zbekiston Respublikasiga beg'araz yordam doirasida kelib tushgan tovarlardan foydalanish tartibini buzish

O'zbekiston Respublikasiga beg'araz yordam doirasida kelib tushgan tovarlarni sotish, ijaraga berish yoki boshqa tijorat maqsadlariga yo'naltirish ulardan foydalanish tartibini buzishdir.

192-modda. Budget to'g'risidagi qonunchilikni buzganlik uchun javobgarlik

Budget to'g'risidagi qonunchilikni buzganlikda aybdor shaxslar belgilangan tartibda javobgar bo'ladi.

(O'zbekiston Respublikasi qonun hujjatlari to'plami, 2013-y., 52-I-son; 2014-y., 36-son, 452-modda; 2015-y., 52-son, 645-modda; 2016-y., 52-son, 597-modda; 2017-y., 1-son, 1-modda, 24-son, 487-modda; Qonun hujjatlari ma'lumotlari milliy bazasi, 01.01.2018-y., 03/18/454/0493-son; 05.01.2018-y., 03/18/456/0512-son, 24.07.2018-y., 03/18/486/1559-son, 27.07.2018-y., 03/18/488/1579-son, 25.12.2018-y., 03/18/508/2365-son, 09.01.2019-y., 03/19/512/2435-son, 23.05.2019-y., 03/19/540/3167-son, 30.08.2019-y., 03/19/559/3670-son, 05.09.2019-y., 03/19/563/3685-son, 13.11.2019-y., 03/19/583/4016-son, 10.12.2019-y., 03/19/590/4129-son; 25.12.2019-y., 03/19/597/4193-son; 18.03.2020-y., 03/20/612/0326-son, 09.11.2020-y., 03/20/646/1488-son, 04.12.2020-y., 03/20/653/1592-son, 31.12.2020-y., 03/20/660/1682-son; 15.01.2021-y., 03/21/666/0032-son; Qonunchilik ma'lumotlari milliy bazasi, 21.04.2021-y., 03/21/683/0375-son, 26.08.2021-y., 03/21/711/0825-son, 28.08.2021-y., 03/21/712/0828-son, 30.10.2021-y., 03/21/726/1001-son, 29.12.2021-y., 03/21/740/1209-son; 18.05.2022-y., 03/22/770/0424-son; 30.06.2022-y., 03/22/782/0576-son; 01.05.2023-y., 03/23/836/0232-son; 29.11.2023-y., 03/23/880/0905-son; 09.09.2024-y., 03/24/957/0689-son; 24.10.2024-y., 03/24/981/0841-son; 18.11.2024-y., 03/24/1002/0936-son; 26.12.2024-y., 03/24/1014/1067-son; 26.02.2025-y., 03/25/1038/0188-son)